

KA JINGIATHUHKHANA

SHAPHANG

KA LYNGNGAISNGI

DA U

B. THANGKHIEW.

Ka Jingiathuhkhana

SHAPHANG

KA LYNGNGAISNGI

DA U

B. THANGKHIEW.

LA PYNMIH

DA U NONGTHOH JONG KA.

LA SHON HA RI KHASI PRESS, UMSOHSUN, SHILLONG -1

1972

REFERENCE
Not to be Lent out

KI KYNTIEN LAMPHRANG.

La thoh ia kane ka jingiathuhkhana kum ka dak ba kumba ka jinglong samla ka long kaba kordor tam jong ka jingim kaba baroh ki jingpynlong jong kane ka pyrthei ki ioh ialehkai bad ioh ialeh sngewbha shisha bad ka, kumta ruh u Lursympet bad ka Lyngngaisngi jong kane ka jingiathuhkhana ki la ioh ia kane ka jingkordor. Ka jingkordor jong ki ka long kata ka jingkordor ba da palat liam na kiwei pat ki samla ba bun jong ka pyrthei, namar kiwei ki samla babun ki tang shu mon bad tang kwah ki la ioh hynrei kine pat ki la ioh da kaba da jot bad da pang ka doh bad ka mynsiem kaba long kata ka jingkor-dor kaba kin nym lah shuh ban klet lano lano ruh.

Ha ka jinglongbriew ki ju jia kum kine ki jingjia kiba pynlong ban pynmih ia ki jingiohi ba itynnat, ia ki jingiohsngew ba sngewtriem bad jingiohsngew ba um mynsiem, ia ki ktien ba kthang bad ia ki ktien bathiang kat kumba la thoh ha kane ka jingiathuhkhana, ryngkat ki ktien ban pynshoh ia kata ka jingjia halor jong ka jinglongbriew.

B. Thangkhiew.

Library books will give you Joy for Long
if handled carefully with clean hands

KA LYNGNGAISNGI.

Ki sngi ki bnai ki iaiaid jai jar ha la ki kamram sain pyrthei, halor ki phew hajar kiei kiei ki jong kane ka shi tyllup pyrthei, ba ki symbai kin kyan. kin mih, kin sei, kin pyar la ki jong ki sla bad kin pynher la ki jingiwbihi ne ba kin duh kin dam, kin tyrkhong kin sdot, kin iap bad kin tlor.

Hangta kumta ruh ki iaiaid jai jar ki por ba lung jong ka Lyngngaisngi, haduh kata ka por ba ka la phuh bad ka la sieng ba baroh kin nym klet shuh bad kynmaw ieid ia ka kyrteng jong ka, "Ka Lyngngaisngi".

Hamar ka step ba phyrnai khliir khliir jong ka por ha kaba ki dieng ki sied, ki syntiew ki skud ki taplup ia ki lum ba jrong bad ki them ba jylliew, ryngkat ki laiphew sur jong ki sim ba ia rwai sngewbha bad ki laiphew jingiew jong ki 'erbatemon ba kit jingiwbihi bad hangta ngi ioh-sngew nyngkong ia ka kyrteng jong ka, da ka jingkhoh ieid bad jingthie ieid, haba ka kmie ka la khoh "Ko Lyngngaisngi" bad ruh ka la thie "Oi Mei".

Ka long ka khun ba thep mynsiem lut jong ka ieing baroh kawei, ki kmie ki kpa jong ka ki long ki nongrep bad ki nongkhahi ba riwspah bad ba don burom shibun ha kata ka shnong, ha kata ka por. Ki long kiba sian, kiba nang kiba stad bad ba shemphang ha ki bun rukom ki kam, bad kumta ka spah jong ki ka la nangioi

irat haduh ba ki la long kiba riewspah bad ba donburom tam ha kata ka shnong. Ki long ki briew kiba sbun bad kylluid mynsiem ia la ki lok ki jor, ia la ki para marjan-marpar bad ia la ki para briew baroh bad ki long ruh kiba kynmaw sngi ia kiei kiei baroh kiba dei ia ka jingim babha jong ki.

Nalor kita baroh, kaba kongsan tam ka long ba kin pynlut ia la ka jingim ba sngewthiang tam jong ki halor kata ka khun ba bha briew jong ki, Ka Lyngngaisngi.

Ka Lyngngaisngi ka long ka khynnah kaba don ka jinglong kaba janai ha ka jinglong briew, kaba ym don ba lah shuh ban kem daw mano mano ruh. Ka jingbhabriew jong ka ka long haduh katta katta ba da kumba da thew bad da ot nadong shadong, ka shyllangmat ka shat kum ka sngi la ki 'niuhmat da thew halor ki pyllewmat ba tyngshain kum ki khlur, ki rengngap lam byrsawni ki i kum u 'tiew mukmor da suit rong janai, bad kumta ka phuh kum u 'tiew Lyngksiar bym i lah lip bad lah tlor shuh shi junom.

Ka jingsuk jingsain, ka jingsngewbha bad jingsngewtynnad jong kata ka ieing ka long da shisha ka ieing ba la kyrkhu, ba ym don shuh ka kaw-kaw ka daw-daw, hynrei tang da ka jingiaieid suda. Ka kmie haba ka sngewsih namar kano kano ka daw ka tang shu peit ia la ka jong ka khun ka phuh samrkhie noh bad kumta hi u kpa ruh kumjuh, kumta hi ruh ka shongsuk shongsain jong ki ka long haduh habar ia la ki lok ki jor kumjuh.

Kumba haba u syntiew ba itynnad bad

iwbih u la phuh, na kylleng sawdong ki ngap bad ki thapbalieh ki wan her ban ia boi sawdong jong u, kumta ruh ka la jia halor jong ka Lyngngaisngi, haba ka jinglong samla jong ka ka la sdang ban phuh. Ka don ka bor ban ring ia ki khmat bad jingpyikhat jong uno uno u samla uba la iohi ia ka dur khmat jong ka. Lada tang shisien un iohi ia ka, ka la biang ia u ba un duh-thiah duhshong katba ka dur jong ka ka dangshong ha ka dohnud ka jong u.

Baroh ki samla jong kata ka shnong bad kiwei, ki shu iap ngiah lut ia ka. Napdeng jong ki la don uwei u samla uba kyrteng u Lamar Singh uba ju leit juh ha ieing jong ka barabor, u dei u khun riewspah hynrei ka ieing bad ka jinglong jong u kim long kiba da don burom kat ban ia biang ka jingim bad jinglong jong ka Lyngngaisngi. Haba u la iai wan kai kumta barabor, ki la sdang ban ia ieid bad bunsien u la ju kren phawer ia ka, ia kane katai bad ka ruh kum paia samla bad ba ka i iapmat de ia u ka la jubab bunsien da ki jubab wiat rymmuin kiba pynkhih bad ktik ia ka dohnud bad mynsiem jong u.

Ha kawei ka janmiet ki la ia shongkai baroh arngut, namar ki kmie ki kpa jong ka ruh kim da sngew eh ia u ban leh kum ia u mynder ban nym shah ia la ka khun ba kan ia shongkai bad u, namar ba u long u parashnong-parathaw bad uba ki iaieid ia sngewbha barabor, u la ong ha ka "Shi phi Kong Lyngngaisngi kane ka ieing jong phi te kaba la ring shishā ia nga, haba shwa ba ngan leit trei ruh nga da rung bad tang shu wan

trei pat de ruh shu kum wan rung hi, imat ba phi shna ieing eh harud lynti phi, thaw ieing noh kham sha kyndong seh.” “Kaba dei kata kaba phi ong ma phi”. La ong sa ma ka pat, “Tang ba ngan thaw ieing sha kyndong ruh nga tieng ba ioh phi thait bad shitom ma phi te.” “Ngan leit shitom bad thait lei phi”. U la ong, “Haba phi la thaw sha kyndong te ngam wan shuh kein”. “Kata ruh ka lah ban long”. Ka la ong, “Tang ba ka kham bha ba ngan sah hajuh phi namar nga shu tieng, ba lehse ngan leit thaw sha pajih ruh ym long, ngan leit thaw sha lum ruh ym long, ngan leit thaw ha um ruh ym long, namar shano ngin iawad bad shano ngin leit ia kylla sim kylla dohkha.” Ka la puh samrkhie atad, u hangta u la khluit bad u la kren syndon ha doh u la ong “Balei phi liet tieng ban ia wad, ba ngin ia kylla sim bad kylla dohkha na ka bynta ka jingieid”.

Hangta ka la kdat da kumwei pat namar ka la sngew ma ba u la kren syndon ha doh bad ba ka la sngewbieid artad ba ka la kren palat ialade, ka la ong “Ka dei phi kaba phi kren maphi, hapdeng ka jingiaieid parashnong parathaw, paramarjan-paramarpar shano shano ruh ngin ia poi hi, ban ia wad bad ban iashem”. “To kein noh”. U la ong, “Ka la biang ia nga bau sngewthuh ba phi long ka nongpynphlapop kaba khraw hynrei phi dei ban tip pat ba nga ruh nga dei u nongpynsngewthuh uba khraw”. Kumta ki la shu ia rkhie baroh arngut. Kane ka jingiasngewbha-sngewtynn timer jong ki la la neh katto katne por.

Haba ki kmie ki kpa jong ka ki la ithuh ia

kane ka jingialong jong ki, ha kawei ka sngi ki la sneng la pyni ia la ka khun shaphang jong u ba ki kim mon kim sngewbha ia ka ba kan ialang samla bəɬ u, ka ruh kumba ka long ka khun ngeit sneng bad khun kohnguh jong ki, ka la kohnguh ia ka jingsneng jong ki bad ka la ong ha ki ba kano kano ka kam kaba ki kim sngewtynnad bad sngewbha, ba ka ruh da lei lei kan nym sngewtynnad bad sngewbha, namar ka ktien jong ki ka long kaba kordor ha ka barabor. Kumta naduh kata ka por hi la u wan kai ruh kam ju leh shuh ia u kumba ka la ju leh barabor, haba u kren ei ei ruh ka kren pynphalang shawei bak bak ban pynngiah ia ka jingmut bad jingwankai samla jong u.

Kane ka jingleh jong ka, ka la pynkulmar ia u thlim namar u da ieid bad da mut ia ka naduh ka mynsiem. Haba u la pyrkhath ha la ka mynsiem pat ia ki jingleh jong ka u la sngewbieid ba un iai leit kai pat sha ieing jong ka.

La shisha kam ju ai lad ia u haba u kren 'tien samla ia ka, hynrei ka long kaba leh bha bad leh sbun shibun ia u ha kiwei pat ki kam, namar ka long ka jait briew kaba bha ktien hi iano iano ruh. Hapdeng ka jingjopthiaw jong ka jingieid, kane ka jingleh jong ka pat ka la pynring jingmut ia u ba un pynwan jubor ia la ka jingpyrkhat sha ka, da kaba u shu pynbun da ka "Imat" bad ka "Lehse" suda.

Haba la bun bnai ki la shad sawdong kine ki jingpyrkhat u la dap da ki jingklusai bad jingpisa mynsiem ka bym lah shuh ban ong. Ha kaba khadduh u la kut jingmut ba u dei ban

kren syndon ha ka, ba wei ia kaba la sdang, ai ba kan shai syndon katba ka long, ba kan khuid khlem don jingsahnud shuh. Kumta hi hapdeng shi sngi arsngi u la phah ktien sha ka, u la ong “Nga ju wan kai barabor ha ieing jong phi, ngam lah ban ong ba phi sngewbha ne phi sngewsih, nga ngeit ba phi tip bad sngewthuh ia kaei ka jingsngew kaba nga nga don halor jong phi, wat la shisha nga te ngam lah ban pule lut ia ka jingmut jong phi ba aiu phi don halor jong nga”. Ka tang shu ioh ia kine ki ktien, ka la jubab sha u ka la ong, “Ngam lah ban tip lut bad sngewthuh lut, ki jingmut aiu kiba phi phi don halor jong nga hynrei nga shu ngeit ba phi ruh phi don kajuh ka jingmut kaba nga nga don, ba nga sngewbha bad sngewtynnad shibun eh ia ka jingwan kai sngewbha jong phi ha ieing jong nga kumba wan kai lem ki paralok, paramarjan kiba long kum ki lok ki jor, ki hymmen ki para ki ban pyni, pynsneng lem ia kaba dei bad kaba lait jong nga. Nalor kata ngam don ei ei ban ong lane ban sngew ia phi da kumwei pat, hynrei tang da ka jingieid bad jingsngewbha suda ia phi bad ia baroh ki paralok para jor jong nga”. Haba u la ioh ia kane ka jubab, u la pyrkhat bad u la sngewthuh ia ka jingmut jong ka bad u la pait ka dohnud thar, bad u la kren ha la poh mynsiem, “Shish haba ka briew kam mon balei ngan leit ieid khyllah tang ma nga”. *Ka ktien shu ong had ka mat shu peit, nang hi ban ong bad nang hi ban peit, hynrei ia ka jingthnam ka mynsiem shano ka jingong kan leit lah tip bad shano ka khmat kan leit lah iohi. Da ka jingkthang ka*

mynsiem bad jingpait ka dohnud u la pynrem ia-lade bad u la jubab pat sha ka u la ong, “Ngam nang ban ong ba nga sngewbha ne nga sngewsih shibun ban iohsngew ia kine ki ktien jong phi. Ka jingkren madan jong phi nga la sngew kumba ka pyrthei baroh kawei ka long kaba madan wat lada shisha ka dei kaba pyllun. Hapdeng kita l. jingsngew kiba phi phi la pynsngew ia nga, nga sngewbha pat ban ong ba nga la sngewbha shibun ba nga la pyndep ia la ka kamram kaba nga dei ban pyndep. Ka lyiur, ka tlang, ka pyrem bad synrai balei yn leit sngewphylla ha ka pyrthei kaba ju jia. Ki ’tiew sara balung baieid tam jong ka lyiur bunsien ki iap bad ki tlor noh ha ka jingwan lap jong ka jingshohthah, hynrei balei yn leit sngew ia kata haba u shoh lem hi ia baroh shi pyrthei. Kong Lyngngaisngi nga ngeit ba phim shym sngewphylla ei ei ia kane ka jingleh jong nga kaba nga la leh ia kaei kaba phi hi phi la tip. Ngam sngew ei ei wad lada ngam shym poi pyrkhath ia kiba nga dang dei pat ban pyrkhath, ha ka pyrthei ba lyngngoh ngam ju sngew lyngngoh ei ei, nga sngewbha bad sngewtynnad lang ia kaei kata kaba phi phi sngew ba nga nga dei ban sngew. Barabor haba ngi pyrkhath ia kaba dei bad kaba bha, ka long kaba bha hi wat lada ka dei kaba sniew ruh. Nga la bakla bad kata ka jingbakla jong nga ka la pynsngewsih kthang ia nga, hynrei kam pher ei ei ha ka pyrthei dei ban shah ia kiei kiei kiba dei ban shah.” Kumta hi naduh kata ka por um ju leit kiew shuh sha ieing jong ka.

Bun kiwei kiwei ki samla ruh kiba la pynjia

bor kum kine ki jingjia halor jong ka, don kiba la dom bad kren sat halor jong ka bad don ruh kiba la jaw ummat kthang na ka bynta jong ka. Kine baroh ki la shu wan jia bor halor jong ka namar ka jingbhabriew than jong ka, wat lada ka hi da lade ka da sngewsih than ba kin wan jia kum kine ki jingjia, hynrei kan leh kumno kaba pli haba ki la shu wan jia bor hi kumta, bad kumta ka la shu pynhun ia la ka mynsiem ba ai kan jia bad long katba ka long.

Hapdeng kita ki samla babun baroh, la don uwei u samla uba kirteng u Lursymper, u long u khun ba don burom bad khun riwspah, uba ka jingim jong kiba ha ieing ha sem jong u ki long kajuh ka jingim donburom kum kiba ha ieing ha sem jong ka Lyngngaisngi. Une u samla u long uba bha briew, uba don akor bad uba don burom shibun eh. U la ju ia ithuh ithaw bha bad ka Lyngngaisngi ha ka por ba ki dang ia khynnah, namar ki ju ia kren bad ju ialeh kai barabor ha kata ka por khynnah jong ki, hapdeng ka jingiaieid kaba haduh katta katta. Haba ki la kham san kim ju kham ia-shem shuh, namar ka la jia ba ki la iashong jngai noh bad kumta haduh ba ki la ia kylla mynder noh.

Katba kata ka jingkhamnangheh bad khamnangsang jong ki ka nang iaied, ka jingbhabriew jong ki ruh ka nangbud ia ki, kumba ki kjat sngi balung ki nang kham phyrnai bad kham tyngshain na ka jingshai byrngut jong kata ka step phyrngap shuwa ba kan sa shai.

Ka jingiaieid jong ki ka nangbud syndait na jngai na jngai katba ki khyllipmat ki nangiaied,

wat la kim ju kham iashem shuh barabor mar khamat. Haba ki la ia samla, kata ka mynsiem ba la shong seng jong ki, ka la syrpai syrpuđ ban pynshong tynrai bađ pynshisha ia kata ka jing-iaieid jong ki. Jar jar ha la poh mynsiem ym don batip ba kumno ki ia phohsniew bađ kumno ki ia phuh bha uwei ia kawei pat. Ka jingiaieid bashisha hangne kan sa shongkulai mon bađ nangne kin sa sdang ban sngewthuh ba ka jing-phuh samrkhie bađ ka jingtlor ummat ka don dor haduh katno ia ki.

Haba ka jingiapmat jong kata ka jinglong samla ka la poi, U Lursympet, u rangsamla da thew, u la thew tarajur ia kaei kaei baroh ha la poh ka mynsiem marwei marwei, katba u nang thew ka la hap kynsan ka tarajur na ka kti ba um lah thew shuh ia ka jingbankhia than jong kata ka jingbhabriew jong ka Lyngngaisngi. Naduh kata ka por hi um ju nud leit shuh wat tang shajan ieing jong ka ruh namar ba u la sngewlehrain bađ sngewphieng ka khlieh, ba u la don lypa kata ka jingmut, ba wat lada ym don batip mano mano ruh, hynrei u sngew kumba ki la lah tip lut baroh ia kata ka jingmut jong u. Kane ka long namar ba ka mynsiem jong u ka dang lung bađ dang sdang nyngkong eh, bađ kumta u sngew ha la ka jingsngew, ba ka long ka kam ka bym sngewbit ban tip mano mano ruh. Katba ki por ki nangiaid ka jingbhabriew jong ka ka nangring ia ka dohnud jong u, kat haduh ba um don shuh kawei pat ka jingpyrkhat kaba u sngewtynnai ban pyrkhat, hynrei tang ki jingpyrkhat shaphang jong ka. Barabor ka por ba kham bang jong u ban pyrkhat ka long ka por shwa ba un iohthiah, u tang shu kiew ha

jingthiah u ju klet noh ia kiei kiei baroh bad u dap tang ki jingpyrkhat sngewtynnat ba kumno u ia phuh samrkhie u ia kren kai bad ka, ha la kata ka jingpyrkhat, barabor u la ju phuh samrkhie marwei marwei kum u khunlung bad kumta ha kum kitei kiei kiei u la iohthiah halor jong ka barabor.

Ka Lyngngaisngi ruh ha kajuh ka jinglong ka ju kynmaw tang ia u hi, bad teng teng ka ju pisa ka mynsiem jong ka haior jong u da ki jingpyrkhat ba bun rukom. *Hapoh hapoh ka thnam bad ka khieh ka mynsiem jong ki kum ki jingat phyllung jong ka duriauw bah, hynrei halor halor pat ki i jem jai jai kum ki sla um ba beh ki `Er Batemon.*

Haba slem slem ki la ialong kumne, U Lur-syemper u la sngew kwah hir hir ba la kumno kumno ruh ba un leit kai sha ieing jong ka, u la pyrkhat ki jingpyrkhat kiba sngewtynnat ba kumno un rung ha ieing jong ka bad kumno un ia kren bad ka. Ha ka jingpyrkhat u sngew ba ka long kaba jem jai jai hynrei ba un da leit shisha pat u sngew ba ka long kaba sngew eh kher, da ka jingsngewlehrain ba kumno un leit haba la slem bah um ju leit shuh ha ieing jong ka. Haba ki jingpyrkhat jong u ki la iai wan kumne bun wat, u la nang kham sngewshlur sngewshlur, kumta ha kawei ka janmiet u la mih na ieing ban leit kai sha ieing jong ka. U dang shu mih na ieing u la pyneh hi triang ban rung ha ieing jong ka ryngkat bad la ki jingpyrkhat ba har rukom, hynrei katba u nang kham poi shajan shajan, ka jingjam jong ki kjat jong u ka la nang kham

suki suki, da ka jingsngew eh bad sngewphieng ba kumno kein un leit rung ha ieing jong ka, haba la slem bah um ju leit shuh, un leit ong bad leit kren aiu, haba un shu leit rymmang rymmang hangta bad kumta um nangpyrkhat shuh kumno kumno ruh. Katba u nang iaid bad u la nang khampoi shajan bad kumta u la iohi ia ka jingthaba ki sharak jong ka ieing jong ka. U tang shu iohi ka dohnud jong u ka la um hin lyhin, u iohi kumba ia kata ka ieing la sop da ka ksiar bad da ka rupa bad ba la tei tang da ki mawkordor suda. Pynban kita ki jingiohi bad jingsngew jong u ki shu long lehnohei baroh ba um nud satia ban leit rung ha ieing jong ka. U tang shu poi ha khyrdop u la pheing nger ka khlieh bad u da kiiuh ruh bad kti bad kjat, u la mut ban phai ka kjat bad ban jam shata, hynrei ki kjat jong u kim ai jam satia bad kumta uba pli u la shu iaid lait noh na kata ka khyrdop sha kawei pat ka lynti ban leit phai kylla noh sha la ieing. *Ka ju jia kumne barabor ha ki 'riew shisha ym ha ki 'riew kai.*

Ynda u la poi ha ieing pat u la sngew babe ia la ka jingsngew bad jingleh ba balei um rung la ka rung. Kumta hi u la leh barabor haduh ban niew ia ka wat ruh ym lah shuh. Teng teng u la sngewbitar ia la ka jingsngew bad teng teng pat u la sngewbitar ia la ka jingleh, teng teng pat u la sngew samrkhie ialade bad u la ong ha la ka mynsiem ba kin da tip ki briew te kin da rkhe iapler iapang ia kata ka jingleh jong u. Ha kane ka rukom baroh arngut ki la ia duh ia kata ka jingkhmih lynti bad jingsliang jong ki ban iashem

kaba kumba sliang ia ka shi syndih ka um ha ka shiteng sngi jong ka por pyrem. *Ha la ka pyrthei pyrthei u sier lapalang u shu mied la ki khmat sha u lang tymmai jong ka shiteng riat bad ka 'kei-lympied pat ka peit tang ki khmat ba lano kan wan tuid kata ka um mluh jong ka krem ki arkhap maw ba kam lah ban phrung ia la ka jong ka khlieh ba kan ioh ban dii.* Katba ki khyllipmat jong ki jingapkhmih lynti ki nang bun katta ka jingum ka mynsiem jong ki ka nangjur. *Hynrei shano yn wad bad shano yn shem ia u 'tiew nationg ba la burieh ba suhsiang tang ki jingiwbi.*

Ka la jia kumne da ki bnai bad ki snem, bad kumta u Lursympet u la pyrkhath rangbah bad u la pynshongnia ia kiei kiei baroh, u la ong halade, ba balei un leit sngew ialade u bymnud ban leh ia kaei kaei kaba u sngewthuh ba ka long kaba dei bad kumta ba un bret shisyndon ia kata ka jingsngewlehrain pynkhawpud ka ban pynlong ia ka jingpangnud bad ka jingsngewsih ia u lashai la shisngi, kumta ba ia kaba u la mut ban leh ba un leh shisyndon. Kumta u la pyrkhath da ka lad kaba kham bit ka ban nym da pyni eh ba u da leit khnang na ka bynta jong ka. Haba u la pyrkhath pyrkhath, u la shem ia ka lad da kaba un leit siat sim bad leit pan um na ieing jong ka ynda haba u la wan phai.

Kumta hi kum lashai u la leit siat sim shisha sha kata ka khlaw kaba don sha palat ieing jong ka. Haba u la wan phai na kata ka jingwan siat sim, u la leit beit beit shaphang ieing jong ka ban leit pan um kumba u la thmu. Haba u la poi ha

khyrdop, da ka jingsngeweh kaba u la khiih kiiuh bad kti bad kjat u la rung shapoh kata ka khyrdop. U la rung shata bad u la sngew kumba u rung sha ka bneng aiu re aiu. ki jingkhangiit ki thaba baroh sawdong kumba tyngshain ki khlur bad ha man kawei pa kawei ka jingshai u iohi kumba ka ieng kata ka 'thei bhabriew jong ka dohnud jong u. Katba u nang iaaid ha kata ka jingiaid jong u, u sngew kumba u iuh halor ka jain mukmor bani bad kumta ka dohnud jong u ka la um lut baroh bad u la ong "Nga la leh ia ka kamram kaba nga dei ban leh, lada ka long kumno kumno ruh ai kan jia katba ka jia, hangta ka mynsiem jong u kam kiiuh shuh bad ka la dap tang da ki jingsngewthiang suda." U tang shu poi ha jingkhang, u la iohi ia ki nongtrei kiba don hajan, u la khot ia ki bad u la ong ba kin sngew-bha ban ia ai um ban dih. bad ki ruh ki la ia wan ai um kumba u la pan.

Ka kmie jong ka Lyngngaisngi haba ka la iohsngew ba wan riwphylla ka la wan peit, ka shem pynban ba dei ma u, kumta hi ka la kren ia u ka la ong, "Wa I hep du pleng, balei phim rung ha ieing", "Koit phi" u la ong, "Ngan shu leit noh shwa ba la miet ngan sa wan kai pat." "Em phi", ka la ong, "Phi la wan eh haduh jingkhang khlem da rung, te balei hep, nangne hangtai te yn leit da miet eh aiu dang katta." Ha la ka mynsiem u sngew kumba la hiar ka bneng jrup, kumta u la rung bad ki la ia shongkai katto katne por da kaba ki ia kylli bad jubab ia kata ka jingwan jingleit jong u. U la shong hangta hapdeng ka jinglehrain sngewtynnad kaba um

nang shuh ban batai kaba kumno kata ka jing-sngew.

Ka kmie jong ka Lyngngaisngi ka la sngew-bha shibun ia kane ka jingwan jong u, namar ka ju khmih lynti barabor ia ka jingwankai jong ki khun ba donburom kiba kum ma u ha ieing jong ka, namar ka khun jong ka ka Lyngngaisngi ka la dei ka por jong ka jinglong samla jong ka. Hadein katto katne ka la phah theh sha. "Dih noh da ka sha phi hep", ka la ong, "Ban dup jah thait". Hangta u um nang jubab shuh kumno kumno ruh, u la shu ia kohnguh kyrngah artad katba ka ong ha kum kata ka saw ka sain, kaba dap tang da ka jingkyndeh u dohnud kdek shi kdek man ba ka kren. Haba ki la ia shongkai kham slem, ki jingkyndeh mynsiem bad jingsaw-kyrang jong u ki la sdang ban sangeh, u thyllied ruh um teh shuh haba u kren. Ki jingsngew-thiang jong ki jingpyrkhat ba la bunsngi bun taiew ki la sdang ban kynud la ka sur jong ka jingjop thiaw ba u la ioh wan iuh kjat ha kata ka ieing. Hapdeng kata ka jingshongkai ki khmat jong u ki shad kadiang ka mon bad kat shaba u phai ki shu dap tang da ki jingkordor suda.

Ka Lyngngaisngi ka la tip ba u wan pan um bad wan kai ma u, ka la sngewlyngngoh shibun namar ba um ju wan mynno mynno ruh. Thik ka la shu pyrkhat halade ba imat la kup khan kumta ka la shu dap da ki jingphuhsamrkhie bad phuhkmen ha la poh mynsiem halor kata ka jingwankai jong u. Katno ka la sngewieid bad sngewtynnat ia la ka kmie ba ka la leh burom kumta ia u. Ka hi da lade ka la ia khreh kata ka

sha ka dud bad la ki nongtrei haduh ba la tдем pum ka ieingshetja. Haba la dep theh kata ka sha, la poi ha ka jyngngan khek ba kan phah ai ha ki nongtrei ne kan leit ai hi dalade, ka la sngewbieid ban phah ai da ki briew, namar haba wan kai ki kynja riewdonburom, ia ki kynja bam kynja dih dei ban leit ai da la ka kti jong ki trai hi, hynrei haba ka la pyrkhat pyrkhat pat, ka la shu sngew kumba un shu kren bad pyrkhat kumno kumno ia ka namar ba ka don jingmut than eh ialade, kumta kaba pli kam nud leit ai satia ia kata ka sha, bad kam banse, ka la shu phah ai noh ha ki nongtrei, "To ieh, " ka la ong, "Ngan shu leit ai pyni khmat shibit da u kwai. Haba u la dep dih sha ka la mut ban leit ai uta u kwai, hynrei kaba pli ka la shu saw kyrang mai-wei marwei khlem da nud leit ai ia uta u kwai ruh haduh ba kan da shu phah ai hi ha kata ka nongtrei.

U Lumsyemper u la pyrkhat halade ba lada ka hi ka don jingmut ia u ba la kumno kumno ruh ba ka dei ban wan pyni khmat ha u, hynrei haduh uta u kwai ruh kam man wan mih satia, kumta u la sngewjew sew ka mynsiem, la kumta ruh u shu don jingkyrmen hi ba lehse ynda haba un ong ban leit noh te kan sa wan pyni khmat hi, hynrei hangta ruh kam wan satia. Kumta u la mih nangta na ieing da kaba sngewsih, namar u ngeit ba imat ka kam don jingmut ei ei ia u, wat la ka kmie ka la kren bha kren miat bad ka la ong ia u ban un wan kai barabor. "Shish", u la ong ha la ka mynsiem, "Imat kaba longleh-nohei ka jingpykhat imsngei jong nga shi katta

pyrthei, ba ngan da tip kumne ngan wan pyn-shitom lei ialade shaduh kane ka pyrthei". Ha ka jingkthang bad jingsat mynsiem u la ong, "Koit kam pher, ngi u kynja rangbah ba ngi dei hi u rangtyrwa bad u rangpandor, ha bym ia dei te la dep, haba la pyndep la ka kam-ram, ba nga la pynhun ia la ka mon kaba nga kwah bad kumta ruh nga la hun". Ha ka ktien te u la kren kumta hynrei ka dohnud pat ka pait bad ka ang kumba ang u mawsiangbah. Baroh shilynter lynti u la shu iaide diaw jewliaw da ka jingduh jingkyrmen, u la pyrkhath ia ka dur ba bhabriew jong ka haduh ba u khlem da tip bad sngewthuh ba da kumno u la poi sha ieing. U la shu kren iamrem marwei marwei, u la ong "Imat ka la bhabriew than bad kumta ngam dei ban sngewsih ei ei ruh em. "Balei phan pangnud ko mynsiem jongnga", u la ong "Nga la leh ia kaba pha kwah bad kumta wat khuslai, pangnud bad sngewsih shuh namar ki jingkhulai jong pha kim lah ban siew dor ei ei ruh ia pha". Ha ka jingkhuid mynsiem bad jingdap than jong u, tang shu pher tiak u la kloih noh da ka pyrkhath sniew khlem da pyrkhath bha shuh bad kumta u la shu pynduhthiah pynduhshong ei ialade khamakha. *Ka ju long kumne barabor haba la kwah than ia kaei kaei tang shu pher tiak la sngew kumba ym lah ioh shuh, teng teng kane ka jing-sngew ka ju pynduh syndon ruh wat ia kaba dei ban ioh.*

Ka kmie jong ka Lynngaisngi ha la ka mat tymmen jong ka la ithuh ba u wan kai samla bad ka la ithuh ruh ia ka dur ba irem roit jong

u ia ka jingleh jong ka khun jong ka shwa
 ba un leit noh, wat la u la ialeh katba lah ban
 burieh ia ka, kumta ka ruh ka la sngewsih shi-
 bun eh namar ka la sngewthuh ia ka daw ba ka
 khun jong ka ka la leh bym khein briew ia u.
 Um dei u nongwei uba kam ithuh hynrei uba wat
 lada um ju wan ruh ka ithuh bha ia u bad kumta
 ka sngewthuh ba ka dei ka kamram jong ka ban
 pyni khmat ha u. La kumta ruh ka la shu sngap,
 kam kwah pynpaw ei ei, ka la shu mut ban sneng
 ia la ka khun lashai lashisngi, ia kano kaba dei
 ban leh bad ia kano pat kaba kam dei ban leh.

Ka Lyngngaisngi, u tang shu mih noh u
 Lursympet na ieing jong ka, mar kumta hi
 ka la kyndit bynriew thred bad ka la sngew-
 babe ia la kata ka jingsngew jong ka, ka la
 pyrkhath ba la kumno kumno ruh ba lada u
 wan kai sanla hi un jin da la sngewsih kthang
 ia kata ka jingleh jong ka, khamtam haba ka la
 swar bad tip na ki nongtrei ba ka khmat jong u
 ka i phuh haba u dang wan rung ha ieing
 bad ka ilip jar pat shwa ba un leit noh. Ka la
 sngewthuh beit ba kata ka jingsngewlehrain
 jong ka kam lah ban iada ei ei hynrei beit ka
 la long ba kam khein briew ia u. *Kata ka
 jingieid ba runar ka la shu lehbein ia ka
 khymah kaba pli kaba ym pat shemphang
 bad tip ia ka bneng ka khyndew.* Ki jing-
 pyrkhath jong ka ia kita ki jingleh bakla
 jong ka kiba kam lah shuh ban pynshong-
 nia katno katno ruh, kumta ka dur jong ka
 ka la kylla bad kam sngewthuh shuh ba haei
 ialade ka don namar ba ka dur jong u ka

la dap lut shi shadem jong ka, hynrei pat ka la shu long lehnohei ia ka ban wad pat ia u. Ka la sngewthuh ba kat kum ki jingleh jong ka un nym nud shuh ban wad pat ia ka. "Shi," ka la ong, "Balei kumto bad kumno kumto ba nga la long kumto ban pynlong ia nga haduh katne Haba man la ka sngi ka dur bad ka kyrteng Lursympet kam ju lah khlem da ithuh paw ha nga bad bunsien ruh nga sngew kumba ngan shu kiew na kliar jong ki lum tang ban iohi bad peit shajan ba ka dur jong u ka don, hynrei haba ka la don shisha pat hajan jong ki pyllewmot jong nga, nga tieng pynban".

Nangne ka la sdang ban sngewthuh ba katno ki jingthiang bad jingkthang ki donbor ban shongkulai mon halor jong ka jingim jong ka. Halor ka dur khmat ba thangiong bad bym nang kren briew shuh ka la leit sha kamra bad ka la thiah khop khlem da kren shuh iano iano wat tang shikyntien ruh. Kane ka jingsngewsih kthang bad dur thangiong bym kwah kren briew jong ka, ka la neh bun bun sngi.

La don kawei ka tymmen kaba la ri la sumar ia ka naduh ba ka dang khyllung haduh kata ka por. Kumta ka Lyngngaisngi ka la sngew ia kane ka tymmen kum la ka jong ka kmie hi. Kata ka tymmen, ka la iphylla shibun eh ia kata ka jingleh jong ka bad kumta ha kawei ka miet ka la leit kren ia ka, hynrei ka Lyngngaisngi kam ikwah kren satia ia ka. Haba ka peit ka peit ia ka briew,

kata ka tymmen ka la ipher bak ia ka jinglong jong ka, ba ka la kylla bad dur bad dar. "Balei khun", ka la ong, "Phi sngewñiun ne balei"? "Em", ka la ong ka kyngngaisngi, "Ngam shym sngew ei ei", bad kumta ka la jaw ummat artad. "Balei phi leh kumne", ka la ong pat kata ka tymmen, ka Lyngngaisngi ka shu sngap kam nang jubab shuh. "Kane te kaba la iphylla", la ong kata ka tymmen, "Kaba nga dei ban leit ban iathuh noh ha i mei i pa jong phi". "Em ka la ong, "Ngam shym lei lei, wat leit iathuh ei ei ha i mei i pa". "Te balei heit ba phi leh kumne"? La kylli kata ka tymmen. Kumta da kaba kata ka tymmen ka la iai kylli bad ban bor ia ka ban iathuh, bad ba ka Lyngngaisngi ruh ka ieid bad shaniah ia ka barabor, kam banse ban phla wo ia la ka jingshem baroh. "Wa ka jingbieid haba phi la leh ia ka kam kaba dei eh ruh, ia kata phi sngewsih pynban, dei ban leh kumta kein phi khun, kata ka jingleh jong phi te khun kaba la dei thik kumba phi mut khnang namar kata ka jingleh jong phi lada u briew u don jingieid ia phi, kan pynlong ia u ban ieid bad kynmaw arshah ia phi, hynrei lada phi leit mih haba u dang wan kai dang shisien kata phi pynsting bad pynpohia noh ialade bad kumta wat lada u ieid ruh un nym da niewkor eh ia phi. Da kata ka jingleh jong phi, lada u dei hi u briew uba da ieid hok ia phi un nym ioththiah iohdem shuh hynrei ka jingmut bad jingpyrkhat jong u baroh kan long tang sha phi bad ha

ka jingiohthiah ruh kin paw tang kiei kiei ki ban pynlong ia u ban ieid arshah ia phi. Kane ka jingleh jong phi kan pynduhthiah pynduhshong ia u kat haduh ba un da lah ban wan kai ban ia shem pat ia phi, bad un thaw lad hi ba da kumno ba un ioh wan kai pat sha iing jong phi.

Hynrei khun ia ki kynja khun donburom kum kito ym bit kein ban da leit leh bun wat kumba phi la leh mynta. Ynda u la wan kai sa shisien te sa pyni kein khun ka dak ka jingsngewtynnad bad sngewbha ia kata ka jingwan kai jong u, namar ym lah pule lyngba ia ka dohnud briew ba ki long kiba kumno, ioh ki long kiba shisynpyrkhat haba ym ilong ladep, kata te ka long ka kam kaba jwat lada phin leh khia ha ka jingwan kaba arsien jong u, hynrei lada ki long pat ki briew kiba da pyrkhat da ap peit mian pa mian te ym lei lei, namar kin wad haduh ban da shem ia ka tynrai. Kumta dei ban iaied sha ka liang kaba tip lypa ba ka long kaba kham im barabor, kata ynda haba u wan sa shisien ba phi dei ban leit mih khmat bad ban kren wat tang shikyntien ruh ka la biang. U kynja rangbah haba phi ieid hi ia u, la phi leh sian katno katno ruh tang mar shikyntien bad mar shisynpeit u mar iasngewthuh bad mar ia pei. Te khun wat leit khuslai ei ei shaphang kata nga la tip bad sngewthuh ma nga, phi da peit thik thik un sa wan kai pat hi hangne ha iing jong phi, un sa wan lehse sa shi taiew, ne lada um wan ha kane ka taiew, un wan ha

kaba ar, lada um wan ha kaba ar, un wan ha kaba lai, bad ha kaba saw te da lei lei ruh un nym pep shuh. Kane ka long ka jing-khein bad jingsngewthuh jong nga, bad nga ngeit ba kan long ruh thik kumba nga la ong. Lada kam long kumta kata ka mut ba u briew um shym don jingmut ei ei ia phi, te khun kum ia kata balei phin leit pynsngewsih bad pynkhuslai ialade, kam dei kumta khun?" Ka ruh ka la mynjur bad kohnguh ia ki ktien jong ka bad ka la sngewtynnat bad phuh samrkhie pat na kata ka jingsngewsikhthang kaba kam nangkren briew shuh. Ka la phuh pat ka khmat khrek kumba ju long bad ki jingpyrkhat bashoh bad ba bang shaphang jong u ki la sdang pat kumba kynjat ryngkhat ki kjat sngi halor ka jingdum ba i kumba un sa ther u lapbah.

Kata ka tymmen haba ka kren ei ei ia ka Lyngngaisngi ka ju sngewtynnat barabor ban pyni ia ka kam kaba bha, ban iohi ruh ia ka dur ba sngewbha jong ka, kam long satia kum ka mensuhsyntiew ka ban kren ei ei ha ka, ba kan ioh myntoi shibun ialade, hynrei kumba ka la long ka nongri nongsumar jong ka kumta ruh ka kwah ia ka ba kan poi sha ka lynti kaba bha bad ba donburom. Ka ju kren bad pyni ia ka tang da ki 'tien sngewtynnat, kumno ba kan long kaba ngeit sneng ia la ki kmie ki kpa khnang ba kan poi sha kaba bha. Haba ka la iohi ba ka la phuh samrkhie bad sngewbha, kumta ka la sdang ban kren sa da kawei pat ka sur, ban pynshohlang ia kata ka

jingsngewbha jong ka, ka la ong, “Nga sngewbha bad sngewtynn timer shibun khun ba phi la samla kumne bad ba phi la don ruh kum kine ki jingsngew namar ba ka por jong phi ruh ka la dei, kumba ha ka jingphuh jong u syntiew kin bud ruh ki jingsuhsieng jong ki jingiew-bih, bad kumta ruh ka la dei ka kamram jong nga khun kum ka riewtymmen kaba ieid ia phi kumba ieid ia la ka jong ka khun, ban pyni ban sneng bad ban hikai kumno ba phin ia id ban pynlut ia kane ka por ba kordor tam jong ka jingim jong phi kaba long ka um bad ka ding, ka iap bad ka im jong phi. Kane ka long ka por ba wat ki khun donburom jong ki kmie ki kpa, ki ju klet noh ia lade barabor bad ki poi sha ka lynti jong ka jingjot bad kumta nga sneng ia phi ba phin long kaba khlain ka jingmut bad jingpyrkhat, bad io hi ia kaba shah ha khmat jong phi ba ka long kaba dei ne kaba lait, ba ia kaba dei phin leh bad ia kaba lait phin bret. Kaba nyngkong tam kaba phi dei ban leh ka long ba phin kohnguh ia la ki kmie ki kpa, ki kmie ki kpa barabor ki im sngi ban pynphong ia kata ka pansngiat ksiar halor jong kita ki khun jong ki, namar kata haba ki kim sngewbha bad ki sngewsih ia kano kano kaba ki khun jong ki ki mon, kata ka pyni ba ki la io hi lypa ia kano kano ka jingsniew ka ban sa wan bad ki sngew ba kata ka jingjia ka ban jia halor jong ka khun jong ki, ka long ruh ka ban sa jia ha ka doh bad ka snam jong ki hi. Bunsien ki khun ba dang

khluid ka snam kim sngewthuh ba ka mut
 aiu ba ki kmie ki kpa ki sngewpyrshah ia ka
 mon bad ka jingsngew jong ki khun jong ki
 bad kumta ki ñiewbein bad thom pyrshah ia
 la ki kmie ki kpa, da ki jingjop thiaw jong
 ki jingthala ba shu phyrnai tang ha sla bad
 kumta bunsien ki poi sha ka jingshitom bad
 jingjot, kaba long ka jingiam ka jong ki hi
 ba ki la iuh hukum ia la ki kmie ki kpa.
 Haba ki khun ki mon bad ki ieid ia u
 briew uba bha katno ki kmie ki kpa ki
 phuh mat namar ki sngewthuh ba un long
 kum u khun jong ki hi u ban shimti bad
 sumar hok ia la ka khun jong ki kaba long
 ka doh bad ka snam ka jong ki hi, hynrei
 haba ki khun ki mon bad ki ieit ia u briew
 uba sniew bad ba ki thom pyrshah ia ka
 jingsneng jong ki katno ki kthang ka mynsiem
 bad ki jaw ki ummat, namar ki la iohi lypa
 ia ka jingsniew ka ban sa jia ha la ka jong
 ka khun jong ki kaba long ka mynsiem ka
 jong ki hi. Phi dei ban tip ba ki ummat jong
 ki kmie ki kpa namar kano kano ka daw
 halor la ki khun ka long kaba sniew tam ba
 wat la ki la rkhiang bad ym lah iohi shuh
 ia ki, hynrei ki im bad ki sah kat haduh ban
 pynsiew kylliang pat da ki jingjawummat pat
 kiba arshah halor kita ki khun kiba la pyn-
 jaw ummat ia ki. Kynmaw khun kumba phi
 long ka Lyngngaisngi ka khun ba ngeit sneng
 bad ba thep mynsiem tam jong ki kmie ki
 kpa jong phi, wat klet ban niew kor bad buh
 jingmut ia kata ka jingsneng jong nga".

U Lursympers naduh kata ka sngi ba u wan kai na iing jong ka Lyngngaisngi, ka ja ruh bun ba um lah nguid. Ki jingpyrkhat baroh ki shu leit lut tang sha ka, namar kata ka jingbym wan mih jong ka, ka la pynlong ia u ban pyrkhat ba ka kam don jingmut ei ei u. U la sngew duh jingkyrmen ia kata ka dur babha briew ba kum ka tusbir ba la shon ha ka shadem jong u kaba um lah satia khlem da kynmaw ia ka. Ka dur khmat jong u ka la shu thangiong ngain, u shu dap da ki jingsngewsih bad jingpyrkhat jyl-liew haduh ba ki kmie ki kpa jong u ki la ilyngngoh shibun eh ia ka jingiring ka khmat bad ka jingraikhoh khlem da pang jong u. Kim poi pyrkhat satia shaphang kita kiei kiei baroh bad kumta kiba pli kim tip bad kim iohi ruh, ba ka shadem jong u ka la pdang lut, kaba long ka jingpang bajur tam kaba ym don dawai ha ka pyrthei kaba lah ban pynkoit, lait tang da kata kaba la pynpang ia u. Haba kita ki mied bad ki sngi ki la shu dum sah khlem da shai shuh katto katne por bun jait ki jingpyrkhat ki la wan ha u, hadien hadien u la pynshongnia ia la kata ka jingshem. "Em" u la ong, "Kane ka long tang ka kam bieid ban pynklusai ialade khlem da wad bha ia ka trai bad ka tduh. Haba nga dang shu leit kai tang shisien kumba puh u bsein, kata ruh dei kaba nga shu leit ia pan um, em" u la ong, "Kam dei hi ban mih wat lada ka don jingmut eh ia nga ruh." Kumta hi u la pynsngewbha pat ialade, bad u la kut jingmut ba kum lashai ba un leit kai pat sha iing jong ka khlem don jingsngew ei ei ruh em. *U briew*

haba u la mad shisien u la kham shlur U la kut jingmut ruh ba un leit haduh ban da ia pei bad ia sngewthuh ia ka liem bad ia ka lup. U la ong, "Haba nga la sngewthuh hi ia ka liem bad ia ka lup, te balei ngan leit pynkhuslai ialade wad lada kam peit ia nga ruh, haba ka briew kam mon te la dɛp, bad balei ngan leit sngewleh-rain, ngi u rang leit iew leit hat haba la iadei te la iadei, ha bym iadei te la ia lait, "*U shu kren ba u la sngewbha namar ba u la sngewlait lynti, hynrei um tip uba pli ba lada leit jia kumno re kumno da kumwei pat sa shisien, ba un thiah pang pat sa da ki hnai.* Kumta hi u la phuhmat khrek ba un leit kai pat sha ka kum lashai.

Haba ki ia shongkai ia iathuh-khana ha ieing jong ka Lyngngaisngi, hapteng jong kata ka jingiathuhkhana, ka kyrteng jong u Lursymper ka ju mih man ka sngi ha baroh kita ki taiew naduh ba u wan kai, namar u long u khun donburom uba bha shisha ha ka iaaid ka ieing, ka akor bad nadong shadong, u long ruh u khun ki briew uba da bhabriew shisha shisha. Bun ki ieing donburom ba don khun samla ki ju khmih lynti ba un wan kai ieing kai sha ieing jong ki, hynrei u pat um ju kham leit kai haei haei lait tang ki paralok shynrang, namar u dei u 'riew jylliew jingmut bad 'riew pyrkhat, haba u la ithuh ba ki briew ki mon ia u, u da burom eh ia ki, hynrei um ju sngewtynnat ban shu leit pynbieit kai ne pynsngewsih iano iano ruh haba um don jingmut ne iapmat ia ki.

Kum lashai janmied u Lursymper u la bam la dih dangshai, u la riam la beit bad ynda

la biang ka por u la mih na ieing da kaba sngew-bha. Katba u dang iaide ha lynti u la poi sha ki laiphew ki jait ki jingpyrkhat ba tip kan jia kumno ynda haba u poi hangta. Katba u nang-iaide bad nangpoi kham shajan, u la nang kham suki ka jingjam, namar wat la u la sngew tynggeh na ieing, hynrei ynda u poi kham shajan u la sngew eh kheng. "Ew" u la ong, "Kumno kumta, mynhakato te long kumba nga shu leit pan um artad hynrei mynta pat beit beit ka la paw ba nga leit na ka bynta kata ka kam". Kumta u la pyrkhat artat artat haduh ba un da poi ha phalor, hangta u la ieng ki shkor jreng bad u la sdang thlun ki khohsiew, u la pyrkhat ba un leit ong kumno kein, haba kumta rym-mang rymmang un leit marwei hangta. La un kvnran ruh shano, la un tur ruh shano, u la shu ieng shiphang hangta. Katba u nang ieng hangta, u la peit lyngngoh ia ka jingshai jong ka jingkhangiit bad ia kata ka ieing ba kum kata ka Dulan krem Pubon shong Puri jong ki puri-skam bad ba ha man ki jingshai jong kita ki jingkhangiit ba phyrnai u iohi kumba ka Lyng-ngaisngi ka ieng ha kata ka dur ba bhabriew jong ka. Ha kata hi ka khyllipmat ka dohnud jong u ka la kylla duriaw hin-lyhin. "Shish" u la ong, "Ai kan long katba ka long bad kham bha ia nga ban duh ia kane ka pyrthei ban ia kaba ngan duh kat ia kane ka jingkordor iong ka jingim ka jong nga". Kumta hi u la rung beit shapoh kata ka kut bad u la poi ha jing-khang, u la tied tok tok ia ka jingkhang ba don briew ne em, kumta hi kata ka tymmen ka la

wan bad la plie ia ka jingkhong, ka tang shu plie ka la ithuh ba dei ma u, ka la kren da kaba puh mat, "Rung rung seh ha ieing" u la rung bad ka la ialam sha kamra shongkai. Kumta hi ka la leit iathuh sha ka kmie bad ka kmie ka la wan bad ka la kren tang da ki ktien pdiang sngewbha kiba sngewtynnai suda. Mar kumta hi kata ka tymmen ka la leit iathuh sha ka Lyngngaisngi ba ka la jia thik kumba ka la ong, hangta ki la ialeh sngewbha puhmat baroh arngut ha kyndong ka bym lah shuh ban ong. Kata ka tymmen ka la ong ia ka Lyngngaisngi, "Phi khie leit sha ieing shetja khun, peit ia u kwai u tympew, ka sha ka dud ryngkat bad la ki nongtrei, nga ngan leit ia shongkai lang bad ki, peit kein phi u kwai uba nyngkong ngan wan shim ma nga bad uba ar pat phin wan ai ma phi bad phin leh kunine, wan ha kata ka dur kaba phi hi phi ju long, ryngkat ka dur khmat ba puh samrkhie lehrain, kren, ong — 'Phi wan kai' bad ynda phi lah ai u kwai iaid noh sha ka jingkhong ba phin rung noh, iengshiphang hangta kumba phi sngap khana bad haba u kren ei ei ia phi, shu kohnguh bad pynhap katba u ong, sa leit noh sha la ieing shetja. Ynda katto katne sa wallam sha, ia baroh kiba iashongkai kin wan ai ki nongtrei hynrei ia ka jong u leit rah maphi bad ai ha u, ynda u ong 'wa phi da theh sha' ong 'ngin ia bam aiu ka haba iashong kai ngin ia dih da ine i sha kein' wat leit kren bun kyntien ei ei, tang shu ibiang ka jingai jong phi sa leit noh. Ynda haba phi iasong kwai ynda la lah dihsa phah ai da ki nongtrei bad sa shi

kyntien pat sa wan ai hi ma phi bad leit noh, lehse katta te u la leit. artad hi bad da sngap bha u tang shu ong 'ngan leit noh ho,' sa wan napoh ka pyrda bad sa ong 'phin shu leit noh,' tang katta ka la biang ym donkam ei ei shuh, bad ka la biang hi ia u ba un pyrkhath kumno. Te nga ngan leit ia shongkai noh, bad phi sa leh kumta". Ki la ia shongkai kyrhai tang da ki jingiathuhkhana sngewbha suda, u ruh um shym leh rain ei ei shuh namar ka jingpariah parai jong ka kmie jong ka. U la iathuhkhana ia kane katai ka ban ia sngewbha lang baroh, bad ka Lyngngaisngi ruh ka la leh thik kumba la hikai kata ka tymmen. Te ynda la biang ka por ba un leit noh, u la mih noh nangta na ieing u la ong ba un sa wan kai pat, ki ruh ki la ong "Sa wan kein barabor, katno kaba sngewtynnat haba phi wan kai kumne"

Haba u la mih nangta na .iing jong ka, ka, mynsiem jong u ka la dap tang da ka jingphuh kmen suda, namar kiei kiei ki jingkordor kiba ka mynsiem jong u ka wad, ka la shem hangta, ba kumba ma u u la long, u la sngewthuh bad ithuh shai kdar ba ka ruh imat ka long Baroh shilynter ka lynti u la shu um ka mynsiem tang da ki jingmutdur ba sngewthiang suda. "Pleng ka jing-im" u la ong, "Ka long kaba kordor, kaba bang bad kaba thuang kum ka ngap bad kum ka dud" U la poi ha la ieing u la thiah bad u la iohthiah ha kita ki jingkynoi kiba um pat juh ioh mad mynno mynno ruh ha ka jingim jong u. Ha kata ka jingiohthiah ki la her noh baroh kita ki jingphohsniew kynsha bad baroh shimied ki phuh

phum phum tang da ki jingphuhbha suda. Ka Lyngngaisngi ruh ka la iohthiah lyngngai khlem phohsniew shuh ha ki jingialehkai jong kata ka mied jong kita ki jingphuhbha jong ka. Kumta u la dem leit kai man la ka taiew haduh ba la dap da ki bnai bad kumta ka jingiaieid jong ki ka la sdang ban janai bad sngewthuh ha ki baroh arngut ba ym don ei ei shuh ha ki kaba tam ha ka pyrthei jong ka jingim jong ki, hynrei tang kata ka jingiaieid jong ki. Ki kmieki kpa jong ki ruh ki la sngewtynnai bad sngewbha lang ia kane ka jingialang bad jingiajuh jong ki baroh arngut.

Hapdeng kata ka por ka jingieid jong ki, la don uwei u Syiem uba long u Syiem jong kata ka hima uba shong ha kawei ka nongbah kaba ia jngai shibun eh nangta. Une u Syiem namar ba u long uba dang samla, u la ju poi kylleng ki jaka ha la ka jong ka hima, ha kata ka jingleit jong u ha kawei ka por u la leit poi sha ka shnong ba shong ka Lyngngaisngi bad hangta u la iohi ia ka Lyngngaisngi. Ka jingbha briew jong ka ka la pyniap mat bad pyndon jingmut ia u bad haba u la wad bad kylli shaphang jong ka, u la shem ba dei ka khun ba khraw bad ba don burom bad ba ka dei ruh ka khun jong u briew uba u iaithuh ithaw bha, kumta u la buh jingmut thriang ban shongkurim ia ka.

Hadien katto katne por, ha kawei ka mied u Lursympet u la ioh sngew ia ka khubor ba la don uwei u briew uba khraw uba don jingmut ia ka Lyngngaisngi. Kata ka khubor ba don ba iapmat ia ka Lyngngaisngi ka la pynkyndit bad pynshaiong ngain ia ka mynsiem jong u bad kumta

hi ha kata ka mied u la phohsniew da peit bad phohsniew da thiah baroh shimiet namar ki jingkyndit bad kulmar mynsiem jong u na ka bynta ka Lyngngaisngi, ki jingphohsniew kiba um lah pyrkhat shuh ha lade ba kan jia kumno ia u. Ha kita ki jingphohsniew, u la iohi tang ki jingiohi kiba sngewsih suda. U la sah ha ka lyngngoh ba kum kita ki jingjia bad jingphohsniew jong u ki la wan jia ha u, ha kum kata ka por kaba u dap tang da ki jingpyrkhat sngewbha suda ha man la ka khyllip mat. Kine ki jingjia ki la shon jur ia ka mynsiem jong u ba aiu kan sa jia halor jong u.

Hadien katto katne por jong kata ka jingshationg pyrkhat bad kata ka jingphohsniew jong u, u Lursymper u la leit kai sha ieing jong ka Lyngngaisngi kumba u ju leit kai barabor. U Lursymper u la sdang' ka jingiathuhkhana kaba kham sngewtynn timer ban ia kiwei kiwei pat ki jingiathuhkhana kiba u la ju iathuh ha kiwei kiwei ki por, kata ka la long ba u la sdang ban ring jan ia ki ktien kynnoh jong ki sur ka duitara namar ba la dap shiteng synfia. Hapdeng jong kata ka jingsngewtynn timer bathiang ngai ngai jong ki jingiathuhkhana, hamar kata ka por u la kynmaw ia kata ka khubor sngewsih kaba u la iohsngew ba don u 'riew radbah uba la iap 'mat ia ka Lyngngaisngi bad ia kata ka jingphohsniew kynsha jong u kaba u la iohi ha kata ka jingphohsniew ia ka jingiohi kaba lehse ka lah ban long ka kynja dak ka ban wan jia ki jingjia ba sniew hapdeng jong u bad ka Lyngngaisngi. Kane ka jingpyrkhat bad kata ka jingphohsniew ka la pyn-

sngewngiew ia ka mynsiem jong u, ha ka jing-sngew ba la kumno kumno ruh ba ka don ei ei ka jingmut halor jong kata ka jingiohi mied jong u.

Ha ka dur khmat ba sngewsih u la phai sha ka Lyngngaisngi bad u la ong "Ka jingim jong ngi ha kane ka pyrthei ka iaïd halor ka por, kat kum ka por kumta ruh ngi dei ban sngew bad kat kum ka por kumta ruh ngi dei ban sngewihuh, lynda kumta ka lah ruh ban iehnoh ia ngi namar ha ka lynti jong ka pyrthei mano ba lah ban tip ba aïu ka ap ia ngi hapdeng kane ka khyllipmat. Ka jingim ka long tang kum ka jingphohsnew ba tang shu kynjat shai ka la shu jah noh sha rngai bad kiei kiei ki kam ki jong ngi ki long tang kum ka syrngiew ba tang hapdeng ka shi khyllipmat ym lah shem shuh ban wad. Katno ka jing:tynnad jong ka jhad ba king ha sla duriaw la ki lama ba kaweh ba ka iaïd sawdong pyrthei, hynrei bunsien katba ka nang-iaïd sngewbha ka la kvnduh ryngkhat ha u maw-siang uba la ap lypa ia ka bad kumta ka la shu pait bad ngam noh sha trai duriaw bad kut noh ki jingiaïd jong ka baroh. Ka pyrthei bad kiei kiei baroh ki long tang ka lyer ba khlem jaka shongneh. Ma nga bad ma phi ruh ngi ia per lang haneta, nga nga long kum u ngap bad ma phi pat phi long kum ka thapbalieh ba ia shad sngewbha ha u juh u syntiew, haba uta u syntiew u la hap bad u la tlor ryngkhat noh, kumta ruh u ngap un her noh sha la sympa bad ka thapbalieh kan her noh sha la ki sla dieng, kiei kiei baroh ki long kumta kong Lyngngaisngi. "Balei phi peit

lyngngoh Kong Lyngngaisngi". "Nga sngap namar ba nga sngew" La ong ma ka, "Ba u ngap un sa her noh sha la sympa bad ba ka thapbalieh kan sa her noh sha la ki sla dieng bad ba la shai pat shano u ngap un sa her noh bad shano pat ka thapbalieh kan sa her noh, haba uta u syntiew jong ki umbathiang ba ki ju ia bam man ka step, u la jlop bad la tlor noh Nga sngewkynduh ba kita ki ktien ki la mih na ka rymmiang shyntur jong phi ban pynkthang ia ka dohnud jong nga".

Haba ka Lyngngaisngi ka la jubap ha u ia kita ki ktien, u la shu sngap ha ka dur pyrkhath jylliew 'mat sngewsih. namar kita ki ktien jong ka bad kita ki jingphohsniew jong u. "Kong Lyngngaisngi", u la ong "Ai ba ngin ym klet ia kiei kiei baroh, na ka bynta jong nga bad jong phi, wat lada ki jingdung ngak ia ka dohnud jong nga ki long kumba siat da u nampliang u ban sop sarang ruh ia ka dohnud jong nga." U la kren ia kine ki ktien ha ka dur khmat sngewsih kaba haduh katta katta. Ka Lyngngaisngi haba ka la sngap bad la peit ia ka dur khmat jong u, ka la shu lyngngoh ngain, bad ka la kren kyndit ia u, "Bah Lursympet, balei phi kren kumta, balei phi sngewsih ia ki ktien jong nga?" "Em", u la ong, "Ki ktien jong phi ki thieng kumba thieng ka ngap, hynrei hapdeng jong kita ki jingthiang bad iingbang, kawei pat kaei kaei ka ban khia ia nga, kaba nga hi ruh ngam lah ban ong ba ka shu ban khia kai ne kan ban shisha ia nga". "Iathuh seh" la ong ka Lyngngaisngi, "Ka jingkhia aiu kaba kum kata, haba ngi ia shongkai ban ia phuh

samrkhie te pynban ngin iashongkai ban iashong-sngewsih?" "Nga ruh nga mut kumta, Kong Lyngngaisngi, ban iashongkai bad ia phuh samrkhie bad phi hynrei ngan leh kumno haba ki jingjia ki wan jia ban ban khia ia ka dohnud jong nga, ka jingbankhia ka long tang halor jong nga bad kumta nga sngew ba ka long ka bym dei ban iathuh ha phi bad ba phim dei ruh ban tip kum ia kata kaei kaei kaba lehse kan pynsngewsih ruh ia phi. Ia ka nusip jong nga bad jong phi la thoh lypa, bad kumta ngi dei ban sngewhun, wat lada ka long kaba sngewbha ne kaba sngewsih kthang. Ka pyrthei barabor ka long ka bym ju thikna, mynta ka kumne hynrei mano ban tip pat ia kaba lashai."

U Lursympet haba u la kren ia kine ki ktien u da i kumba un tlör ki ummat jong u namar ki jingpyrkhat jylliew than jong u shaphang kata ka khubor sngewsih bad kata ka jingphohsniew jong u. "La mied Kong Lyngngaisngi", u la ong, "Ngan shu leit noh shwa", "Em", la ong sa ma ka, "Kumno phin shu leit noh, phi dei ban iathuh ka jingjia aiu kaba kum kata, kaba phi shu iathuh kyndit kyndit ha nga, kaba ngam lah sngewthuh satia". Ka briew da shisha ka la pait ka dohnud, namar ka la pyrkhat thik ba kata ka jingjia ka la dei ba u la iaieid ne pynbor kiba ha ieing ba un shongkurim noh iano re iano". "Em" Kong Lyngngaisngi wat sngew ei ei, kaba nga da ym sngewbit eh hi kein ban iathuh ha phi". "Niuma", ka la ong, "Ka bit hi kumno kumno ruh bad ngam kwah hi ruh ban tip kum ia kata ka jingtip kaba ngam dei ban tip", Ka la bitar

bad jaw ummat artad brib. “La mied,” ka la ong, “La biang hi nga tharai ba phin leit noh, phi uba dang bun tyngkong ieing ban leit bad uba dang bun ki jingkhong kiba ap ryngkhong ne kiba khong da u wang, nga ialade te haba phi la leit noh ngam don ei ei shuh, beit na kaba ngan leit thiah noh”. “Kong Lyngngaisngi” u la ong, “Balei phi kren kumta, phi tip ba ki pyllewmat jong phi haba phi iaid ha lynti ki dang shat bad iohi ia u phlang, ki dieng ki sied bad ki syntiew ki skud kiba mih bad long harud lynti, hynrei phi tip pat ba ki pyllewmat jong nga ki long ki bym lah ban shat ne iohi palat na ka lynti kaba nga dei ban iaid. Nga don ka jingsngew Kong Lyngngaisngi ba wat lada ngam sngewdei ban iathuh ba ka long ka kam kaba nga hi ruh ngam lah ban sngewthuh hynrei ngam banse ban khlem da iathuh ia ka daw balei ba nga la kren kumta. Ngan iathuh ia phi, nga la kren ha phi kumta namar nga la iohi ha kata ka jingiohi mied jong nga kiba long kita ki jingiohi kiba ngam lah ban shemphang bad ngam lah ban sngewthuh ba aiu kan jia ia kane ka jingim ka jong nga, wat lada shisha nga shem bad iohi ha kata ka jingiohi sngi jong nga ia ki jingshadrmen jong ka mynsiem jong nga. “Ha ka jinglong kynthai ba lyngkot jingmut bad jingpyrkhat jong nga”, la ong ka Lyngngaisngi, “Nga la iaid jngai palat ia ka jingmut jong phi wat lada haduh mynta ngam da sngewthuh bha ia kiei kiei ki jingkhong bad jingmut jong phi, hynrei na ki sur ktien bad ka dur bashisha jong phi, nga kloi ban ong, map ia nga, namar ba ngam tip ba kata jingiohi mied jong

phi ka la ban khia ia phi haduh katta, ngan da la tip ngan jin da la sngewdiaw bad ia khuslai lang bad phi. Ai ba ki jingkhuslai bad jing-sngewsih kin ker sawdong ia nga, hynrei kin aym lah jop ia nga haba nga don ryngkat bad phi, kumta ruh nga sngew bad nga ong ha phi balei phi leit khuslai namar kata ka jingiohi mied jong phi, haba phi don kata ka mynsiem shadkmen halor kata ka jingiohi sngi jong phi, namar kata ka jingiohi sngi jong phi ka dei ka jingiohi ba shisha bad kata ka jingiohi mied jong phi ka long tang ka jingiohi rngai.”

U Lursympu u la peit sha ka bad u la ong, “Ki ktien jong phi ki long kiba dei kat kum ki jingiohi jong phi, phi phim tieng ei ei ia kano kano ka jingjia haba phi don ryngkat bad nga bad nga ruh ngam tieng ei ei ia kano kano ka jingjia jong kane ka pyrthei haba nga don ryngkat bad phi, hynrei lehse hapdeng ka jinglehkai sngewbha jong nga bad jong phi ka wan lap ka um saw bah bad ka kit ia nga sha shilliang wah bad ia phi pat ka kit sha kawei pat ka shilliang wah bam lah kot shuh ki khmat ki jong nga bad jong phi, aiu hangta ia ngi kan jia?”. “Balei phi leit pyrkhata ia kaba sniew”, la ong ka Lyngngaisngi. “Barabor ngi dei ban pyrkhata ia kaba bha, nga hi ngam ju pyrkhata ba kano kano ka jingjia ba sniew kan wan jia halor jong nga, hynrei nga ju pyrkhata sngewtynnata tang ki jingjia ba sngewbha ba kin wan jia halor jong nga”.

Hapdeng kata ka jingiakren ia jubap kyl-liang jong ki, teng teng ki la ia phuh samrkhie bad teng teng pat ki la shu ia sngap jar baroh

arngut. Kumta ki la shu ia wiat rymmuin baroh arngut ha ka jingsngewtynnad bad jingsngewphuh ka mynsiem kaba ym don jingbatai ha ka pyrtnei kaba lah ban batai. U Lursymperruh u la klet noh ia kata ka jingiohsngew bad kata jingiohi mied jong u.

“La mied Kong Lyngngaisngi”, u la ong, “Ngan shu leit noh shwa”. Ka por ka la iaidd jngai bad la mied shisha kumba u la ong namar lajan dap shiteng synia hynrei kiba pli ki la klet noh ia ka mied hangta ha jing-kynud jong baroh saw tylli ki saimuka jong ka Duitara Ksiar. “Ka mied kaba ju mied hi”, ka la ong. “Em” u la ong, “Ngan shu leit noh shwa, wat la shisha ka dei kata kaba phi ong ma phi ruh”. Ba la mied shisha, kumta ka la shu wiat samrkhie muin, bad u la ieng artad bad ka la leit on haduh jingkheng. “La mied shisha du”, ka la ong, “Lehse phi sngew kumno kumno”. “Em” u la ong, “Ym dei la mied namar ka mied kaba ju mied hi kumba phi la ong bad kumta kam pher ei ei ai kan mied namar ha nga hi ym don mied bad ym don shai baroh kaba shai suda, u tei u bnai bad kitei ki khlur shibneng kin synran bad don ryngkat bad nga, koit wat sngew ei ei”. Kumta u la leit noh bad kata ka mied ka la lut da kaba shu um kumba um ka ior ha ki kjat sngi balung jong ki baroh arngut bad kumta ruh ka sngi ka la wan bad sa ka mied pat ka la poi bad kumta ki la leit ki taiew, ki bnai hapdeng kita ki jingmad ba nang kham bang ha man la ka sngi jong

ka jinglongsamla jong ki.

Naduh kata ka por ba uta u Syiem u la iohi ia ka Lyngngaisngi u la leh burom shibun ia uta u kpa jong ka, bad ba u ioh ka lad kaba biang ruh ban ioh leh kumta namar ba uta u kpa jong ka kham bunsien u ju sah ha kata ka shnong ba shong ma u, namar ki kam ki jam jong u. U ruh haba u Syiem u la leh burom kumta ia u, u la leh burom kham arshah pat ia u ban ia kaba u ju leh, hynrei um shym poi pyrkhath ei ei ba u don jingmut ia ka khun jong u.

Haba ki la ia long kumne katto katne por, uta u Syiem u la ong ha u ba u kwah bad sngewtynnat shibun eh ba un leit kai sngewbha sha shnong jong u, namar ba u ong ba u la wan shisien, u shem ba ka shnong jong u ka long kaba sngewtynnat bad kaba itynnat shibun eh. U kpa jong ka Lyngngaisngi ruh u la sngewbha shibun ia kane ka jingong jong u. Haba ki la ia shongkai kumta kham slem, uta u Syiem u la kren siat ia kane katai ban pynsngewthuh ia u kpa jong ka ba u itynnat ia ka khun jong u, u ruh ynda haba ki la ia kren katto katne u la sngewthuh ia kata. Katno u kpa jong ka Lyngngaisngi u la sngewkmen bad sngewtynnat haba u la ioh sngew kum kata kaei kaei ka jing-iohsngew ba sngewtynnat, hynrei um da buh jingmut eh ia kata namar ka dang long tang ka jingiakren sngewbha bad ia kren sngewtynnat.

U kpa jong ka Lyngngaisngi u tip bha ia

ka jingwankai jong u Lursympers ha ieing jong u barabor bad u hi ruh u da sngewbha shibun eh ia kane ka jingwan jong u namar ba u dei u khun donburom. Wat la ka la long kumta hynrei um shym da pyrkhat eh ba ka jingiaieid jong ka khun jong u bad u Lursympers ka la long haduh katta katta, u dang shu tharai ba u dang shu wan kai samla kumba ju wan kai lem ki para samla baroh. Bad kumta u la shu ngeit ha lade ba ym pat don jingwit jingwai ei ei. Ha ka jingshisha kumba u hi dalade u la ailad ia la ka khun bad kiwei pat u la dei ban pyrkhat ban da kynjoh ktien ia la ka khun shwa ba un kmen ba un ioh pyrsa kurim Syiem, hynrei ka burom bad ka spah pyrthei ka la tyllap im im peit peit, ba wat la kumno kumno ruh ba dei ban ioh ia ka.

Ka Lyngngaisngi da ka jingsngewthuh ba ki kmie ki kpa jong ka ki sngewtynnad bad sngewbha ia u Lursympers bad kumta ruh ka la bret tylli ia la ka jinglongsamla ba shisha jong ka halor jong u, kumta ki kam ki ia iaiaid la ki jong ki jong ki jingsngewthuh bad jingpyrkhat wat lada ka jingiaieid ia burom jong ki shi khun shi kmie shi kpa ka don hapoh kawei ka mynsiem bashisha.

Ynda dap kumba shibnai hadien kata ka jingiashem ba sngewtynnad jong ka Lyngngaisngi bad u Lursympers, kumba u kpa jong ka Lyngngaisngi u la iathuhlypa ha la ka kmie bad la ka khun ba u Syiem un sa wan kai sngewbha sha kata ka shnong jong ki, bad

kumta ruh uta u Syiem u la wan. Haba uta u Syiem u la poi ha kata ka shnong, ki la leh burom ia u kum ka burom Syiem ba u wan peit ia la ka it ka hima, u la sah hangta kumba shitaiew ne bad bunsien ruh u la ju leit kai sha ieing jong ka Lyngngaisngi. Shwa ba un mih noh na kata ka shnong u la leit ban ia khublei ia ka Lyngngaisngi bad ki kmie ki kpa jong ka. Ki la leh burom shibun eh ia u, ka Lyngngaisngi ruh ka la wan ia khublei ia u kum ka burom ia u Syiem ha la ka jinglui-lui jingmut khlem da don kano kano kawei pat ka jingpyrkhat, u ruh u la sngewbha bad sngewtynn timer shibun eh ia kata ka jinglehsbun bad jinglehburom jong ki.

Haba u don hangta ha shnong um shym pynpaw ei ei ba u don jingmut ia ka namar u ngeit ba ki la tip hi, namar ba u la lah phawer lypa ha u kpa shwa ba un wan sha kata ka shnong. Ka jingiapat jong u ia ka khamtam ba u la iohi hajan, kaba um lah shuh ban ong, hynrei la katta ruh um shym da sngew eh ha la ka mynsiem ia kane katai, namar ba u ngeit beit beit ba u tang-shu phah kylli ka la ngeit. Kumta hi um shym da sah slem ha kata ka shnong, tang kumba katto katne por u la leit noh da kaba sngewtynn timer bad sngewbha.

Hadien kata ka por, u kpa u la iathuh ha ka kmie ia kiei kiei baroh kiba u Syiem u la kren ha u ba u itynn timer bad u don jingmut ia ka khun jong ki bad ba ym slem hi ruh ba ki kin sa ioh khubor shaphang kata. Ka

kmie ka la shu sngap jar kam nangkren shuh. "Kpa" ka la ong, "Nga te nga sngewbha eh ia kata, hynrei nga sngewsih ban ong ha phi ba kumba phi hi ruh phi la tip ba ito i hep Lurmsympet i ju wan kai hangne, bad kumta nga ruh nga la leh sngewbha bad nga la pynjuh ia i, te ngan ong kumno nga tieng kpa ba ioh kane ka khun jong ngi ka la don ktien ei ei bad i, nga iohi ruh ba imat ka la long hi ruh kumta, namar kumba nga la ong bad kumba phi phi la leh sngewbha ia i bad kumta nga ruh nga la ailad ia ki baroh arngut". "Em" u la ong, "Ia kaba wan kai te uno uno u samla ruh u wan hi, hynrei kin leit iadon ktien aiu phi kum ka khun jong ngi kaba tip sngi, khlem da kynjoh ia ngi ki kmie ki kpa". "To seh kpa, haoid ia kata te kam nud shisha, hynrei haba ki la iaieid yn leh kumno ? Khamtam ka long ka khun marwei baieid bad kohnguh jong ngi". "Em kmie, ngam ngeit ba kan long kumta, ka khynnah ruh kaba ym pat i don jingmut pynngam jylliew than baduh katta katta, ia kaba ka shu iaieid, rat ka khynnah shu kren kumto kumne ka la sngewbha". Em kpa nga tip ma nga seh kaba don ha ieing synia sngi ba nga la iohi lut ia kiei kiei ba roh, phi lei lei iba tang ka leit jingleit iba ha ieing ruh bun ba phim ju kham don". "Em phi kmie la phi kren kumno kumno ruh nga hi ialade te ba ngan kyrngah hi kat ia u Syiem lada u phah kylli, te da lei lei ruh ngam sngewnang" To ieh kpa ba ngan shu kren

eh ma nga ia kata kumno, ka khambha ba ngin dà ia kylli markhmat ia ka ba lada ka ong kumno kumno ruh ngin ia ioh pyrkhat". "Em" u la ong, "Ngin sa khot seh ia ka khun, hynrei kaba tam ba ngin ia pyrkhat shwa ma ngi, nga hi te nga da mon bad hun ka mynsiem ban pynngeit ia u, kat u Syiem un phah kylli hato un sngew kumno ban yn nym pynngeit ia u. Katno ruh ka long ka burom ia ngi bad ia ka khun jong ngi haba ioh ban pynshongkurim bad u". "Haoid kpa, kaba kren ma phi baroh ka long kaba dei hynrei tip kein, namar ka khynnah ruh kumba phi tip ka long kaba kohnguh hynrei pat ka long kaba shisha bad kaba shi jingmut". "Kam pher ei ei kmie kata kaei kaei baroh, tang ba ngi la iabeit bad nga bad phi kata hi ka la biang, namar wat lada ka ong kumno kumno ruh ngin pynbor ia ka, kam rat da kyrngah hi ia ngi". "Nga ruh kpa nga sngewbha bad nga da mon eh hi kein ban pynshongkurim bad u Syiem lada ka lah ban long, hynrei kat kum ka jingpeit jong nga te la eh, ka jingiaieid jong ki imat kaba la long haduh katta katta, kumba ngi hi ki kmie ki kpa ngi la ai mon bad ai lad ia ki". "To seh kmie tang ba la iabeit bad nga bad phi ka la biang, ngi lah hi ban pynkohnguh ia ka. Kat u Syiem un phah kylli balei ngin nym pynkohnguh bad ban ioh pyrsa kurim kat ia u naci lah ban ioh pat kat kata. Mynta ynnai ia pynpaw ei ei ha ka, tang ba da peit da sumar bha ia ka naduh mynta, te ynda u

la phah kylli ngin sa khot ia ka ryngkat bad ngi". U kpa u la tip bad la sngewthuh ia kaei ba ka kmie ka la pynsngewthuh ia u, hynrei ka jinglong briew ka long ka basniew haduh katta katta ba bunsien ki briew kiba ngi ju shaniah barobor, ki kylla 'riewkai noh namar ka jingthaba than jong ka burom bad ka spah pyrthei.

U kpa jong ka Lyngngaisngi u long u briew uba shisha u bym ju kylla bad u ba da sngap ia kania, uba shwa ba un leh ia kaei kaei u da pyrkhat ia kaba dei bad kaba lait, hynrei ha kane ka wat mynta u la klet noh ia la ka burom, u la klet noh ia kata ka jinglong bashisha jong u, u la klet noh ia ka lok, u la klet noh ia la ka khun bad u shu shad kmen marwei marwei halor ka burom bad ka spah pyrthei kaba shu hap hi halor kata ka kupar'mat jong u. Um nud wat ban iakren than bad la ka lok lane ban iathuh ha la ka khun namar u sheptieng bad u kiuh kep-kep ba ioh u duh noh ia kata. Kane ka la shongkulaimon ha bun phew-spah ki mynsiem 'riewblei jong ka pyrthei ban pynjotthiaw bad pynjawummat kylla ia ki ha kaba khadduh. *Ka burom bad ka kwah spah jong u briew khlem ka lynti kaba dei kam ju lah ban pynsuk mynsiem ia u briew. Ym don hok bad ym don jingsuk ban len ia kaba ka dohnud ka la tip.*

Ki khyllip'mat jong ka Lyngngaisngi ki dap tang da ki jingphuhbha khlem jingphohsniew pat ne shuh ia kiei kiei ki syrngiew

baiong jong ki sngi bathiang jong ka jinglong samla jong ka. Baroh kiei kiei kiba phai sha ka ki dap da ki jingphuhsamrkhie ba kam ju ngiah shuh ban phuh sammut halor jong ki. *Ka jingbhabriew ba dap lut, shano ba ka mut, ym don ba lah batai.* Kam pher ai ba lashai ka phet hynrei mano ba lah ban klet ia kata ka khyllipmat ba kordor jong ka. Kum u syntiew ba icwbih jong kata ka por jong u, ka Lyngngaisngi ruh ka den ha kum hangta, ka la iohi ia ki phlang ba jyrngam ba ki shad ha ki jingbeh jong ka lyer, "Shad ko phi ki phlang ba jyrngam" ka la ong, "Ha ki jingbeh jong ka lyer bajem jong phi, phi ki dieng ki sied, ki syntiew ki skud ruh to shad hun ha la ki por ba kordor jong phi" Muin, ka wiat samrkhie rymmuin marwei, shano ka mynsiem jong ka ka her, la shisha jar jar kam shym iathuh, hynrei sha jngai sha bun tylli ki lyndet jong ki lum ka la sam, lyngba jong ki ka la wiat rymmuin halor jong u Lursympet. "Ko jinglongsamla jong nga" ka la ong, "Hangne pha don mynta bad shano phan khlad pat na nga. Kam pher eiei wat lada ngam lah shuh ban wad ia pha ba shano ba pha la her noh, hynrei ai ba ia kiei kiei kiwei pat ki jong kane ka pyrthei ngan klet, hynrei ia pha ngan nym klet shuh da lei lei ruh". Hapdeng kita ki jingsngewbha jong kata ka por samla jong ka ka la um ha ki jingsngew kumba ym don jingiap shuh. Ka shu dap tang da ki per syntiew kat shaba ka phai bad ki shu dap tang da ki jingiewbih kat

shaba ka iew bad kumta ruh ha man la u syntiew bad ha man la ka jingiew ka iohi ba u don ryingkat u Lursymper.

U ta u Syiem um shym don jingpyrkhat ei ei ban don kano kano ka jingartatien shaphang jong ka Lyngngaisngi bad kumta u tang shu poi ha shnong hadien katto katne sngi u la phah briew ban phah kylli ia ka. Haba ki briew u Syiem ki la wan. kumta ki kmie ki kpa jong ka Lyngngaisngi ki la ia jubap ba kin sa pyntip sa kumba artaiew ne.

Tang shu mih kita ki briew Syiem nangta na shnong baroh arngut shi kmie shi kpa ki la khot ia la ka khun bad ki la iathuh ha ka ba u phah kylli u ta u Syiem ia ka, bad ki da leh sngewbha bad pynkbih ia ka haduh katta katta, ki ia ong ha khmat jong ka "Kane te katba ngi da ioh khun shisha te khun kat u Syiem em phin ioh ka nusip jong ngi hi ki kmie ki kpa kumba phi long ka khun tipsngi jong ngi." Hynrei ka Lyngngaisngi shi kyntien ruh kam kren ka shu sngap, ynda katto katne por ka la ong, "Em phi nga hi ngam pat sngewdonmon ban kohnguh iano iano ruh mynta namar ba nga dang sngew khynnah ialade". Hangta baroh arngut shi kmie shi kpa ki la kren da ka ktien kaba jai-jai da kaba pyni shibun ki daw ia ka jingbha jingmiat bad ia ka burom kaba ki kin ioh, hynrei katno katno ruh kim lah pynkohnguh satia ia ka. Ka kyrngah ngang shi ngang ka khlieh, haduh ba ki la ia lyngngoh hi ngain.

U Lursymper ynda hadien shi taiew, u la shu bna na ka khlieng ka tyngab ia kata ka jingphah kylli u Syiem ia ka Lyngngaisngi, kumta u la khiih kulmar ka mynsiem, ba kat u Syiem un phah kylli lehse kan kohnguh pynban hynrei ynda hadien hadien u la palei pat ka mynsiem namar u pyrkhat bad um tharai ba kin pynkohnguh ia u kumba ki hi ki dei ban pyrkhat ia kaei kaba ki la pynjan than bad u bad ba ka hi ruh kan nym ngeit da lei lei ban pynkhein ia ki juban kiba ka la iadon bad u. Hynrei la kumta ruh um hun ka mynsiem, u la leit kai sha ieing jong ka kumba shu leit tynjuh kumno kan long kata ka kam. Haba u la poi ha ieing jong ka, u la rung ha ieing bad la don ki kmie ki kpa jong ka ha kamra shong kai. Ka Lyngngaisngi hi naduh ba ka la mih ktien shaphang uta u Syiem kam ju leit shuh sha kamra shong kai lynda ki phah khot. U la ia shongkai bad ki slem slem, ki leh burom ia u kumba ki la ju leh, hynrei ka la pher shibun ka rukom leh jong ki kim riap-riap rop-rop shuh kumba u la ju leit kai nyngkong, ki la leh kham jyntuin ka ktien ka thyllied, hangta u la sngew artatien shibun ia kata ka jingleh jong ki, ynda u la shongkai kumta katto katne por u la kylli ia ka Lyngngaisngi, "Oh ki ong mynta kato kam kham lait shuh phi hep ba kan leit shano shano ba ka bun kam eh". Tang kumta hi u la kum bathapbieid um nangkren shuh kumno kumno ruh, bad tang katto katne por hi u la shu mih noh nangta na ieing.

U Lursymper u tang shu mih nangta na ieing jong ka Lyngngaisngi u la shu long kum u

babieid um nang pyrkhath shuh balei ba ki leh ia u kumta bad balei ba ka Lyngngaisngi kam wan mih satia kumba ka la ju leh. Hangta hi u la duh jingkyrmen ba ki la shukor ia u. Ka donnud jong u la kum ba thlieh, bad ka jingbitar jong u ka la kiew ha ka shynrong khlieh. "Lyngngaisngi" u la ong halade, "Ka dur bha briew jong phi ka dap lut shi pyrthei jong nga bad ka iai tyngshain man la ki jingjam jong nga, ki ktien bathiang jong phi kim kut noh tang ha ki thliew shkor jong nga, hynrei jngai jngai ki iaid. Ia ki ktien babang bad bathiang jong phi, ngan nym klet shuh bad ngan set synduk ksiar-tala khadar shabi. Ia ka dur babhabriew tam jong phi ngan iai kynmaw khlem da klet shuh bad ia ka jingiewbihtiang jong phi ngan iew khlem da ngiah shuh. Nga long uba shisha bad phi long kaba shisha, kumta ka jingiasoh ki kynjri ksiar nylla ba khlem ai pain kin nym lah ban dkut ne kin nym lah shuh ban jah noh lano lano ruh. Kumta nga la long bad kumta ruh ngan iai long kumba ka pyrthei ba shisha jong nga bad jong phi jar-jar bad jai-jai ka la rwai ba ngin iohtthiah suk mynsiem jai. Hynrei lada ia kum kata ka jingshisha phi nud ban shukor ban pynkylla dypei noh, Shish ngan leh aiu kum ia pha ka dur bleithaw ngan bret sha khyndew un jliah u ksew" U da jaw ummat rangbah artad brib. Ha la ka jingshisha bad jingthnam mynsiem u la pynshongnia bad pyrkhath rangbah halade ba haba ka pyrthei hi ka shah kumta ba ai kan long katba ka long.

Ka Lyngngaisngi naduh kata hi ka khyllip-

mat ba ki kmie ki kpa jong ka ki la pynbor ia ka ban kohnguh ia u Syiem bad ba ka imat ba kim aili ia ka wat lada kam kohnguh katno katno ruh, ka mynsiem jong ka ka la dap da ka ki jingsngew-sih kthang bad ka la tlor ki ummat bad mied la bad sngi. Ka la kren ha la ka mynsiem, “Balei sha i mei bad i pa ki la leh ia nga haduh katne”? Ka la pyrkhath ia u Lursymper bad ia ki juban lak juban klur kiba ka la iatheh bad u, ka la shu pait ka dohnud thar. “Toi” ka la ong, “Kam shym dei ka mon marwei jong nga ba ngan long bad ba ngan leh kat kito kiei kiei hynrei ryngkat i mei i pa, te balei ia nga haduh katne”? Ka la kynmaw lut ia kiei kiei kiba la jia ha kita ki sngi basuk bad ba kordor jong ka bad u Lursymper, ka la sngew ba ki la long kum ki jingphohsniew ba shu kut noh tang shu sdang kynjat shai. “Shi” ka la ong, “Ka pyrthei aiu kum kane mynhynnin kumto mynta pat kumne. Ngam pat ju mad ia ka jingong kaba ong ka pyrthei ba khuslai bad sngewsih, hangne mynta te pleng nga la mad”. Ha kum kine ki jingsngew, marwei marwei ka la iam bad ki ummat kthang ki la tuid halor ki rengngab jong ka. “Kam pher ei ei” Jar jar ka la kren, “Ai ba ki jingjynjar kin long halor jong nga, hynrei ngan bat ia ka jingshisha”. Ka la iohi lypa ba aiu ki kmie ki kpa jong ka kin leh ia ka, bad kam lah ban batai kaba kumno ka jinjar kan wan, namar ba kan nym kohnguh ia ki da lei lei ruh. Ka jingsngewsih kthang jong ka haba ka la pyrkhath pyrkhath, ba kumno kan jia bad kan long kata ka jingiaieid ba shisha jong ka bad u Lursymper hadien ba kine kiei kiei ki la

jia, kumta hi kam sngewthuh shuh sa tang ki ummat ki shu flor.

Hadien katto katne por u Lursymper u la phah ktien jar jar sha ka u la ong “Nga la wan kai ha ieing jong phi ha kine ki sngi, nga la iashong kai bad i mei i pa jong phi hynrei ngam shym ia kynduh bad phi, nga shu ngeit ba phi bun kam than. Koit kam pher ei ei dang bun kaba shadien. Nga iohsngew ka pah ka nam ka khlieng ka tyngab ia ka shnong ka thaw, ngam tip ba ka dei shisha ne ba ka shu pah jait badei ka por riewhadem. Kano kano ruh kaba bha, namar ka jingim ha ka pyrthei ngin ia wad ia kaba bha. Ia u syntiew uba phuh itynnat bad iewbih, baroh ki ia iew bad baroh ki ia kwah bad uba kham ioh ia uta u syntiew bunsien u dei uta uba shu irhah, namar haba u la ikwah bad um lah ioh ne kot kynjoh ban kheit, bunsien u shu kawang da u maw ha ban da dei bad da hap, hynrei uta uba da itynnat, da kwah bad da ieid shisha, un nym shu kawang ne kdiah kat na ba lap, hynrei un da kiew suki ruh jai, haba u la ioh bat ruh un da peit bha nangno ba un kdiah ba ioh u duh noh ka jingitynnat bad ka jingiewbih jong u. U ba ioh ia uta u syntiew uta u dei u trai namar ym dei ka kper jongno jongno ruh hynrei ka dei ka lawbah. Ia ka ktien shu kren bad ka mat shu peit mano ban da salia eh u khyllung u khynnah ruh u ba kren uba peit suda. Nalor ka spah bad ka burom tharai ym don kaba tam ha kane ka pyrthei, ki bym peit ia kata lehse ki dei kiba bieid, namar ha ka, baroh kiei kiei ki shong lut. Bunsien ki jingshisha ki ju kylla jingia-

thuhkhana puriskam kai, balei ngin leit sngewphylla haba ka pyrthei barabor ka ju long kumta. Ka jinglong hok bad jinglongshisha kham bunsien kala kylla long ka nongleh than hynrei yn leit sngew aiu ia kata haba ka ju leh lem hi kumta. Ka jingiohthiahsuk kaba kynjai ha la ka palong kaba skhem lada ka khein bad ka kylla ruh kam pher ei ei, namar shisha ngin hap bad ngin iap hynrei ngin iap ioththiah suk kynjai hi kumba ngi la ioththiah. Ka jingim ha ka pyrthei ka walam la ka jong ka jong ka nusip, ban lei ngin leit bishni ia kiba heh la ka kuparmat, namar ka jingim katba ka nangkhiih pynpisa katta ka nang pynsuhsat ialade. Wat lada ka long bieid hynrei kaba bha ka long ba ngi dei ban sngap kumba sngap u maw, khuslai, jynjar, suk, sngewbha ai ba kan tip hi tang la ka jong ka mynsiem. Barabor ngi dei ban pyrkhath Kong Lyngngaisngi kumno ba ngi la im bad kumno pat ba ngin sa im ha kane ka pyrthei kaba dap tang da ei yn ong, da ka jingsngewbha jingkmen suda ne da ka jingkhuslai jingsngewsih suda. Tang kumta Kong Lyngngaisngi ngam sngewnang iathuhkhana ei ei, lait tang ban ong mynsngi nga trei jingtrei bad mynmied pat nga thiah, nalar kata nga sngew ban trei bad pyrkhath palat shu jinjar bad shitom ei pynban ka met bad ka mynsiem."

Ka Lyngngaisngi ka tang shu ioh ia kine ki ktien, ka la thap phak ia la ka shyllangmat, ka la ong, "Shi, ka jingim ia nga ka jingim bymdorhok ha ka pyrthei, bad kumta ki la bud ryngkat ki ummat ha ki rengogap jong ka. Kumta hi ka la jubap sha u Lur-

symper ka la ong, "Phi te phim don ei ei lait na kaba trei bad ba thiah, phi la lait na kiei kiei baroh, bad ka dei hok ruh ia phi kumta hi, hynrei nga te nga dap shi pyrtthei ban kren bad ban ong ha phi, ba ngam sngew-thuh shuh te phi ban batai ha phi ban ong, kano ka dei ka jingsngewsih bad kano pat ka dei ka jingsngewbha, kano ka dei ka mied bad kano pat ka dei ka shai. Map ia nga ngam tip ba phi wan kai ha ieing jong nga, lada nga la tip, lada ngam lah ban wan hajan jong phi ruh, ngan pynshat da ka iit ban pyni ia la ka jong ka dur ba phin peit bad bishar ia ka Lyngngaisngi kaba mynta, lada phi ioi lehse wat lada phi la buh da u dohnud maw kumba phi la ong hynrei un um ha kata hi ka khyllipmat ba phi ioi. Haba la pah ka khlieng ka tyngab kam ju lait hynrei wat lada ka dei balei phin leit sngewlyngngoh ia kata, mynta ka pah ka tyngab lashai kan pah da kawei pat bad lashisngi kan pah sada kawei pat, hynrei lada kan pah sada kaei kaei ruh phi dei ban tip ba ngam dei kaei kaei ruh hynrei nga dei ka Lyngngaisngi hi, kaba ju kren ia phi, kaba ju khot ia phi bad ka Lyngngaisngi kaba phi ju kren bad phi ju khot ma phi bad ka bym lah lano lano ruh ban kylla da kawei pat. Shaniah skhem ha nga, lada phi ur phi hap bad phi iap to sngewhun hangta kumba nga nga shaniah skhem ha phi, lada nga ur nga hap bad nga iap, ngan sngewhun hangta. Ngam lah ban sngap ia ki ktien jong phi, phi la kren than ia nga bad kumta

kawei ka kyntien kaba phi kren ka la pynjaw
 ia nga shiphew synjaw ki ummat. Wat lada
 phi sngew mynder ia nga hynrei nga, nga
 sngewdei hok ban phla ha phi wat iwei i
 kyntien bad i jingpyrkhat barit tam jong nga.
 Ka burom pyrthei ka la jop ia i mei bad i
 pa jong nga kumba phi la ong, hynrei ngan
 pynbeit ia ka jingbakla jong ki, wat sngew
 ei ei ia ki kumba nga ngan nym sngew ei ei
 ia i mei bad i pa jong phi. Bret noh bak
 wat shah ba kin wan kita ki jingsngewartatien
 kiba phi la don halor jong nga shisien namar
 katba ka mynsiem jong nga ka dangsah ha ka
 met jong nga baroh ki jingshisha ruh ki dang
 im hapoh ka dohnud ka jong nga, wat leit
 sngew namar jongno jongno ruh, hynrei tang
 namar jong nga bad jong phi, hadien ka jing-
 phuh samrkhie kan sa lap hi ban shakri hok
 pat ia nga bad ia phi. Phi tip hi ha ka jing-
 im kaba la shu dap tang da ki lynnong syn-
 tiew suda kam don jingmad bad don jingiew
 ei ei. U syntiew ba khlem shiah um don dor
 ei ei hynrei u 'tiew Kulab uba dap da ki shiah
 sawdong u long uba kordor tam. Nga sngew-
 hun wat lada nga jaw ki ummat namar nga
 tip skhem ba ha kaba khadduh kin siew dor
 lang ia nga bad ia phi. Wat sngewhun ban
 kren than ia nga, wat lada phi don hok ban
 kren namar ngan nym sngewhun ban kren sat
 ia phi wat lada nga don hok ban kren. *Ka
 jingrwai kaba shoh tam ha ka pyrthei dei ka
 jingrwai jong ka sur ba sngewsih tam jong ka
 jingim"*

Haba u Lursymper u la ioh ia kane ka jubap u la sngewtngen ka mynsiem, hynrei haba u pyrkhat pyrkhat pat ia kaei ka kam kaba ki la leh halor jong u, u sngewartatien haduh katta katta, la kumta ruh ha kawei pat ka jingmut, u shaniah ia ki ktien jong ka Lyngngaisngi namar katba u la iashem ia ka, um ju shem kawei ruh ka daw wad kaba rit eh, ba ka kan don ka mynsiem shet shukor, kumta u la jubap sha ka u la ong, "Shisha nga la kren ia phi hapteng jong ka jingkulmar mynsiem hynrei nga kloï ban ong ha phi ba phin sngewbha ban map ia nga. Nga tharai phi sngewthuh ba na ei ki mih kito ki ktien jong nga, dei namar ba nga ieid ia phi. Ngan shaniah ia ki ktien jong phi bad ngan nym peit eh na ka bynta jongno jongno ruh, bad kumta ngan nym khih shuh uwei u niuh khlieh ruh, namar kano kano ka daw halor jong nga bad jong phi"

Ka artaiew ba ki kmie ki kpa jong ka Lyngngaisngi ki la buh ban pyntip sha u Syiem ka la jan kut, man la ka sngi bad man la ka mied ki la pynbor ia la ka khun hynrei kam kohnguh satia, haduh ba kan da kut kata ka ia ruh kim lah pynkohnguh hi kein, ka ong hi ba kam mon bad kam treh. U kpa um mon satia ban ia pyllait ktien noh bad uta u Syiem bad kumta u buh ia pat sa artaiew. Nangta pat ka por ka la iaïd shitaiew hynrei da kumno kumno ruh kim ia lah pynkohnguh satia ia ka. Ka kmie ka la ong, "Kein noh kpa katto yn nai ia pynbor shuh

kham bha ban ia pyllait ktien noh. Ka khyn-nah hi nga la iathuh lypa ia phi ba ka la iadon ktien ai u re ai u bad uto u khynnah". "Em kmie wat kren kumta, phi mut ban pyn-kylla 'riew kai ia nga, phi tharai u briew lada um la sngewthuh ei ei na nga un shu phah kylli hi. Rat ka khynnah, haba mon ma nga bad ma phi kan leit shano, ynda haba ngi la iai ban barabor, kan sa kohnguh hi da kaba sngewbha". Kata ka artaiew pat ruh ka la kut, kumta ki la ia shong baroh arngut shi kmie shi kpa, ka kmie ka la ong, "Yn leh kumno kpa haba katto ngi la ialeh ruh ngim lah, sa ban ia pyllait ktien noh kein". "Shi phi kmie nga hi te ba ngan ong hi ba ngan nym pynngeit ia u te, ngan nym ong da lei lei ruh". "Te kata ngin ialeh kumno haba ka ia kane la kut", la ong ka kmie, "Ngin ia kohnguh kein ngin ia ong kumno, haba nga hi nga la liat ka ktien nyngkong bad nalor kata pat naei hi lah ban ioh pyrsa kurim kat u Syiem. Ia ka khun hi wat lada kam kuhnguh mynta nga tip ba kan sa kohnguh hi". "Haba phi ong kumta te yn leh kumno nga ruh ngam banse ban ia mynjur lang". Kumta haba ki la ia kren bad ia pyrkhath baroh shi mied ynda kum lashai ki la ia phah ktien ba ki ia mon bad kohnguh ia u Syiem. Nangta ki la ia pyrkhath baroh arngut ba kin ialeh kumno ia la ka khun, ba kin ia pyn-sngewbha shwa ia ka katto katne por, bad kin sa khot lang ia ka ha kawei ka ngi ba kin iathuh ha ka ba ki la ia kohnguh. Kumta

ki la shu ia sngap jar haduh shitaiew.
Ynda la dap kata ka shitaiew ki la khot ia ka,
ynda ki la iashong kai sngewbha katto katne,
U kpa u la ong, “Khun, ngi la ia pyni ia phi
mynta la shibnai ia ka jingphah kylli donburom
u Syiem hynrei phim pat lah pyrkhat satia, nga
ngeit mynta te phi la lah pyrkhat, kumno phi
sngew”. “Em papa” ka la ong, “Ia kaba nga la
ong em kata em. Barabor nga la long ka khun
ba kohnguh jong phi hynrei mynta kane ka wat
phi sngewbha ban map ia nga”. U kpa haba
ka la kren kumta um kwah ban ia kren bun
kyntien, hynrei u la mih noh na kata ka kamra
bad u la aiti ha ka kmie ba kan kren kan pyni.
Ka kmie ka la kylli, “Balei khun man la ka
teng ba ngi kylli phi shu ong em shi em, hato na
ei ba phin ioh kat u Syiem un phah kylli ia phi”
“Ieh seh mei”, ka la ong, “Wat pynbor shuh
ia nga haba nga la ong em kata em la kumno
kumno ruh”. Kumta hi ka kmie ka la kylli
pyrshah syndon ka la ong, “Katne ngi la ia pyni
phim kohnguh ne lehse phi la ia don ka ’ti
kamon ’ti kadiang bad no bad no, iathuh khun”.
“Em” ka la ong, “Balei phi kren kumta mei
kum kata kaei kaei ngan nym leh da lei lei ruh
khlem ka mon jong phi”. “Te balei heit phim
kohnguh ia kaba ngi ong, haba ngi ichi ia ka
burom bad jingbha jong phi, ne lehse phi la don
ktien ei ei bad I Hep Lursympen”. “Ia kata
te mei balei ngan leit len ia kaba phi hi phi lah
tip bad ma phi hi phi la phah leh ia nga kumta”
“Haoid khun nga ruh ngam nud hi ban ong ia
phi ka khun tam sneng, nga ruh ialade hi nga

la bakla shisha hynrei ia kaba bakla mano bym bakla, to ieh ngan jali-jaum ma nga ka kmie iá kano kano baroh kaba ngi la ia bakla lang, ngan nguh ngan dem ma nga ia i Hep Lursymper namar kumba u kpa u la iathuh ha phi ba u la liat ka ktien ka thyllied bad u Syiem bad kumta ban kyrngah ia u ka bym bit shuh". "Em kaba kren i papa ai lada in kren kumno kumno ruh ka dang bit bad dang don jingmap hynrei ki kam jong nga kiba nga la leh ki long kiba nga ngam lah kylla shuh namar ba lada nga kylla, ym don jingmap shuh ia nga. Hynrei la katta ruh lada phi hi phim mon nga kloï ban leit nguh ia kita kiba nga nga la pynmih ia la ka ktien, tang ba ngan nym pynkhein ia ka kular, ba ngan shong kurim pat iano iano bad kumta mei baieid wat pynbor shuh ia nga. lada phi pynbor katno katno ruh kan shu long lehnohei ka jingpynbor ka jong phi, namar nga hi ngan nym kohnguh da lei lei ruh em" Hangta ka kmie ka la shu sngap shiphang bad ka la ong ha ka "Khun la phi kren kumno kumno ruh ngan ong pat kumno namar ba ngi hi baroh arngut shikmie shikpa ngi lah kohnguh bad ngim lah kylla shuh. Hangta ka Lyngngaisngi ka la iam rangbah rangsan, kam nang jubab bad kam nang kren shuh shi kyntien ruh. Ynda ka Lyngngaisngi ka la en na ba iam ka kmie ka la ong, "Khun wat pynsngewsih ialade, pyrkhath rangbah namar ngi ki kmie ki kpa ngi pyrkhath barabor ia kaei ka jingbit ka jingbiang jong phi bad kumta sngew ba ka jingleh jong ngi ka long kaba dei, to khie leit thiah noh da pynngam jylliew baroh shi mied,

ia kano kano baroh nga la tip hi ma nga ka kumie, ngan kit nadong shadong” bad kumta ka la leit noh na kata ka kamra.

Ka tang shu lah mih ka kmie, ka Lyngngai-sngi ka la par sha jingthiah ka la thiah khop, ka pyrkhath bad ki ummat ki la tuid khlem sangeh, “Shi”, ka la ong ha lade, “Ka jingim jong nga ha kane ka pyrthei pleng ka long tang ka jing-shai ba shu thaba kai bad dum noh tang shiphang por”. Ka la kynmaw kumno ba ka la phuh samrkhie ha ka por ba ka ia id kai bad u Lursympet ha kper jong ka, ba kumno ka la iakren sngewtynnad bad u halor kata ka tyngsok mukmor jong kita ki jingkordor ha kaba ki ’lang jyrngam, ki dieng ki sied bad ki syntiew ki ia shad sngewbha ha ki jingphuhsamrkhie ryngkat lang bad ka. Ka la kynmaw ia ki jingkhie ki rymmiang shyntur jong u Lursympet bad kumno ba ki ktien bathiang jong u ki shoh ha ki tyndong shkor bad ki ngam bad pynjem jai ia ka mynsiem jong ka. Ka la io hi ia kita ki ’niuhmat da thew peit ieid ba shisha jong u halor jong ka. “Shi”, ka la ong, “Ba ngan shukor ia phi nga suk ba ngan nym io hi shuh ia kane ka pyrthei”. Kumta artad na kaba shu jawummat ka la iam kynduh mynsiem haduh ba kata ka tymmen kaba don hapoh kata ka kamra ka la iohsngew bad ka la wan hajan jong ka. Kata ka tymmen ba ka la tip lut baroh ia kaei kaba la jia halor jong ka, ka la shu jawummat kam nang kren ei ei shuh, ka la shu kren tang kumne. “Ko it khun wat leit sngew ei ei, mano mano ruh ju jia hi kumne haba ka wan ka wan ka por,

hynrei khun phi long ka khun ngeit sneng, baroh kiei kiei kin sa kut tang ha ka jingbha suda, phin leh kumno? Kumba phi ju long ka khun baieid ka khun ngeit sneng, pynhun ia la ka mynsiem, ngeit bad kohnguh haduh kaba kut wat la ki bakla katno katno ruh, koit phin sa shem hi ia ka jingbha bad ka jingsngewbha hadien jong kine kiei kiei baroh, klet noh ia kiei kiei wat buh jingmut shuh, pynsngewbha ialade.” “Balei phi kren kumta”, ka la ong, “Phi tip ba ngan nym shukor ia kata ka jingshisha ha ka jingim jong nga bad shisha ruh ngan ieid ia i mei i pa. Nga sngew ba ngam donkam ban pyrkhat shibun kiei kiei, namar kaei kaba don lypa ha ka kumar-mat ka jong nga, kata hi ka la ialam ia nga ban pynlut ia la kiei kiei ha kane ka pyrtnei”. Kumta hapdeng kita kiei kiei ka la kut kata ka mied baiong ngain bad pat sha kata ka step ba la tap tang da u lyoh khyndew.

Ynda dap kumba katto katne sngi hadien kata ka jingiakohnguh jong ka Lyngngaisngi ia uta u Syiem kata ka khubor ka la leit poi ha ki shkor jong u Lursympet, u tang shu iohsngew ia kata ka khubor shi mied shi sngi um nangkren briew bad um nangbam nangdih shuh. Ka jingpait jong ka mynsiem jong u la kumba dei da u kuli tup. Ka jingduh jong u ka la long kata ka jingduh kaba um nang shuh ban batai bad ban kren da ka ktien bad ka jingsngewlyngngoh ka la pynlong ia u kum uba thapbieid. “Wow mei” u la ong, “Balei kumne ia nga, kaei ka kam kaba nga la leh ba ka la wan ban pynhiar kput ia nga

haduh katne". Ba ün 'kren ruh la bun ka kren set ba ym don umbiah shuh ha ka shyntur. "Nga la duh ia phi", u la ong, "bad nga la klet ban kynmaw bæ ka dur bhabriew bunsien ka dei ka dur shetshukor". Kumta hi u la phah ktien sha ka u la ong. "Kong Lyngngaisngi ngam sngew donkam shuh ban wad daw balei ba phi la leh ia nga haduh katne. Lada phi la iathuh beit ia nga ia kaei kaba nga la iohi lypa lehse katta ngan jin da la kham tngen ka mynsiem. Kam don jingmyn-toi ei ei ba nga ngan ia bun ktien ei ei shuh kum bad phi kaba la nud ban shukor kat kito ki juban lak kiba phi la theh halor jong nga, phi la leh ia nga kumba leh ia iwei i khun bynriew dewbyrtha bad kumta phi la jop ia nga bad nga nga la long shisha ruh kumta. Bunsien ha ki jingsngewbha nga ju phuh samrkhie bad ha ki jingsngewsih nga ju jawummat da ka jingsngew ba haba nga nga phuh samrkhie bad haba nga nga jawummat phi ruh phi phuh samrkhie bad phi ruh phi jawummat, hynrei ngam tip, ngam ju poi pyrkhath bad ngam ju phohsniew ba kata ka kam, ka long ka kam pynshad biria ka jong phi ba phin ioh rkhie pashait ia nga Kan lei kano kano ruh ka bit hi haba ka jingsngewthuh ka jong phi ka batai kumta", bad kumta u la phah sha ka. U la kren ia kine ki ktien da kaba u sngewthuh shai kdar ha la ka jingpyrkhath ba ka ruh ka kohnguh bad mynjur ryngkat bad ki kmie ki kpa jong ka ba kan iehnoh ia u, bad ha ka jingshisha ka dei hi ruh ban long kumta namar ym ju don ba lah hi ban ia kohnguh ne iateh ktien lynda ka trai ka la kohnguh.

Ka Lyngngaisngi naduh kata ka sngi ba ki kmie ki kpa jong ka ki la pyniateh ktien bad uta u Syiem kam sngewthuh shuh ia lade ba ka don ha ei, ka bam ka sa, ka shong ka sah, ka thiah ka dem ruh kam thikna shuh, ban pyrkhath ei ei ruh kam sngewthuh shuh, ka shu tuid lynger synia bad sngi tang da ki ummat suda. Kam sngewthuh ban pyrkhath kumno ba kan pyntip bad ba kan iathuh ha u Lursympers kaei kaba la jia. Hynrei kam shym klet ban kynmaw dyngong ba ka jingshisha jong ka kan nym iap noh bad ba ka pyrthei baroh kawei kan iohi ia kata. Ia ka jingshisha bad jingieid hok jong ka ka khyrwait tala ksiar bad ia ki sairar shiah ba la ker sawdong ia ka, ka niew tang ki jingjot bad jingmihnsnam jong ka doh, bad ka sngew ba kam shym pher ei ei wat lada ka iap bad ka im hapdeng jong ka jingshisha. Hapdeng kata ka jingklusai jong ka na ka bynta jong u, hamar kata ka por ka la ioh ia kata ka khubor jong ki ktien jong u Lursympers. Nalor ki jingban ba la ban, shuh shuh pat ka nang wan ban, kumta ka la shu shaiong ngain ka mynsiem jong ka. Ynda haba la ban than kita kiei kiei, ha ka jaka ba kan kyllon iapler pynban ka la eh ka mynsiem triang bad kumta hi ka la jubap sha u Lursympers, ka la ong, "Baroh kaba phi phi la kren bad phi phi la ong ha nga, ka long kaba dei hok ia phi ban kren, nga hi nga la sngewthuh ba ka khubor na nga ka dei ban long ha shwa ka khubor jong kiwei pat, ka jingshaiong ka tap bad len lut, ia kano kaba dei bad ia kano kaba lait, ia kaei ba ngan leh bad kaei pat ba ngan nym leh. Ngan ong kumno

tang kumne kein lada ka mynsiem jong phi ka dangshah ban iohsngew ia ka mynsiem jong nga, ba nga hi dalade haduh kane ka khyllipmat ngam shym don ei ei ba nga kohnguh iano iano ruh, shisha shisha naduh ka dohnud ba shisha, hynrei i mei bad i pa jong nga ki la leh ia kine kiei kiei baroh. La haduh katne ka la jia ia nga hynrei ngan nym iehnoh da lei lei ruh ban wad ia ka jingshisha ban pynkut ia kine kiei kiei bad ba ngan poi sha kata ka jingshisha kaba nga khmih lynti man ka khyllip mat. Map ia kiei kiei kiba la jia halor jong nga, bat skhem ia ki ktien ki jong nga bad shaniah ia nga, ngam dei kano kano ka briew hynrei nga dei ka Lyngngaisngi ba shisha, ka ban nym ieh noh bad klet noh ia ki juban lak bad juban klur kiba nga la theh halor jong phi.”

U Lursymper haba u la ioh ia kane ka jubap jong ka u la sngewlyngngoh ia ka jing-kren jong kane ka briew, u la pyrkhat imat shisha mo kumba ka la ong. La ha ka mynsiem jong u ka la shai kdar ba um lah shuh ban iashem bad ka, hynrei ka dur bhabriew mat shoh jadu jong ka ka la pynbieid ia u katto katne por, u la pynngam jylliew bad ka dur jong ka ka la paw ha u, u la iohi ba ki khiih ki rymmiang shyntur jong ka, bad u sngew kumba u iohsngew ia ki sur bajem bad bathiang tam jong ka kumba ka la ju leh bad ju kren ia u barabor, bad kumta hi pat u la kyndit bynriew thred ba kam dei shuh ka jong u. U la jaw ummat brib, bad u la kiew saw ki khmat da ka jingbitar ka

bym lah shuh ban ong, ynda shiphang u la
hiar pat sur ka mynsiem bad u la ong halade
ka nusip ka jong nga hi kaba nga la iapan.
bad kumta u la sdang ban jubap pat sha ka,
u la ong, "Ban lei ngan leit pyni ia la ka
mynsiem ha kane ka pyrthei shong ieing basa
bad ka pyrthei shong ieing bynda, ngan wad
kput ma nga don kam aiu, phi long kaba
shisha ne kaba kai phi sngewthuh bad phi
tip ha la poh ka mynsiem ka jong phi hi,
hynrei nga sngew ba ngam shym lut ei ei
iarat ka ktien suda ban kren ha phi khadduh.
iawai artad". "Katto ki sngi, u la ong, "Nga
la ia kren ki 'tien jali jaum bad phi, ngam
shym la wan ban iashem bad phi kum u
nongtuh hynrei da ka jingtip lem i mei bad
i pa jong phi. Ngam tip pat ba baroh phi
ia long uwei u thyrnia uwei u ksai ban pyn-
long ia nga haduh katne. Nga sngewsih ban
ong ha phi ba kaei ka kam kaba nga la leh
halor jong phi ba haduh katne phi la leh ia
nga hynrei imat phim pat sngewhun ba phi
dang kwah ban wad da ka kput kaba phi
kham sngewdonburom, wat lada nga bieid hyn-
rei nga sngewthuh hi ba mano kita ki ban
pyniateh bad uei uta u ban shongkurim lymda.
ka trai ka mynjur bad kohnguh. Kat kum ka
akor briew, ka dei shisha ba phin kren lait
ialade, hynrei wat don kata ka jingmut sniew
ba sngewtynnat jong phi, ba phin ioh rkhe-
pashait ia nga bunsien, namar nga sngewialade
ba ngam shym don kano kano ba nga la leh
palat halor jong phi. Shisha phi long kaba.

bhabriew bad ka nongjop pyrthei, shisha phi la jop ia kaba mynta hynrei wat tharai ba ka long ruh ia kaba lashai. Kumba phi phi bieid nga ruh nga bieid bad kumba phi phi sian nga ruh nga sian, knmba phi phi don shibun kiba peit kiba kum ban iap ia phi, nga ruh nga don shibun kiba peit kiba kum ban iap ia nga, bad kumta ia nga hi wat leit tharai shuh ba nga dei u bieid jong phi, wad lada ngam da nud ban ia kop than jait ia phi kaba la ioh kat u Syiem u patsha, hynrei la kumta ruh ban kum ia phi nga kham lah kawei ka nongkhong kaba ia id ha surok. Ngam sngewdon kam ban ia kren bun kyntien, bad kane ka long kaba khadduh ba ngan iakren bad phi namar kane ka daw, namar mynta ka sngi hi nga don kam ban leit jing-leit noh sha jngai." U tang shu lah pyn-biang ia kane ka khubor u la leit sha la jingthiah. Baroh shimied u khlem iohthiah shi khmat ruh hynrei u dap da ki jingpyr-khat tang shaphang jong ka. Ia kaba ka la shukor u sngewthuh shai ba ka la shukor, bad u sngewthuh ruh ba um lah ia kynduh shuh bad ka. Hynrei um lah satia ban ieh-noh bak ia ka dur ba bhabriew jong ka. Baroh shimied ka wan ha u ban pynpait bad shoh lwet ia ka dohnud jong u, teng teng u klet ba ka la shukor ia u bad teng teng pat u kynmaw bad ki khmat jong u ki la kiew saw da ka jingbitar ia ka jingnud ba da palat than jong ka, baroh shimied ka la long kum ka thma, bah ha ki jingpisa mynsiem kiba

ym don mano mano ruh ba lah ban batai. Ha kaba khadduh u la long kum u 'si rem iatur ban phet iamrem noh. Ka jingklusai jong u ka la long kata ka jingklusai kaba ym lah shuh ban batai da ka ktien, u sngewba um lah ban shah ban iai iohi bad iai ioh-sngew shaphang jong ka, kumta u la kut jingmut ban leit jingleit sha kawei pat ka ri kaba jngai ba un klet noh jinduh shaphang jong ka. Kum lashai u la khreh la khrum kumba u la ju leit jingleit barabor, haba u la dep ka khreh ka khrum, u la khot ia kata ka nongleit rah khubor ba kan leit rah sha ka Lyngngaisngi ia kita ki kyntien, kumta u la mih bak na iing sha kata ka ri kaba un jah slem slem.

Ka Lyngngaisngi ka tang shu ioh ia kata ka khubor, ka la kulmar thlim, ka la khih shane shatai, ka la klet noh ialade, ka la mut ban mih na ieing dalade hi ban leit iashem ia u mar khmat, hynrei kata ka nonglam ktien ka la iathuh ha ka ba um don shuh ha ieing, u la mih bad u la leit jingleit sha kawei ka ri kaba jngai, bad um shy m iathuh ruh ha ka sha kano ka ri ba un leit. Tang kumta hi ym tang ba ka jaw ummat hynrei ka la iam rangbah khlem da lehrain shuh iano iano ruh. Ki kmie ki kpa ki la wan beh balei ba ka la jia kumta, ka la phla ha khmat jong ki ia kiei kiei baroh, bad ka rukom kren ieid kren don akor ia la ki kmie ki kpa kaba ka ju kren barabor ki la duh noh bad dei kane ka khyllip mat kaba

nyngkong ba ka la pyni ia ka dur khmat ba bitar ha khmat jong ki, ka la ong, "Kano kano ruh ka bym bit ia nga Mei, ka long lehnohei ka jingieid jong phi ia nga bad ka jingieid jong nga ia phi, nga la long ka khun ba sniew tam bad kumta ngam kwah shuh ban iohi ia kane ka pyrthei, ka pyrthei ba haram, ka pyrthei ba pynisih khun isih kmie, ka pyrthei thombor, ka pyrthei khwan jalot, ka pyrthei kwah burom, ka pyrthei khlem hok bad ka pyrthei ba shet shukor. Ngam sngew pop ban shukor ia uta uba shukor ia nga, hynrei nga sngew ba ka long kaba poh bad kaba pop tam ba ngan shukor ia uta uba sngur bad ba lui lui kumba nga nga sngur bad nga nga lui lui. Kumta ruh Mei nga la long kaba pop bad kaba poh tam bad ba ym don jaka shuh ruh ba ngan rieha sla jong kane ka pyrthei. Nga kaba la nud ban shukor bad pynmong ia ka dohnud jong uta uba sngur bad lui lui jong kane ka pyrthei kat haduh ba un da phet iap noh ban nym iohi bad iohsngewshuh wad ia ka kyrteng jong nga. Nga ieid ia phi mei nga ieid ia phi pa bad haduh ka jingiap kan nym kut shuh, hynrei ia nga la kha tang kum ka briew ia ka ram jong kane ka pyrthei ngam lah ban siew. Mei bad Pa baieid jong nga nga tip ba kaei kaei baroh kaba phi leh namar jong nga ka long namar ka jingkwah lalot ia ka burom bad ia ka spah jong kane ka pyrthei, phi la leh bein ia nga ba ngan long haduh katne. Ia kaba shisien kaba phi la hikai ia kata nga la leh, phi tip hi ba nga.

dei ka khun samla jong phi kaba hok kaba sngur bad ka bym ju kylla ne shukor iano iano, mynta nga la kylla long kaba kylla bad kaba shukor bad kumta ruh ngan nai Syiem ngan nai Patsha, ngan nai spah ngan nai hajar bad ngan nai shuh kiei kiei ki jong kane ka pyrtnei". Katba ka nang kren katta ki ummat jong ka ruh ki nangtuid khlem da sangeh halor ki rengngap jong ka.

Ki kmie ki kpa jong ka ruh ki la kulmar lang thlim, kim nangdom nangbitar shuh, haba ki la iohi ia ka dur bad ia ki ktien ba shisha jong ka. Ki la ialeh ban pyntngen da kumne da kumtai, bad ki la pyini ruh ia ka jinglong bym shisha jong u Lursympet, ki la ong, ba lada u long shisha kumba ka ka la sngew un nym jin da la phet bad iehnoh ia ka, bad namar ba um khein briew ia ka bad kumta u la leh kumta. Ki la pyini ruh shibun kiei kiei hynrei lyngba ki shkor kita kiei kiei baroh ki la shu mih noh, ka i kumba kam iohsngew ei ea ia ki ktien jong ki, hangta baroh arngut ki la ia lyngngoh ngain, ba ka khun jong 'ki mynno mynno ka ban khyllie tang u 'niuh 'mat ia ki kmie ki kpa ruh kam ju nud ba ha kata pat ka leit eh dohnud haduh katta. La katta ruh ka mynsiem kwah pyrsa kurim Syiem jong ki kam jah noh hi na ki, ki la ia pyrkhat halade ba ha ka saw ka sian te ka ju long kumne, hynrei tang katno ka la jem hi ka dohnud bad kloiruh ban klet noh ia u Lursympet ba um don shuh ha shnong. Hadien katto katne por ki la ia mih noh na kata ka kamra bad ki da

bthah tynggeh ia kata ka tymmen kaba don bad ka, bad kan thiah peit ba ioh jia kano kano halor jong ka Lyngngaisngi namar ki la itieng shisha shisha ia ki rukom leh jong ka. Kata ka tymmen ka la pyni shibun kiei kiei shaphang ka jingim ha kane ka pyrthei ban pyntngen ia ka, ka la ong, "Kum kine ki jingshem jong phi khun nga la lap bun bun bad bun bun ruh kiba la lehsat ialade na kum kine ki daw, hynrei haba pyrkhath bha, shisha ia kaba sngewsih sngewsih hi hynrei ban pynleit jingmut eh ia kiei kiei kiba la dep, ka long kumba shu leh than ia la ka jingim, ngi dei ban pyrkhath bad pynkut ba kaei kaei kaba haba ka nusip hi kam iathoh yn sa leit leh kumno, bad dei ban pynthymmai pat ialade da kiwei pat ki jingpyrkhat. Ka pyrthei ka long kaba iar, bunsien ngi ju shem ba kaei kaba jia mynta ka long ba ngi sngew ba ym don shuh kum kata, hynrei bunsien kaba kham kordor pat ka long ka ban dang wan jia. Kum phi lei lei dang katne ryta khun nga ngeit ba shibun kiei kiei ki jingkordor kiba ap ia phi kiba phin sngew ba kane ka jingjia kan nym long ei ei ha khmat kata ka ban dang wan". Ka Lyngngaisngi ka la peit shlip sha kata ka tymmen bad ka la ong, "Ha ka pyrthei don bun rukom bad ka dei ruh kumba phi pyni bad kren ma phi, hynrei ai ba kan long kumta halor ka pyrthei baroh kawei hynrei ba kan nym long da lei lei ruh ha nga hi marwei. Lada nga ieid ia phi katno katno ruh, ngam nym lah ban iohi lut ia ki snur jong ka dohnud jong phi baroh, bad kumta

ruh ka la long ha phi Ia ka ban kren pyntngen
nga ruh nga ju kloī barabor ban kren pyntngen
lem ia kī lok kī jor kība shem pap sohsat hynrei
ia ka jingkit bakhia bad bashon jong ka
dohnud jong kī ngam lah ban shim ban ia kit
lem hynrei tang ka dohnud jong kī ka ban kit
lada kī iap ne kī im ruh Kata ka tymmen ka la
shu sngap noh namar ka iohi ba ym long ia
sneng ia pyni shuh ia ka

Ka Lyngngisngi ka tip shai kdar ia ka
jingkhuslai pait dohnud jong u Lursymper halor
kine kī jingleh jong ka, ka tip shai kdar ruh
ba u ieid tam eh ia ka kumba ka ruh ka ieid tam
eh ia u Ka la mut dur bad iohi lut ia kī jing-
pyrkhat marwei jong u kaba haduh ba um kwah
shuh ban iohi wat ia ka syrngiew jong ka
Katba ka nangpyrkhat ka dohnud jong ka ka
nangpait nangpait namar kam shym poi
pyrkhat ba kan jia haduh katta kat haduh ba
kan nym ia shem shuh bad u

Ka kmie kam ju ieh noh shuh ia ka
Lynengaisngi naduh kata ka mied khlem da
wan iathuhkhana byrngia sngewbha ia ka
haduh ba kan da leit thiah Ka Lyngngai-
sngi ruh haba don ba don ka kmie namar
ba ka ieid ia ka ka ialeh katba lah ban len
ia la ka jingkthang mynsiem bad pynpaw ia ka
dur sngewbha ba kan sngewtynnāt ma ka,
hynrei ka tang shu leit ma ka ka tuid tang
da kī ummat sngewsih kumno kan leh na ka
bynta u Lursymper Teng teng ka ju klet ia
la kī kmie kī kpa ba kat kata ka sat ba
kan shu her noh kat shaba poi ban pyn-

hun ia ka jingshem jong ka jingim jong ka, teng teng pat ka la pyrkhathalade ba kumba ka long ka samla ba sngur ba shisha bad bym shym leh palat ia kano kano bad kumta ba kan shu shong sotti noh bad la ki kmie ki kpa katba. ka pyrthei ka ibit bad ia lam ia ka. Kum kine ki jingpyrkhat bun bun ki mied bad ki sngi ka la pyrkhath, hynrei ha kaba khatduh kam lah hi ban pynkut noh khlem da wan paw kita ki por jong kita ki jingpeitheid ba janai bad kita ki 'tien ieid ba jai jai jong ka bad u Lursymper bad kumta ka shu kylla ka dohnud khlek khlek bad kam ju tip briew shuh.

Ynda dap kumba artaiew ne hadien ba u la mih u Lursymper na shnong, ka kmie jong ka da kaba wan shongkai man la ka mied ka i kumba ka khun jong ka ka la klet ia kiei kiei baroh, ka khmat jong ka ka la isngewbha bad i kmen, kumta namar ka jingkyrsuh jong u kpa man la ka por ban kren hi ia ka shaphang uta u Syiem, kam banse ban sdang biang ki 'tien phawer shaphang jong u, "Khun" ka la ong, "Nga hi ha lade mynta nga sngewbha ia kaei kaba phi hi phi mon bad kata kaba phi mon ka long ruh ka mon jong nga, kumba phi phi long ka khun marwei jong nga, ban lei ban leit pynsngewsih pynkhuslai ia phi, hynrei nga ngeit ba phin pynshongsuk pynthiah-suk ia ngi ki kmie ki kpa ba phin nym pynkhein ia ka burom jong ngi. Buh jingmut barabor ia uta u ba niew kor ia phi, ban lei phin niewkor ia uta uba ibein ia phi". Ka

Lyngngaisngi ka la sngewthuh ia kaba kaei ba ka kmie jong ka ka la mut, kumta kam lah kun shuh bad ka la ong, "Nga niewkor tam ia uta uba niewkor tam ia nga, ba wat lada ngam lah iashem shuh ia u, nga sngewhun ba ngan shong, bad ngan im marwei ban long ka thei-sotti bashisha, ngan nym shongkurim ia uno uno uwei pat u bried, ia kaba ngan shongkurim iuh jubanlak ka kham bha ba ngan nym iohi shuh ia kane ka pyrthei. Mei baieid mynta nga la kylla long ka khun tam sneng jong phi, hynrei nga sngew ba ka jingtamsneng jong nga ia phi ka kham hok ban ia kaba nga kohnguh ia phi ban shongkurim ia uwei pat u bried. Ia kaba phi hi phi la mon ban ialam ia nga shisien, nga la kohnguh bad ngam lah kylla shuh. Phi don hok ba phin leh katba phi ibit halor jong nga, hynrei tang kata kawei ba ngan bat halade katba nga nga dang dei ka Lyngngaisngi ka khun jong phi". Ka kmie ka la peit da ki jingisynei ia ka, kumta kam nud pyni ei ei shuh hynrei ka la kren pyntngen noh ia ka, ka la iohi ba kam shym kren jingbried shuh bad kumta ka la mih noh na kata ka kamra da ka jingckhang mynsiem ka bym lah ong shuh. Ka la iathuh ia kiei kiei baroh ha u kpa bad ka la iathuh ruh ia ka dur khmat ba la ipher bak jong ka. Ki la ia pyrkhat jylliew baroh arngut shaphang la ka khun bad shaphang ka jingsngew khein burom na ka bynta uta u Syiem uba ki la ia kohnguh. Kim nang iarai shuh ba yn leh kumno, la yn kylla noh

ia u Syiem ruh ym bit la yn pynshongkurim bor ruh ym bit. Ki la iohi ba ka khun jong ki imat lada lehbor ka nud imat wad ban leh kumno kumno ruh ialade. Ha kaba khadduh ki la ia iam baroh arngut bad ki la babe ia la ka jingbakla ba ki la leh ia la ka jong ka khun. Ha kaba kut ki la iarai baroh arngut ba ai kan long katba ka long katba ka jia ba ki dei ban kyrpad ia uta u Syiem ba un ia pyllait ktien noh ia ka khun jong ki.

Ki la iaphah ktien sha u da ka jingkyrpad bad iathuhkhana ia kaei kaba la jia baroh, ba kumno ki la leh ia la ka khun namar ba ki mon bad burom eh ia u hynrei ba ka leit jia pynban haduh katta. Hynrei uta u Syiem u la jubab u la ong, "Nga sngew haduh katta katta na ka bynta jong phi hynrei nga sngewsih shibun ba nga la pynlong poh ialade ha kum kane ka jingjia ba sngewpoh tam. Da la ka mynsiem hi nga kloi bad ngam mon ia kum kata ka briew. hynrei ha khmat ka pyrthei pat nga dei ban wad ia la ka burom. Ka pyrthei kumno kan sngew ia nga lada ngan shah kat kata ka khein burom, kumta kumba phi la mynjur nyngkong ka sngi kumta ruh nga dei ban shongkurim ia ka bad ka dei ban dei ruh ka briew jong nga". Ki tang shu ioh ia kane ka khubor baroh arngut shikmie shikpa kim ia sngewthuh shuh ba kumno kin leh. La kin leit iathuh ha la ka khun ruh kim nud namar ki iohi ba ka jingsngewsih jong ka ka la long haduh katta katta ba imat tang shu pynpher hi ka briew kan shu kyllon bad iap.

rynieng. Ynda hadien katto katne sngi kim banse han iathuh ha ka ia kaba la jia ba ki la leh katba don la ka buit ban ia pyllait ktien noh bad ka bad u Syiem, hynrei ba um pyllait satia, ki da ia iam de baroh arngut ha khmat jong ka. Ka shi kyntien ruh kam nang jubab shuh ia kata ka khubor ba sngewsih hynrei la katta ruh da ka jingisynei ia la ki kmie ki kpa ba ki iam sngewsih na ka bynta jong ka, ka la ong, "Mei, Pa, wat sngewsih bad khuslai na ka bynta jong nga, baroh ngi ki khun bynriew ki bym ju lah biang, ngi dap da ka jingbakla suda, kumba phi phi ieid ia nga nga ruh nga ieid ia phi, lada phi phin shitom nga ruh ngan shitom, lada phi phi suk nga ruh ngan suk ryngkat, lada phi phi im nga ruh ngan im ryngkat bad lada phi phi iap nga ruh ngan iap ryngkat. Ha la ka jingim ba sngur ngin shah ia kita kiei kiei kiba ka pyrthei ka sngewdon hok ban leh halor jong ngi. Katba ka nangkren katta ka mynsiem jong ka ka nang um ha kita ki jingiohi ba jngai bad pait dohnud, kiba phai sha ka na baroh sawdong, kumta katba ka nangkren ka sur kren jong ka ka nanghiar nanghiar haduh ba kam lah kren shuh bad kumta ka la kyllon ha jingthiah khlem da tipbriew shuh.

La khih ka ing ka sem, ki kmie ki kpa kim tip briew shuh. Katno katno ruh kam kyndit shuh, shi kyntien kwai ruh em, ar kyntien kwai ruh em, haduh shiteng synia ka sa kyndit bynriew, wat la ka la kyndit hynrei kam lah satia wat tang ban khih na jingthiah ruh. Kam sngewthuh kumno ka pang bad na ei ka pang, hynrei ban khyllie tang ki khmat ruh, ka la khyllie da kaba

shitom. La dap u tymmen u san, u para marjan marpar, uba nang uba tip ban ia sumar ia ka, hynrei long lehnohei ym don ba lah pynkoit mano mano ruh.

Ka la shu thiah sah hangta hapoh jingthiah da ki bnai. La lut u stad u jhad kat uba ki la tip hynrei ym don ba lah bad ym don dawai satia ka ban iasoh bad kata ka jingpang jong ka. Ka tip briew bad ka lah ban kren, hynrei ka briew pat kat ba nangmih kawei ka sngi bad ar ki sngi ka nangring nangring man la ka sngi. Ki kmie ki kpa ki la shu shad tynglong khlem nangbam nangdih shuh, la i kumba kin shu iap noh da ki jingkluslai khlem da pang, ki la dum ka buit ka stad, bad ki la shu iam sah khlem da sangeh shuh bad mied bad sngi.

Khadduh eh la wan poi uwei u tymmen stad uba ki la phah na sha jngai uba la ju pynkoit bun bun ki jingpang baeh baeh. U tang shu poi, u la peit ia ka bad kumta u la shu pangah tang ka khlieh, u la ong, "Kum kine ki rukom jingpang nga hi te ngam lah shemphang ban leh kumno namar ka mynsiem jong ka briew ka shitom haduh katta katta hynrei ia ka jingpang pat ngam lah ban shem ba naei ka pang, kumta haba ngam lah shem ia ka jingpang ngam lah satia ban ai dawai ia ka. Ka briew hi lada kam lah ban jem sa kumba artaiew ne kan nym lah kyrshan shuh bad kumta kan shitom. Nga hi ialade mynta hi ngam lah ban iarap ei ei bad kumta ia wad kein da uno uno u stad lehse u lah ban shem ban ai dawai ia kane ka jingpang jong ka" Ki kmie ki kpa jong ka ki la iam ha khmat

jong u, ki da ong artad ba ym don shuh u stad uba ki la tip ba ki khlem da leit wad ba un wan peit wan sumar ia ka, kumta ba baroh ki la wan hynrei ym iadei satia. Ki la nguh la dem ia u ba un da peit bha kein kat ba u don la ka buit ka bor stad jong u. Kumta u la kohnguh bad u la ong ba un da pyrkhath bha kum lashai. Uta u stad u la pyrkhath baroh shimied khlem da thiah shuh ba ka jingpang aiu kaba kum kata, hadien da kaba u iai pyrkhath pyrkhath u la lap dien ia kum kata ka rukom jingpang ba ka dei ka jingpang khuslai mynsiem aiu re aiu namar shisien la slem bah mynshwa u la lap teng kum kata ka rukom jingpang. Kumta tang shukhie mynstep u la leit beit sha ki kmie ki kpa u la swar ia ki shaphang jong ka ba don ei ei ne em kaba kum kata kaba u la pyrkhath bad ba ha kano ka rukom ka briew ka la kem pang nyngkong eh. Kumta hi ki ruh ki la phla bad ki la iathuh ia kata kaba la jia baroh. Uta u stad u la ong ha ki, "Lada phi lah ban pynhun bad pynbiang ia kita ki jingkwah jong ka mynsiem jong ka baroh, nga nga kloiban sumar ia ka bad ka briew kan im hynrei lada phim lah ban pynbiang ia kata, ka long lehnohei ia nga ban sumar namar ngan nym lah satia ban pyngoit ia ka da lei lei ruh".

Haba uta u stad u la pynshai ia ki kmie ki kpa jong ka kumta, ki hi namar kiba lah tip lypa ia kiei kiei baroh, ki la iohi ba kaba kongsan tam ba ka la kem pang ka la long, ba haba ka la ioh sngew ba u Syiem um pyllait shuh ia ka. U kpa u la jawummat

brib, u la ong, "Haduh katne kan wan jia ha la ka khun ba lada nga la bakla katno katno ruh u dei ban pyllait, bad kumta nga dei ban pyllait ia la ka khun lada nga iap nga im kam pher ei ei kat kane ka jinjar suhsat". Kumta hi u la ong ha uta u stad ba u lah ban pynbiang nadong shadong baroh ia ki jingkwah ban pynhun ia ka mynsiem jong ka. Uta u stad u la ong ha ki, "Nga sngewbha shibun ia kata ka ktien jong phi, bad mynta khie leit kren ha ka, kren ha kata ka rukom ban pynhun bad pynsngewbha ia ka mynsiem jong ka, nga ngeit ba phi la tip bad sngewthuh hi ba phin pyni kaba kumno ka sur bad ba phin kren kiba kumno ki ktien ba kan hun bad sngewbha ka mynsiem jong ka, hadien ba phi phi la lah ban pynsngewbha ia ka, ngan sa leit sa ma nga, ngan ai ki dawai ki ban pynkhlain ia ka met bad ka mynsiem jong ka, bad kumta lehse ka brieve kan sa koit hi shen shen."

U kpa jong ka kumta hi mar mar shwa ba un leit sha la ka khun, u la phah ktien pat sha u Siem ba un ia pyllait ktien noh shisyndon bad ka, da kaba u pyni shibun ki daw bad da ki jingkyrpad sngewsynei kiba haduh katta katta. U da iathuh ruh ia ka jingpangjur jong ka khun jong u namar ka jingleh than jong u ia ka. U tang shu la phah ia kata ka khubor kaba ar sha u Siem kumta u la leit sha ka kamra jong ka khun jong u, u da pyni ia la ka dur khmat sngewbha ha ka, namar ka long ka khynnah ka

bym lah ban shah ban iohi ia ka dur khmat
 ba sngewsih jong ki kmie ki kpa jong ka.
 U tang shu rung ha ka kamra, u la kylli
 "Kumno phi sngew khun", Ka la ong, "Nga
 kham sngewbit phi pa-pa". Ka shyntur jong
 ka ka kren kumta, hynrei ka jingshitom jong
 ka mynsiem jong ka pat kaba kam sngewlah
 shuh ban ong, ka shu pdang thaïd shi thaïd
 bad katba ka nang kren pynshngain ki ummat
 bym lah len jong ka pat ki nang batai lut
 ia kiei kiei baroh. "Khun", u la ong, "La
 shisha nga sngew ialade kum uba la biang
 nadong shadong baroh, hynrei ka jinglongbriew
 pleng kaba dap da ki jingpynshoi bad jingba-
 kla suda, ynda mynta nga la sngewthuh ba
 nga la leh bakla halor jong phi ba nga la
 mut ban pynshongkurim ia phi bad u Syiem,
 hynrei mynta hi da la ka jingpynshongnia bad
 da la ka mynsiem sngewbha ka jong nga hi,
 ba ngan nym pynshongkurim ia phi bad u
 bad ba nga la phah pyllait ktien noh, bad
 ba um don hok ei ei shuh halor jong phi.
 Nga nga la sngewbha bad sngewtynnad shibun
 eh, ka kmie ruh kumjuh, nga kyrmen ba phi
 ruh phi la sngewbha sngewtynnat ryngkat ia
 ka jingsngewdei jong nga ba nga la leh kumta".
 U tang shu kren ia kine ki ktien ka la hiar
 ka mynsiem jong ka jrut, bad kumta hi ka
 la ong, "Nga sngewtynnat ryngkat pa-pa".
 La kam lah ban kren shibun kyntien hynrei
 ka dur khmat jong ka ka la pher bak bad u
 kpa jong ka u la ithuh ia ka dur khmat ba
 isngewbha shisha. "Khun" u la ong pat, "Kata

'ka la long kumta, hynrei nador kata ruh dang don bun kiei kiei kiba nga la sngewthuh mynta ban pynbeit ia ki jingbakla baroh ba ngin wallam pat ia kito ki sngi ba suk kiba ngi im da ka jingiasngew kawei ka mynsiem shikhun shikmie shikpa, nga la shem ba ym don shuh kawei pat ka jingim kaba suk bad kaba sugewbha ha ka pyrthei nador kata.

Ka Lyngngaisngi hapeng kata ka jingshitom ka la phuh samrkhie bad ka pyni ia la ka dur khmat ba sngewbha bad sngewnguh ha khmat jong u. Kumta hi ynda u la shong kai katto katne por u la mih noh na kata ka kamra da kaba sngewbha ba u la iohi ba ka khmat jong ka ka la i phngain kdar.

U tang shu mih na kamra hi u la leit beit sha uta u stad, bad u la iathuh ha u ia kiei kiei baroh kiba u la leh, bad ba u la imat ba ka dur jong ka mar kumta kumta hi ka la iphngain kdar. Uta u stad kumta hi hadien kato katne por u la leit peit ia ka. Haba u la peit la wad bha u shem shisha ba ka jingpang jong ka ka la kham duna khyndiat na kaba u shem ha kaba u la peit nyngkong, kumta u la sngewthuh ba u la shem ia ka jingpang jong ka, u la khreh ki dawai dashin ka ban iadei bad iarap ia kum kata ka jingpang, u la ai ha ki kmie ki kpa ba kin pyndih ia ka, naduh kata ka sngi haduh ba kan da jem bha. U la ong ha ki ba ka briew kan sa koit tang hapdeng kumba katto katne por, u la bthah bad la maham jur ia ki u ong, "Kaba tam eh ba phin sumar ia kane ka briew ka long

ba phin pynhun, pynsngewbha ia ka mynsiem
 jong ka. Nga ngeit ba phi ki kmie ki kpa.
 phi tip bad phi sngewthuh bha ia ki daw
 baroh ba na ka jingsngewsih bad pait dohnud.
 ba ka la kylla long ka jingpang haduh katne.
 Kat kum ka jingshem jong nga ka briew kam
 shym don jingpang ei ei ruh em hynrei tang
 kata bad kumta phi dei ban ialeh katba lah
 ban pynhun bad pynsngewbha ia ka, namar
 kum kane ka jaid jingpang ym ju don dawai
 ha ka pyrthei kaba lah ban pynkoit lait tang
 da kata ka dawai kaba la pynpang ia ka.
 Kine ki dawai jong nga kiba nga ai ki long
 tang ban iarap ba kan kham khlain klo i ka.
 briew haba ka jingpang ka la iehnoh ia ka,
 hynrei kin nym long dawai ban iarap ei ei
 ruh em, lada phi hi phim lah ban tah dawai
 da kita ki jingtah dawai kiba nga la batai
 ha phi. Phi dei ban da sumar bha ioh ba
 ka leit kylla ka jingpang, namar ka tang shu
 kylla, kata hi ym don dawai shuh ha ka pyr-
 thei ka ban pynkoit pat ia ka. Ka briew, lada
 phi lah hi ban pynbiang kat kum ka jingpyni jong
 nga, naduh mynta ka sngi hi kan nangkoit nang-
 koit man la ka sngi, haduh ba kan da koit phar".

Uta u tymmen stad u tang shu lah pynbiang
 ia kiei kiei baroh u la leit noh bad shisha ka
 briew ka la long kumba u la batai ma u thik.
 Katba nang mih kawei ka sngi ka nangkham
 khlain, ka nang kham peit mat bad ar ka sngi
 ka nang kham jem, ka nang kham jem haduh ba
 ka la lah ban shong ban khie halor jingthiah.
 Ki kmie ki kpa bad ka ieing ka sem baroh kawei

ka la im pat khrek, kata ka tymmen kaba ieid eh ia ka kaba la thiah iap hapoh kyndong baroh shi katta sngi ka la mih pat, ka la nang ban sad ban khyllong ban sum ban sleh pat kumba ka la ju leh barabor, ka la sngewthuh pat ban leit ban wan ban trei ban ktah kumba ka la ju trei. Kumta ki kmie ki kpa, ki lok ki jor ruh kumjuh ki la dap tang da ka jingsngewbha suda, ba ka la nang kham koit man la ka sngi haduh ba ka la koit joit na kata ka jingpang ba jur tam jong ka. Kum ka Syiem jong ka pyrthei ka la hiar na jingthiah ka la mih sha phyllaw ban peit ia ki dieng ki sied, ki syntiew ki skud, ka la peit ka la iohsngew kumba ki ia risa kmen lem ba ki la iohi pat ia ka. Ka la ai khublei ia ki bad ia baroh kiba ka ieid ba ka pyrthei ka dang isynei bad ieid ia ka ba kan ioh thum ieid pat ia kita kiba ieid thoin eh jong ka.

Uta u Syiem u tang shu ioh ia ka khubor kaba ar ba u kpa ka Lyngngaisngi u la phah, u la kham bitar arshah da ki jingsngew ia ki jingñiewbein jong ka. Wat la shisha um kwah bad don mon shuh ban shongkurim ia ka hynrei da ka jingsngewrem bad jingbitar u la ong ha la ka mynsiem ba u dei ban da ai ia ka ka jingsneng kaba biang kat kum ka jingsngewmeng bad sngewsarong jong ka. U la jubab tang khyndiat kyntien sha u kpa jong ka, u la ong, "Nga ngam ju pynkhein ia la ka kular mynno mynno ruh bad kumta ngam lah ruh ban shah ba kiwei kin pynkhein ia la ka kular kaba ki la kular ia nga. Ka pang ka shitom ka iap bad ka im ka long ka jong ka pyrthei. Lada ka briew ka iap yn leit ong kumno, hynrei lada

ka im, kat kum ki ktien iasot-sa-kular, ka briew ka dei ka jong nga". Haba u kpa jong ka u la ioh ia kane ka jubab u la at sia ha la ka mynsiem ia ki ktien kren bym khein briew jong u, hynrei u la en jar ha la ka mynsiem, um iathuh hano hano ruh. U la ong halade nga la nguh la dem um sngap, u kren pynban haduh katne, kat kane ka sat para briew ka kti mar ar ka kjat mar ar ai kan long katba long lada iap lada im haba la poi ha ka khim yn leh kumno, nga dei ban ialeh ba u dei ban pyllait shisyndon, nga dei ruh ban ialeh ban iatan mynsiem la ka khun kumba nga la sngewthuh ba nga la leh bym dei ia ka. Kumta hi u la shu sngap jar bad tip tang halade ia kita kiei kiei baroh haduh ba ka Lyngngaisngi ka la koit bad ka la long kumba ka la ju long mynshwa.

Haba ka la koit kumta u kpa u la iathuh ha ka kmie ia kiei kiei baroh ba u Syiem u la kren ha u ba um pyllait satia ia ka khun jong ki. Ki la ia sngewsih haduh katta katta ba ioh kane kan pynjia ei ei pat ia ka khun jong ki. Haba ki la ia pyrkhat pyrkhat, u kpa u la kut jingmut ba un leit hi da lade ban iakynduh markhmat bad uta u Syiem bad ba u dei ban pyllait ktien shisyndon ia ka khun jong ki. Kumta hi namar ka kam ka long ka bym bit pynslem shuh, u la khreh la khrum bad u la kren la iathuh ha la ka khun ba un leit pyllait bad pynkhuid ktien noh bad u Syiem. Ka ruh ka la jubab da ki ktien kren ieid ia la u kpa bad da ka sur ba isngewbha haduh katta katta.

Ka Lyngngaisngi ka long ka briew kaba

shalak bad kaba sian shibun ka tip ia kata kaei kaei baroh kaba u Syiem um pat pyllait ktien ia ka hynrei kam shym sngew ei ei ruh em ia kata namar ka ithuh bad ka tip ba ki kmie ki kpa jong ka ki la rai jingmut shisyndon ban ia pyllait ktien noh bad u. Haba ki la ia khublei bad ia nguh iadem, u kpa u la mih bak na ieing ryngkat bad la ki nongbud jong u.

Ka jingkoit jong ka Lyngngaisngi ka la pynlong pat ia ka jingsngewbha, ka jingphuh jingphieng jong ka ieing ka sem, ki syntiew ki skud bad baroh phar kiba ka la ju ieid bad sngewbha barabor. Baroh shisha ki la long kumta hynrei u lyoh ba rben uba shu sdien ldui ha ka mynsiem bad ka dohnud jong ka Lyngngaisngi u don hi hangta um her noh kumba ki jingpeit bad jingiohsngew ki iohi bad ki iohsngew. Ka la pyrkhath khuslai ia ka jynjar bah ka jong ki kmie ki kpa jong ka, ka la jaw ummat buhrieh marwei marwei ba kam lah satia ban pynhun ia ki. Ka la phai pat sha la ka mynsiem shi met ka la iohi ia kata ka jingieid ba la khlone lut ia ka dohnud jong ka, ki ummat ki la pun bad kyan suki bad kumta ki la tuid suki jai.

Haba u kpa ka Lyngngaisngi u la poi hangta ha ieing Syiem bad u la ia kren ia pyni shibun kiei kiei shaphang ba u dei ban ia pyllait ktien noh bad ka khun jong u, uta u Syiem pat da ka jingsngewrem bad sngewkhein burom u la kren kyndat bak bak ia ki ktien jong u baroh, u la ong ha u ba kata ka long ka kam pynkhein burom kaba khraw, kumta ba un nym pyllait da lei lei ruh lynda u lah ban siew shisnieh masi ka

ksiar ba nylla kum ka bai mynrain khmat bad
 bai ksan rngiew jong u. U kpa ka Lyngngaisngi
 u la ia kren ha uta u Syiem ba u la dawa ka
 jingdawa kaba um lah ioh ban siew da lei lei ruh,
 ba ym lah hi ban ioh ksiar katta katta, u la ong
 bad u la kyrpad ia u ba un dawa tang kat ba u
 lah ban siew. U Syiem u la ong, ba kata ka
 long ka jingdawa jong u kaba ym dei shuh ban
 ia bun ktien, ba lada u lah ban siew, un ia pyllait
 ktien noh bad ka khun jong u bad lada um lah ban
 siew kata ba ka khun jong u ka dei ban shong-
 kurim ia u. U la ong ruh ba un ai por arbnai thik
 ba un pynbiang ia kata, bad nador kata ban nym
 iadon shuh kano kano ka jingiabuh teng. U la
 ong ruh ba naduh kata ka por ba ka khun jong
 u kam bit shuh ban mih ne ban leit shano shano
 ruh lait na la ka ieing kaba ka shong haduh ban
 da kut kata ka ia ba ia buh bad ba u la phah ruh
 la ki briew ban peit^{ap} khmih ia kata. U kpa jong
 ka Lyngngaisngi um banse ban kohnguh ia kata
 ka jingdawa bym sngewlah siew jong u da ka
 jingsngewsih kthang kaba haduh katta katta.
 Kumta u la leit phai noh sha la ieing ha ka dur-
 khmat ba thangiong ngain.

U kpa u tang shu poi ha ieing u la iathuh
 ha ka kmie baroh kaba la jia bad ia kata ka
 jingiakut kaba u Syiem u la leh da ka bor khlem
 da sngap ia ka ktien jong u wat tang shikyntien
 ruh. Ki la shu ia lyngngoh bad ki la shu ia iam
 baroh arngut da ka jingsngewsih ba kim lah
 pyrkhath shuh ba kan jia kumno ia ka khun jong
 ki lada kan iohsngew kum kata kaei kaei. Kumta
 hi ka Lyngngaisngi ka la wan lap bad ka la ipher

ia kata ka jingiaiam jong ki baroh arngut, ka la kylli ia ki balei ba ki la iaiaam kumta, ka ruh ka la kylli da la ka sur kum ban iam, shiphang u kpa um nud iathuh, hadien um banse u la iathuh ia kaba la jia baroh namar u tip ba ka long ka kam kaba un ym lah hi ban len, ka Lyngngaisngi hangta ka la iam lang. Ka kmie ryngkat bad la ki ummat ka la ong, "Wat sngew ei ei khun ngin pyllait hi ia phi lada da kano kano ka lad kaba ngi lah ban leh. Wat ia kane ka ksiar ruh ngin ialeh ban wad ioh ngi shu lah ban pyndap kumno kumno. Ka Lyngngaisngi ka la ipait ka mynsiem haba ka peit ka peit ia la ki kmie ki kpa, kumta ka la ong ha ki, "Mei bad pa baieid kumba ngi la ialeh ban lait na ka jingriam kaba ngi la ngat bad kumta ruh ngin iai ialeh haduh ba ngin da lait syndon phar, ka pyrthei hi kan iarap ia ngi ba ngin lait na kiei kiei kiba ngi la bakla, hynrei lada ka pyrthei hi kam isynei shuh, balei ngin leit sngewsih, mei bad pa wat leit sngewsih bad khuslai na ka bynta jong nga, bad kumba nga la iohi da la ki khmat ia ka jingshitom mynsiem jong phi na ka bynta jong nga bad kumta nga la sngewhun ka mynsiem bad ngam sngew ei ei shuh wat lada nga leit hap hangno hangno ruh haba ngim don bor shuh ban da ialade ngin leh kumno, ai kan long katba ka long, wat leit sngewsih ei ei shuh na ka bynta jong nga." Haba ka la kren kumta ha ka dur khmat ba da ishisha, kumta ki la kham tngen khyndiat na kaba ki la sngewsih, kiuh bad tieng than ba ioh ka kem pang pat. Hynrei la kumta ruh ka jingkhuslai jong ki ka bym lah shuh ban ong,

namar wat la ka kren kumta, kumba ka pyntngen ia ki, hynrei ki ktien jong ka pat ki ngam ba kim lah sngewthuh shuh ba kan jia aiu lada kim lah ban pyllait ia ka na uta u Syiem.

U kpa hadien ba u la poi ha la shnong u la khih ka wad ksiar, u la phah la ki briew kylleng ban thied kat na ba lah ban ioh ba un pyndap ia kata ka shi snieh masi ba u la dawa uta u Syiem. U la phah wad shisha ia kata ka ksiar, hynrei ha ka jingsngewthuh hi u la sngewthuh lypa ba um lah ban ioh ksiar haduh katta katta, hynrei u la leh ia kaei kaba u Syiem u la dawa khnang ban pyni ba u la leh shitom hynrei lada um lah ban ioh ruh, halade hi u la don jingmut ba un nym ai ia la ka khun ha ban da iap da im ruh, bad ba u dei ban dawa da ka jingdawa kaba u lah ban siew. Ia ka Lyngngaisngi ruh u la iathuh bad u la ong, ba kat kum ka jingdawa jong u Syiem ba kam bit shuh ban mih na la ieing ban leit shano shano haduh ban da kut kata ka ia. U la sneng la pyni ba kan kohnguh thik kumba u la ong bad u la kren pynshngain ruh ia ka ba un pyllait hi na ka kti jong u wat lada kumno kumno ruh.

Ka Lyngngaisngi ruh ka la kohnguh baroh katba u ong u kpa. Kumta ka la shong hangta ha ieing khlem ioh ban leit shano shano ruh da ka jingdiaw, jingsngewsih bad jingsngewkhein burom kaba kam lah shuh ban ong. Baroh kawei ka shnong ki la tip shaphang kane ka jingjia bad ki la sngewlem shibun eh ia kata ka jingshem jong ki, ki la iarap ia ki ban ia lum ksiar lem kat shaba ki sngew lah ban ioh. Kumta ryngkat

ka jingiarap ki lok ki jor, dalade hi bad da la:
 ki jong ki briew ki la lum bun ka ksiar hangta ha.
 ieing jong ki. Ynda dap kumba artaiew ne ba
 ki la thied ksiar, la lut ka ksiar na sha ba kham
 jan kham jan namar la lut kiba kwah ban die,
 hynrei kata ka ksiar kaba ki la ioh kam pat don
 wat tang shiteng shatak snieh masi ruh. Kumta
 ki la phah wad kham sha jngai katba lah ban
 ioh. Baroh kiba ha ieing ha sem ki la sngewartatien
 ban ioh ia kata ka ksiar, kumta ki la dap da
 ka jingsngewsih haba ki la pyrkhath shaphang ka
 Lyngngaisngi ba kim tip shuh ba kan leh kumno
 ynda haba u Syiem un ring bor ia ka namar ka
 jingbym lah siew jong ki, hynrei u kpa te u la
 shu en jar ha la ka mynsiem namar u la pyrkhath
 ba lada un pyniap pynim ruh ba un siew tang
 katba u lah ban ioh bad lada iap lada im ruh
 ba un nym kohnguh ba un pynshongkurim bor
 ia la ka khun kaba u la iohi lypa ba lada un leh
 hi kumta kan iap tang da ki jingsngewsih.

U Lursympu u long uba khlain shibun ka
 jingmut jingpyrkhat ha ki kam ei ei baroh ba
 u tang shu mih hi na ieing u la ialeh ban pynkut
 la ka jingmut ba haduh katta u la shah shukor
 ha ka jingieid kaba u la duhshong duhthiah
 bad kaba um shym pyrkhath shuh ba kan jia
 kumta te ba yn nai shuh kum ia kata. Haba
 u la poi ha kata ka shnong kaba u la mut ban
 shong slem slem klnang ba un nym iohsngew
 ei ei shuh shaphang jong ka Lyngngaisngi haduh
 ba un da klet, u la ialeh ban pyneh ia la ka
 mynsiem katba u lah, hynrei wat lada u long u
 ba khlain ka jingpyrkhat hynrei katba u nang.

pynshongnia ia ka jingkhlad jong ka, katta ka mynsiem jong u ka nangthnam kumba thnam u katli ba la tiew halor dingbah. Ha ka jingpyrkhat u tharai ba da kaba u shong sha jngai un sa klet hi shen shen ia ka, pynban ka jingpyrkhat ka nang kham jur arshah. Ki jingkynmaw ki iawan ialeit haduh ba um lah ban shem satia wat tang kawei ka meid ruh ba un iohthiah suk. Ki jingpyrkhat ki la shu dap tang da ki lehse suda khlem da lah pynshong nongrim hangno hangno ruh, u la shong hangta kham slem khlem da tip khubor ei ei shuh shaphang jong ka. Ynda la slem kumta, um lah kun bad um lah shah shuh khlem da tip ei ei ba ka la jia aiu shaphang jongka. Ka jingieid ba khlain bor ka khlem jingpynsngewrem ia u briew ba haduh kat kata ka jingsngew u la sngew ba ka la leh than ia u hynrei um sngew lah ban shah shuh khlem da tip ei ei shaphang jong ka.

Hapdeng kata ka por la leit poi ki briew ba leit wad ksiar ha kata ka shnong. Ki la iathuh ruh ia ka daw ba kumno bad ba balei ki la wan poi wad ksiar kat shaduh kata ka iaka. Haba u Lursympet u la tip ia kane ka khubor u la phah ia shem ia ki bad u la phah kyili bniah ruh na ki shaphang kiei kiei baroh kiba u ia iohsngew na ki briew, kita ki nongwad ksiar ruh ki la iathuh bad batai bniah ia kiei kiei baroh kiba la jia halor jong ka Lyngngaisngi.

Haba u Lursympet u la iohsngew ia kata ka khubor, nyngkong eh u la kynmaw ia ki ktien ba khadduh jong ka ba ka la nguh la dem ia u namar ki kmie ki kpa jong ka bad ba ka la kren

skhem ia u ba ka Lyngngaisngi kan nym shukor da lei lei ruh bad kumta ba un shaniah ia ka. Hangta hi u la thap phak ia la ka kupar mat "Shish" u la ong; "Nga uba kum u ei uta u briew nga la long, haba katto ki juban lak juban klur nga la iatheh bad ka, ba nga la shu nud ban tharai sniew ia ka briew kaba shisha khlem da wad ia ka tynrai balei ba ka la jia ia ka kumta, nga sngew ba ngam sngewnud shuh hi ban leit paw ha khmat jong ka nga uba la nud ban iehnoh ia ka bapli ka kynthai shibor bad shibuit, la katta ruh haduh katta kan jia na ka bynta jong nga, nga sngewthuh ba ka dei ka kamram jong nga, ban pyllait na kum kata ka apot sngi, ai lada ka long ka jong nga ne ka jong kiwei pat kam pher ei ei tang ba nga dei ban pyndep ia la ka kamram ba nga ruh nga ieid hok shisha ia ka". Kumta hi mar mar u la khreh la khrum u la mih bad u la leit phai sha la shnong.

Haba u la poi ha la shnong u la rung ha ieing da kaba u pyni ka dur khmat ba sngewbha ia la kiba ha ieing ha sem. Baroh shimied um shym iohthiah shi khmat ruh u shu pyrkhath hi sia, ba da kano ka lad ba u lah ban ia rap ia ka. Haba u la pyrkhath pyrkhath u la shem ia ka lad ba kumno un iarap ia ka. U tip ia ka jingdawa jong u Syiem ba u dawa shisnieh masi ka ksiar nylla, ba lada ki lah ban siew ia kane kata ba un pyllait noh ia ka Lyngngaisngi bad lada kim lah siew ba u Syiem un ring bor ia ka bad ba un leh katba u mon. Kumba u la lap ia ka buit kumta u la pyrkhath pat ba da kumno bad dano un phah ia kata ka buit jong u. U la kynmaw ba la don

u wei u nongtrei tymmen ha ieing jong ka Lyngngaisngi, uba ki ieid bad shaniah ia u baroh shi ieing, kumta u la pyrkhat ba dei ma u uba lah ban leh ia kata ka buit jong u. Kum lashai ka mied u la mih na ieing ban leit kai sha ieing jong u. Haba u la poi ha ieing jong u, uta u tymmen u la lyngngoh shibun ia kata ka jingwan poi ryngkhat ryngkhat jong u, haba u la tip ba la slem um shym don shuh ha shnong. U ta u tymmen u la leh burom ia u kumba u la ju leh barabor, u la kylli ia u shaphang ka jingkoit jingkhiah bad u la ong ruh ba u sngewlyngngoh shibun ba u wan poi kumta shi-ia shi-ia. U Lursympers u la ong ha u ba u wan kai sngewbha bad ba u donkam de khyndiat bad u. Ynda ki la ia shongkai katto katne por, u Lursympers u la ong ha uta u tymmen ba un sngewbha ban iathuhkhana kai shaphang jong ka Lyngngaisngi ba u kwah ban tip thikna namar u shu iohsngew nangne nangtai na ki briew ia kiei kiei ki jingjia halor jong ka. U ta u tymmen u la sdang iathuh bad u la ong, "Yn ong knmno phi, ka jynjar kaba la pynjynjar bad pynsuhsat mynsiem ym tang ia ka hynrei ia baroh kawei ka ieing, ryngkat ma ngi ki nongtrei ki nongktah baroh". Kumta u la iathuh lin ia ki jingjia naduh basdang haduh kata ka khyllipmat. Khadduh u la ong ba ka sngi ba la iabuh kate ka la jan kut hynrei ym ioh ksiar shuh naei naei ruh ban pyndap ia kata ka shisnieh masi ba u Syiem u la dawa. Baroh shi ieing ki la shu ia iam lynter bad mied bad sngi ba kumno kin leh, namar kim don lad shuh bad ba u Syiem un sa ring bor ia ka Lyngngaisngi. Ka Lyngngaisngi pat

imat ba u tang shu wan ring bor hi kan iap shisyndon da ka jingsngewsih. U Lursymper u la ong, “U ba kumno phi ? uta u briew u ban shu wan ring bor ia ka briew haba kam mon, wat u ialade ruh u dei ban sngewrem lada u dei u ’riew pyrkhath, to ieh ia kata kam pher ei ei ia ka kam jong u briew shano yn leit tip, hynrei nga kwah ban ong ha phi ba phin shaniah bad phin kohnguh ne em ia nga ba ngan ai buit aibor lem lyngba jong phi ba ngan iarap ia ka naduh ka mynsiem namar nga ngeit ba phi tip hi ba nga ruh nga iadon bynta lem ha kane ka bynta”. Uta u tymmen u la kohnguh da kaba sngewbha ia kata ka jingtyrwa jong u bad ba un leh naduh ka mynsiem ia kaei kaba un ong.

U Lursymper u la ong, U Syiem mynta phi i u dawa ka ksiar shisnieh masi ha ka jingmut jong u hi nga tip wat la um shym kren shai hynrei u mut shisnieh masi kynton. Kumta kumba um shym kren shai shisnieh masi kynton dei ban leit ai ia u ka ksiar tang shisnieh masi. Ka snieh masi ruh kumba ym shym don jingiakut ei ei ba ka long kaba heh haduh katno kumta ba dei ban rah da kaba rit, lada um shah da kaba rit kata ba dei ban iathew da kaba long pdeng bad ba ym dei ban shah ba yn iathew da ka snieh masi kaba heh palat. Nga ngeit kumba phi la iathuh ha nga ba ki la lum ksiar shibun kumta kan dap hi shi snieh masi kumba nga nga la mut, wat lada kam dap ruh ngan pyndap ma nga lyngba jong phi. Nga ngeit ba kat kata ka jinjar ba lada pyni lem mano mano ruh kin sngap hi khamtam ia phi lei lei u ’riewtymmen uba ki

shaniah bha. Phi i phi ha ka sngi ba ki iakren bad pyrkhat shaphang kane, leit hangta bad haba ki la iakren ba kim sngew lah ioh ksiar shuh naei naei ruh, ong ha ki ba phi kum u 'riew tymmen ba phi sngew dei ban ia pyrkhat lem shaphang kat kane ka jinjar bad ba phi sngew-lyngngoh shibun ba katto ka ksiar phi la iawan thied ba kam dap satia ia rat tang shisnieh masi. Lada ki ong ba tang shiteng pawa snieh masi ruh kim pat don, ban pyndap shisnieh masi te ba kin nym lah ioh da lei lei ruh. Phi sa ong ba ka kham bha shibun ba kin da pyni bad sei da ka ksiar ha madan namar da kaba ia peit lang lehse kan kham bha bad ba lah ruh ba phin ia ai jingmut lem katba phi lah ei, phi hi ki tang shu sei bad ka tang shu idon hi shi pawa shutak snieh masi sa shu ong beit, wa! kumno kam don shisnieh masi katne, ba ha ka jingpeit jong phi te imat arphew snieh masi ka la palat. Namar ia kata ka ksiar ong ba ki dei ban shoh stang ka jingstang tang kat i snep rynsun ne palat lada lah, bad ia kata dei ban shu siang halor ka snieh masi haduh ba kan da tap da ka ksiar baroh kwei, ong ia ki ba ka dei kumta, kat kum ka jingiakut bad u Syiem shisnieh masi, ba kam dei satia kumba mut ma ki, shisnieh masi kynton, namar ym shym don ka jingiakut kumta, bad um shym mut hi ruh kumta, namar ym don ba lah hi ruh mano mano ba lah ban ioh ksiar shisnieh masi kynton. Pynsngewthuh ia ki kumta haduh ba kin da mynjur bad haba ki la mynjur ong ha ki ba lada u Syiem u mut bakla kumno kumno, shisnieh masi kynton, ba ki dei ban iasaid ia la ka nia ba dei haduh ba un

da shim bad mynjur ia kata. Nga ngeit ba phi la sngewthuh katta nga la pyni. Kumno phi pyrkhath shaphang kata ka nia, kam long kaba dei" ? "Kata ka jingpyrkhath jong phi te kaba la sngew dei than haduh katta katta", La ong u tymmen, "Nga ngeit skhem ruh ba da kata ka buit ka jong phi ba ngi lah ban pyllait shisyndon ia ka briew na ka kti ba shu thom bor jong u Syiem". U Lursymper u la ong pat, "Nga la sngewbha shibun ba phi la sngewdei lem ia kata ka jingongjong nga, bad nga ngeit ruh ba ka briew kan lait shisyndon, bad lada ka leit jia kumno kumno ba kam lah ban lait da kane ka buit nga dang don shuh sa shibun pat ki buit ban pyllait ia ka, hynrei lada kam lah lait ngan ialeh haduh ba kan da lait wat la da ka jingim jong nga kan leit noh na kane ka pyrthei ruh. Te nga ngeit ba phi la sngewthuh hi ma phi u 'riewtymmen ba katno ka jingsngew jong nga ka la long na ka bynta kane ka jingjia. Phi ruh kumba phi ieid ryngkat ia ka bad ia nga ruh kumjuh, kyrmen ba phin leh naduh ka mynsiem ba shisha jong phi, khnang ba kin lait na kat kane ka jinjar bah ka jong ki. Sa kane kawei kaba khadduh ba ngan ong ha phi ba phim bit ban iathuh hano hano ruh ba nga nga don hangne ha shnong bad ba nga nga la ai ia kane ka buit, haduh ba ngan da ong ha phi". Uta u tymmen u la mynjur sngewbha baroh ia kata kaba u Lursymper u la ong, bad u Lursymper ruh u la mih noh nangta na ieing jong u.

Ka sngi ba la buh uta u Syiem ka la jan kut, kiba ha ieing ha sefm jong ka Lyngngaisngi ki la

ia kulmar thlim ba kim lah ioh ksiar shuh naei naei ruh ban pyndap ia kata ka shisnieh masi, kumta ki la iashong pyrkhath baroh shi ieing ba kin leh kumno ? Hapdeng hangta u la don u ta u nongtrei tymmen bad u la ong ha ki, “Kat kane ka jinjar, wat la nga long tang u nongtrei ruh ba nga dei ban ia pyrkhath bad kren lem lada phi iashah”. “Ym shah balei”, ki la ia ong, “Tang ban lait na kat kane ka khein burom”. Uta u tymmen u la ong, “Katto ka ksiar phi la ia lum, lada phi sngewbha te kan kham bha shibun ba phin sei ia ka ksiar hangne ha madan, khnang ban ia antad lang, ba lada ym lah dap te ban ia pyrkhath lehse ka don hi ka lad ban ia leh da kumno kumno”. Haba ki la ia pyni, khadduh ki la ia mynjur ia kata ka jingong jong u bad ki la iasei ia kata ka ksiar ha madan hai-lyhai. Tang shu sei ia kata ka ksiar uta u tymmen u la leh kyndit bad u la ong, “Wow! Katne ka ksiar te arphew snieh masi ruh ym jan shuh, kumno phi ia ong ba ym dap shisnieh masi”.

Ki la ia lyngngoh baroh ia kata ka jingkren bieid jong u haba baroh ki ia peit ba imat tang shi shatak snieh masi ruh ym lah dap. “Me kren bieid aiu”, ki la ia ong baroh baroh. “Wa!” u la ong, “Ngan leit kren bieid lei, phi ia bakla ma phi kein baroh”. “Me peit da kumno ba kane ka ksiar kan dap kata ka arphew snieh masi jong me”. Ki la ia ong ha ka rukom rkhiebein ba u la kren bieid. “Phi ia kut kumno kata ka jingiakut jong phi bad u Syiem”, la ong uta u tymmen, u kpa ka Lyngngaisngi u la ong, ba ia kut shisnieh masi. “Te shisnieh masi

phi ia kut, kata kein haba phi ia kut kumta, te kane ka ksiar ka la palat kein ia arphew snieh masi ne", la ong uta u tymmen. "Balei me kren bieid kumta", ki la ia ong, "Ba kan palat arphew snieh masi haba kane ka ksiar tang katne ka don". "Ngam shym kren bieid ei ei ruh em, hynrei da sngap ngan pyni shisnieh masi ka ksiar te kumne kein", u la ong, "Ia kane ka ksiar dei ban shoh stang lyngkniap kat ka jingstang i snep rynsun ne katba lah ban pynstang, nangta sa tap da kita ki lyngkniap ksiar stang ha ban da dap kata ka snieh masi bad kata ka long shisnieh masi, u Syiem ruh u mut tang katta kat ba ong ma nga, um shym ong lane iakut bad phi shisnieh masi kynton, kumba mut ma phi, haba u ong tang shisnieh masi wat lada u mut shisnieh masi kynton ruh wat ai kein haba ym shym don ka jingiakut thikna". Kumta haba ki la ia pyni bad ia kren slem slem ki la ia mynjur ban leit ai tang kumta kumba la hikai uta u tymmen. Ki la phah shohstang haduh katta katta ba tang khyndiat ki la phah shoh na kata ka ksiar kaba ki don, ka lah da dap shisnieh masi.

Haba la poi kata ka sngi ki la ialeit shibun kyrhai ki tymmen ki san ban leit siew ia kata ka ksiar shisnieh masi, ki la ia kut lang ruh ba lada jia kumno kumno ba um treh ba kin iasaid khlem aili kumba u la hikai uta u tymmen.

Ki tang shu poi ki la leit iashem ia uta u Syiem, ki la sei kata ka ksiar bad ki la leh thik kumba la hikai uta u tymmen. U Syiem um mynjur ia kata ka jingleh jong ki, da ka jingdom u la ong ba ym dei katta katba ki la wallam

hynrei ba dei shisnieh masi kynton. Ki la iasaid jur ba u dei ban shim kat kum ka jingiakut ba u hi u la ong tang shisnieh masi, ym dei shisnieh masi kynton. U Syiem ruh u la jubab ba u ruh um shym ong shisnieh masi siang snep rynsun. Ki la iashit ka jingiasaid hangta haduh ba la ia kulmar thlim, namar ki la iashem baroh arliang ba ym shym don kata ka jingiakut ka ban da shai kdar. Haba kim ialah pynrem pynksan shuh katno katno ruh ia kata ka nia, u Syiem u la ong, "To ieh ia kata kaba ngim ia lah pynkut shuh ia kane, ba ka dei ka jong phi kaba dei ne ka jong nga kaba dei, to ngan tyrwa noh sa da kawei pat ka jingiathong, ka ban da shai syndon kdar khlem da don jingiasngewthuh bakla shuh, bad kata ka dei kane, ba ngan buh uwei u mawkordor jong nga bad ngan tap da ka liang-phiang ha kawei ka jaka, ban leit buh ia uta u mawkordor ruh, ngi dei ban ia leit buh bad peit ryngkat bad phi ia uta u mawkordor bad ia kata ka jaka, khnang ba ngin ia tip ba nga la buh shisha ia uta u mawkordor ha kata ka jaka. Ka jingiathong kan long kumne, ba ngan pynap sawdong ar-syrtap ki shipai jong nga ia kata ka jaka ba la buh ia uta u mawkordor khnang ba mano mano ruh ki briew kin nym lah ban leit rung sha kata ka jaka ha kaba la buh ia uta u mawkordor, ynda kut ka shibnai kat kum ka por ba la buh ba baroh arliang ngin leit ia peit lang ban tip ba uta u mawkordor u dang sah ha kata ka jaka ne u la jah um don shuh ha kata ka jaka. Ka jingmana kan long ba ym bit mano mano ruh ba lah ban leit rung sha.

kata ka jaka. Lada shem ba uno uno u briew ne kano kano ka briew kiba leit rung hapoh ki sawdong pud ba la khang lada ki briew jong phi ne jong nga ne kino kino ki briew ba yn kem shi syndon bad ka bainong jong ki kan long ka jingiap.

Ngan ai por ia phi shibnai ba phin pyndep ban leit shim ia uta u mawkordor, lyngba kita ki syrtap shipai kiba ap ba ym bit ban leit mano mano ruh hangta, lada phi lah ban leit shim khlem don ba iohi bad ioh kem mano mano bad ba uta u mawkordor u la jah noh na kata ka jaka hapideng ka shibnai kumba la ia kut kata ka mut ba phi la jop ma phi bad uta a mawkordor um dei shuh u jong nga hynrei u la dei u jong uta uba ioh ia u, bad naduh kata ka por nga ngam donhok shuh ban dawa ei ei ia ka khun jong phi, hynrei lada uta u mawkordor u sah hajuh ym don ba lah ban leit shim mano mano ruh hapideng shibnai kumba la ia buh, kata uta u mawkordor un sah hi u jong nga bad ka khun jong phi ruh kan long ka jong nga. Lada phi ia mynjur ia kane ka jingtyrwa jong nga ngin ia buh ia ka sngi ban leit buh ia uta u mawkordor, kumta lada jop ma phi ne jop ma nga ruh ba ngin nym ia sah nud shuh, kumba la long ka jingiakut kaba shai-kdar. Lada phim ia mynjur ia kane, kata ba nga dei ban bat skhem ia kane ka jingiakut kaba nyngkong ba phi dei ban ai ia nga shisnieh masi kynton, ba ym dei satia shisnieh masi siang snep rynsun."

Ki la ia pyrkhat ia kata ka jingtyrwa, hynrei katno katno ruh kim ia lah rai shuh, kumta

haduh ba ki ia hap sah mied tang na ka bynta ban ia pyrkhat ia kata. Ha ka sngi kaba ar, kim don lad shuh ban ia pyrkhat namar ba uta u Syiem um sngap satia ia ki ban ia pyni kumno kumno ruh, kumta kim ia banse shuh ban mynjur ia kata ka jingtyrwa kaba ar, wat lada ka long ka kam kaba kim sngewlah shuh ban leh namar ki sngew ba ka shah ka nia jong u briew uba ki la ia bakla bad lait ka ktien naduh ka sngi nyngkong. Haba ki la mynjur ia kata ka jingiathong, uta u Syiem u la sei ia uta u mawkordor, ki la peit thuh bha ia u bad ki la ia leit buh bad pynbiang thik kat kum ka jingia-kut. U Syiem u la pynap arsyrtap shipai. Haba la dep nadong shadong, ki la ia khlad noh bad ki briew na ka liang jong ka Lyngngaisngi ruh ki la ia leit phai noh sha la shnong.

Ki la poi ha shnong bad la kata ka khubor ba sngewsih ba kim lah ieng satia ban pyndem ia u Syiem da kata ka jingiathong kaba nyngkong. Kata ka jingiathong kaba ar kaba ki la ia kohnguh da ka jingbymbanse, ka la pynsngew-thuh ia ki ba u Syiem u la mut ban bat bad ban nym pyllait ia ka Lyngngaisngi namar ki la ia pyrkhat ba ym don mano mano ruh ba nud leit shim ia uta u mawkordor uba u la pynap lypa da ka jingiap.

Katno ka jingkulmar bad jingsngewsih hangta ha ieing jong ki ka la long pat. Ki kmie ki kpa kiba ha ieing ha sem jong ka Lyngngaisngi, ki la shu shong bad dap tang da ka jingkhuslai bad jingsngewsih namar ki la sngewthuh shai ba kim lah leh ei ei na ka bynta kata, ban leit shim

ia uta u mawkordor. Kim tip kim sngewthuh bad kim nang pyrkhath shuh ba kumno kan jia ia la ka jong ka khun thep mynsiem ka jong ki. Ka Lyngngaisngi ruh ka la dap tang da ki jingdiaw mynsiem suda, namar ka la iohi lypa ia kiei kiei ki ban jia halor jong ka. Hynrei lada ka sngewsih haduh katta ruh, haba ka la iohi ia ka jingsngewsih jong ki kmie ki kpa kiba ha ieing ha sem jong ka, kam lah ban shah ia kata. Ka la leh sngewbha ialade ka la leit sha ki, ka la phuh samrkhie bad ka la ong, "Balei mei phi ia leh sngewsih kumne, ia ka kam kaba ngi lah tip bad ngi lah sngewsih shisien ruh, ngin shu ia sngewsih sah ia ka juh hi. Nga hi ngam sngewdei shuh ban pyrkhath bun jingmut shaphang kane, namar ba kiei kiei baroh la thoh ha man la iwei pa iwei i jingpynlong jong kane ka pyrthei bad kumta lada ngi leh kumno kumno ruh, kata ka ban jia ka dei ban jia. Ia kaba sngew kat kum ka jinglongbriew ngi dei ban sngew hynrei ban shu sngew ia kajuh pa ka juh ka long ka bymdei bad kaba ngi dei ban pyrkhath ba lada ngi leh kumta ngi leh than ia la ka jingim. Nga mynta ngam sngew ei ei ynda kut la ka por ngan leit da kaba sngewbha namar ngam sah pop shuh iano iano ruh. Ngam tharai kat haduh ba un da pyniap ia nga, haba nga trei nga ktah kum ki para briew baroh, lada u buh ha kano kano ka kam salei ne tip suk sain pynban leit tip, mano ba lah ban ong lypa ia kata".

Kumta hi baroh ki la kham peit mat na kata kaba ki la ialeh sngewsih than. "Tang kane kawei ngan ong ha phi", ka la ong, "Ba ym

bit ban leit tur mano mano ruh hangta ha ka
jaka ba la khang, ban leh aiu ia uta u mawkor-
dor, namar ban jah kawei ka mynsiem briew
kata ka long kaba kthang palat ban ia kano
kano ka jingsngewsih kaba ngi la sngewsih.
Nga tieng eh ia kiba ha ieing kiba ieid ki jong
nga, ioh ki leit tur iap hangta ban pyllait ia nga
khlem da pyrkhath ba ma nga lane ma phi ngin
iap da ka jingkhath bad jot mynsiem shwa ba
kita kiba leit kin iap. Ia kane ngin kynmaw ba
ngim bit ban leh da lei lei ruh. Ka kham bha
ban iap ha ka por kaba dei ban iap ban ia kaba
iap turiap pyrshah ia kaba ngim don jingkyrmen
ban jop". Kumta ka la leh sngewbha ha
khmat jong ki haduh katta katta, shwa ba kan
leit noh sha la ka kamra.

Hadien katto katne por jong kata ka
jingiathong kaba ar, ha kawei ka mied haba
u Lursympet u la lah pyrkhath ia kiei kiei baroh
na ka bynta ka jingpyrkhath kaba ar kumba kata
ka jingpyrkhath jong u kaba nyngkong kam lah
jop, u la leit pat sha uta u tymmen. Ynda ki la
iathuhkhana slem slem shaphang ki jingjia halor
jong ka Lyngngaisngi, u Lursympet u la ong ha
uta u tymmen, ba ha kaba shisien kim lah ban
jop hynrei ba un kohnguh pat ha kane kaba
arsien, kaba un ong pat ha u. Uta u tymmen
ruh u la mynjur da kaba sngewbha ba un leh ia
kaei kaba un ong ha u. "Mynta" u la ong u
Lursympet, "Khreh ngin ia leit kai sha kata ka
shnong ba shong uta u Syiem, bad ngin ialeit
kai sha kata ka jaka ha kaba la buh ia uta u
Mawkordor kata ka jingiathong hapteng u Syiem
bad i Lyngngaisngi".

Kumta hi uta u tymmen u la mynjur ia kata ka jingong, kum lashai ki la iakhreh iakhrum bad ki la ialeit baroh arngut sha kata ka shnong. Haba ki la poi hangta, kum lashai ki la ia leit peit ia kata ka jaka ba la buh ia uta u Mawkordor bad ki la iohi ruh ia kita ki syrtap shipai ba ap ia kata ka sawdong pud ha kaba la buh ia u.

Haba ki la wan phai sha kata ka ieing shong basa, u Lursymper u la ong ia uta u tymmen ba un mynjur bad kohnguh ne em ban ialeh ban pyllait ia ka Lyngngaisngi sa ha kane pat ka jingiathong kaba ar. "Em phi", la ong uta u tymmen, "Kane ka dei ka kam iap kam im, ban leit ia pyrshang ia kane ka long kaba ym bit wat lada nga ieid ia la ka kynrad ruh, ba ioh ngi iap ei". "Em" la ong u Lursymper, "Ngam phah tur ia phi shata, hynrei ba shu leh tang ia kaci kaba ngan ong ha phi, hynrei ym dei satia ba phin leit shim ia uta u Mawkordor". Haba ki la ia kren slem slem uta u tymmen u la mynjur ia ki jingong jong u Lursymper. Kumta u Lursymper u la phah wad kam sharai masi ia uta u tymmen ha kata ka shnong bad ba u dei ban ioh ruh ka jaka set masi kaba don hajan jong kata ka jaka ha kaba la buh ia uta u Mawkordor bad kaba la ap da kita ki syrtap shipai. Uta u tymmen u la sngewlyngngoh ia kata ka jingphah, khamtam eh ha shnong ki briew, ei ban ai sharai masi ia u, hynrei hadien u la kohnguh ha kata ka jingban bor than jong u bad u la leit wad ia kata ka kam sharai masi. Hadien katto katne por uta u tymmen u la wan phai da kaba puh samrkhie u la ong ba u la ioh ia kata ka kam sharai masi, u la

ong namar ba ka dei ka por rep por riang ba u tang shu rung ha kawei ka ieing ban wad kam sharai masi ba ki la ia kmen shibun ba kim ioh nongsharai masi la slem bad ba ki la ia ong ruh ba un leit sdang noh naduh kum lashai ka sngi. U Lursymper u la sngewbha shibun bad u la ong ha uta u tymmen ban leit iapeit ia kata ka jaka khnang ba un ioh hikai bad batai ia u ba kumno un sharai ia kita ki masi ha kata ka jaka.

Dangstep kum lashai ki la ia mih baroh arngut na kata ka ieing shong basa ban leit iapeit ia kata ka jaka set masi ba ka long kaba bit ne em ban pynkhreh ia kaei kaba u Lursymper u la thmu. Ki tang shu poi ha kata ka jaka uta u tymmen u la kdew ia kata ka sem masi bad ki la ia iohi ruh ia kita ki syrtap shipai ba la ap sawdong kata ka jaka ha kaba la buh ia uta u Mawkordor. Uta u tymmen u la kdew ruh ia kata ka jaka ha kaba la buh ia uta u Mawkordor. U Lursymper u la shong pyrkhat bad peit bniah ia kata ka jaka, hadien u la ong ha uta u tymmen ba kata ka jaka set masi ka la long kaba la bit than bad kaba la ia dei thik bad ki jingpyrkhat bad jingthmu jong u. "Peit pahep" u la ong, "Ba naduh lashai ka sngi ba ynda haba phi la wan ban set masi janmied ba phin kynmaw ba shwa ba phin set ia ki masi phi dei ban da pynbam phlang shwa ha kane ka jaka, ai ba ki masi kin iaaid bam phlang sawdong kitai ki syrtap shipai, bad teng teng pynsah ia ki baroh shimied, khnang ba ki lah ban leit rung shaduh poh kut kata ka syrtap shipai". U la hikai shibun kiei kiei ia uta u

tymmen hangta kumno ba un jubab ia kita ki shipai lada jia ba ki mai ne kren ia u shaphang kata ka jingpynbam phlang jong u ia kita ki masi hangta, bad ba kumno ba un ai jubab ia ki trai masi lada jia ba ki kylli ne kren ei ei shaphang kata ka jingpynbam phlang jong u hangta bad ba um set noh tang shu lah wan sharai ia ki masi na sha lum. Haba u la kut kata ka jinghikai bad jingbatai nadong shadong u la ong ha uta u tymmen, "Phi lah ban leh ia kata ka kam?" "Ngam lah balei, nga kloï ban leh ia rat kata ka kam", La ong uta u tymmen. "Te phi mut ban leh kumno da kaba nga sharai masi ma nga kumta hangne namar kan kham bha shibun lada phi iathuh khnang ban ia ioh pyrkhat lem". "Em" u la ong u Lursymper, "Koït kam pher ei ei, phi shu leh kumta nga la tip hi ma nga ia kiei kiei baroh. Ngan sa wan ia shem ia phi sa shisien arsien shwa ba kan jia kata ka kam". Uta u tymmen u la mynjur ban leh thik kumba u la batai u Lursymper bad kumta ki la iakhlad noh baroh arngut bad u Lursymper u la leit phai noh sha la shnong. U Lursymper naduh kata ka mied hi u la khrech kita ki atiar ban leit shim syndon ia uta u Mawkordor bad u la kut jingmut ha lade ba lada jia ba kata ka buit jong u ban pha ia lade kam lah jop ba un nym sngewbynnud ei ei ban iai pha la ka jong ka jingim katba u dangim haba ka shah ka kam kumta na ka bynta ka nam bad ka kam don burom ha kane ka pyrthei.

Uta u tymmen naduh kata ka sngi ba u ia khlad bad u Lursymper, u la wan fiaah la ki masi

bad u la pynbam phlang barabor ha kata ka jaka. Ki masi ynda haba ki la mlien bad la juh, ki la bamphlang bad rung wad shaduh shapoh kata ka syrtap shipai ruh. Kita ki shipai ki la mai ia uta u tymmen bunsien balei ba u la leh kumta, hynrei uta u tymmen u la jubap u la ong ba kat shaba u leit sharai masi ba la dkhoi eh ka lum ka wah ki masi kim kdang satia bad kumta um banse khlem da shah ia ki ban bam artad artad lynti shwa ba un set ia ki ha sem. Ki trai masi ruh ki ju kren ia u bunsien ia kata ka jingleh jong u, hynrei u la jubap hi kajuh ka jubap ba u la jubap ia kita ki shipai. Ka jubap jong u ka la pyn-sngewihuh ia ki ba uta u tymmen u long uba da ieid jingri than haduh katta katta bad kumta kim ju kren ei ei shuh bad kumta u la leh katba u mon. Kita ki shipai ruh ynda haba la bun sngi ba u la leh kumta ki la shu myllen noh, kim da kynmaw sngi shuh ia kita ki masi ba ki ia rung ia mih ha kata ka jaka. U ta u tymmen ruh haba u la iohi ba ym don ba kren ba thnum shuh ia u ia kata ka jingleh joug u, u la leh mon u la pynsah mied ruh ia ki masi bun wat bunsien kumba la hikai u Lursymper.

Shwa ban dap shibnai, u Lursymper u la wan sah mied pat bad uta u tymmen, u la ky'li bniah bha kumno ba u la leh, ba u la pynbiang ne em ia kita ki jinghikai jong u baroh. Uta u tymmen ruh u la iathuh bad batai ia kiei kiei baroh kiba u la leh. U la iathuh ruh ba ki masi ki la iajuh bha ha kata ka jaka, bad kumta lai-mied sawmied u la pynsah mied ia ki. U la iathuh ruh ba ha kaba nyngkong ki trai masi bad ki

shipai ba ap hangta, ki la ia sngewlyngngoh bad ia khñium ia kata ka jingleh jong u hynrei ynda haba u la jubap ia ki da ka nia ba sngew dei ki la shu sngap bad mynta te imat kumba ki la ia myllen, ki masi ki bam phlang katba ki mon lyngba kita ki syrtap shipai, teng teng ki poi leit bam phlang shaduh kata ka jaka ba buh ia uta u mawkordor ruh, ym ju don ba kren shuh.

U Lursymper u la sngewtynnat bad sngewbha shibun ia kata ka jingleh shitom jong uta u tymmen ia kaei kaba u la ong ha u bad u la ong ruh ha u ba un sa siew ia kaei kaei baroh ka jingleh shitom jong u. U shaniah bad u ieid shibun ia uta u tymmen namar la slem bah u la ju ia shem ha bun ki kam bad u shem ruh ba uta u tymmen u long uba shisha. U la ong ha uta u tymmen, “Nga sngewnguh bad sngewburom shibun ia kane ka jingleh shitom jong phi bad nga shaniah lut ha phi ia kiei kiei baroh kiba dei na ka bynta kane ka kam”. “Peit pahep”, u la ong, “Kumba phi la batai ha nga ba ka la biang nadong shadong kumba nga la hikai ia phi ban leh bad kumta ruh naduh mynta ba phi dei ban pynsah mied ia ki masi ha kata ka jaka man la ka mied.”

Ha ka mied kaba lai ba ki la sah mied kita ki masi, u Lursymper u la poi thik ha ka por shiteng synia ha kata ka jaka, u la iohi ia ki masi ba ki iabam phlang baroh kata ka jaka shapoh bad shabar uta u pud iathong bad kumta hi u la phong kata ka riam khun masi kaba u la pynkhreh lypa u la kylla khun masi ia lade. U la leh mynleh bam phlang iaiaid suki suki haduh ba un,

da poi ha kita ki nongap ba la ker syrtap ia kata ka jaka, u la shem ba bun na ki ki la iohthiah, namar ki iathiah iapli kyliang kyliang bad kiba peit ruh bun kiba la iaaid shoh samthiah suda, u la iohi ruh ba ki masi ki ia rung ia mih bam phlang lyngba kata ka syrtap shipai khlem da don ba beh ne ba kren mano mano ruh, kumta u la ioh ka lad kaba biang ba u ruh un bam phlang, ia rung ia mih bam phlang lem kum kita ki para masi baroh. Te khlem shitom ei ei ruh kum u khun masi u la rung shapoh kata ka kut, u la leh mynleh bam phlang suki jai haduh ban da poi ha kata ka jaka ba la buh ia uta u maw-kordor. U la khyllie ia kata ka 'liang phiang bad u la ioh ia uta u mawkordor ryngkat bad kata ka 'liang phiang bad u la thep khop, kumta hi u la leh mynleh bam phlang pat kumba mynshwa haduh ba un da lait shabar jong kata ka kut khlem don ba iohi ne tip mano mano ruh.

Haba u la poi kham pajih nangta na ki nongap, u la shong thait shiphang ha ka jing-kmen ka mynsiem kaba um lah shuh ban ong, kumta hi u la kylla briew noh bad u la poi suk ha la ieing shongbasa khlem don jingpynthud ei ei ruh em. "Nga la lait bad nga la jop" u la ong ha la ka mynsiem, "Ja kaba nga dei ban jop". Kumta hi tang shu khie mynstep u la leit ia shem ia u ta u tymmen bad u la ong ha u ba ka la biang kata ka kam sharai masi jong u hangta ha shnong bad ba u dei ban leit phai noh sha la shnong, bad ia kaei kaei baroh ba un sa iathuh bad batai ynda la ia poi sha shnong, bad ynda haba la kut kata ka ia ba u Syiem u la buh.

Haba la kut kata ka shibnai kumba la ia buh, ka la long ka jingiam bad ka jingjawummat ha ieing jong ka Lyngngaisngi ka bym lah shuh ban batai, namar ki la tip shai ba ia ka Lyngngaisngi yn sa rah noh da ka bor sha ieing jong uta u Syiem. Kaba kham pynpangnud ia ki ka long ba da lei lei ba u Syiem un nym shongkurim shuh ia ka kum ka lok shisha kumba ka la long da ka jingiathong bad ka jingialeh jingiathew kaba la long kum ka thma. Kim nang pyrkhath shuh ba un leh kumno ia ka, kumba u Syiem u la kren bad u la pynpaw ruh ia kata ka ktien ha ki. Ka Lyngngaisngi ruh ha kane ka khyllipmat mynta kam nangshuh ban pyntngen iano iano ruh, bad kam lah shuh ruh ban pynjem bad pyntngen wat ia la ka jong ka mynsiem ka jong ka. Ka la iam jawummat da ki ummat kiba jylliew haduh katta katta, ha kaba kut ka la wan ka jingkyumaw ingkhong mynsiem iakut artad ia uta uba ka ieid eh. Ka jingbitar jong ka ka la kiew ha shynrong khlieh bad ka la ong, "Phi la hun bad kumta nga ruh nga la hun, ia rat kane ka pyrthei kai kha mynta shong lashai bad iap la shisngi".

Ka la long kaba shong nia ia ka ba kan ong kumta namar haba ka la pyrkhath ba ka jingkhain burom bad ka jingshem jynjar ka jong ka ka la long na ka bynta jong u, hynrei haduh ka sngi kaba kut shikyntien ruh um bit shuh ban kylli. Ka sngew ba ym don daw ha ka pyrthei ka ban lah khang ia u ba un wan kylli lem ia ka jingshem jong ka ha ka jinglong kynthai ka jong ka, lada u long u briew uba pyrkhath bad uba shisha.

“Shi” ka la ong ha lade. “Nga la bakla nga la niew-kor ia u ’riewkai, uba khlem khmat, khlem shkor, khlem mynsiem bad khlem kti khlem kjat. To ieh ngan leh pat kumno, lada nga iap ne nga im ruh ia kaba la leit ai kan leit kat sha ba ka mon”. Ka la iam kthang jawummat marwei marwei ha la kata ka dur ba bhabriew ’mat sngewsih kaba ym don u samla ha ka pyrthei u ban don ka mynsiem kaba lah ban shah lada un peit bad iohi ia ka.

Kiba khraw-batri na ieing Syiem ki la wan poi kumba la kut kata ka ia. La wan poi ruh u paitbah u shnong u thaw, uba ia sngewlem ia ka Lyngngaisngi bad ruh ki paitbah kiba shu wan peit kai ban ioh sngew mano ba jop ha kata ka jingiathong.

Baroh arliang ki briew Syiem bad ki briew jong ka Lyngngaisngi ki la ia leit ha kata ka jaka ba la buh ia uta u mawkordor. U ’riew-khmat jong ka liang Syiem u la pynshai ia kata ka jingiathong, shwa ba un leit ban khyllie ia kata ka ’liang phiang, u la ong, “La buh ia u mawkordor jong u Syiem hangne bad la tap da ka ’liang phiang kat kum ka jingiathong. Te lada uta u mawkordor um shym jah, u dang don, ma ngi ki briew Syiem ngi la ioh pat ia u, kata ka long ba ia uta u mawkordor bad ia ka Lyngngaisngi ngi dei ban leit rah sha ieing Syiem ba kin long ka mar kynti jong u Syiem, hynrei lada uta u mawkordor um don shuh bad ngi ki briew Syiem ngim ioh shuh ia u, kata u Syiem u la duh ei bad um don hok shuh halor uta u mawkordor bad um don ei ei shuh ruh ban dawa halor jong

ka Lyngngaisngi, kata kat kum ka jingiathong", u la kylli, "Ba kata ka long kaba dei ne em ka jingiathong, bad ba phi mynjur ne em, ba ngin leit ban khyllie noh ia ka 'liang phiang". Baroh arliang ki la ia mynjur ia kata, bad la risa u paitbah shaw. Haba ki la phai bad leit ha kata ka jaka, ki la ia kyndit bad lyngngoh baroh, ba kata ka liang phiang bad uta u mawkordor kim don shuh hangta. Ki la ia wad shane shatai, hynrei kim lah shem shuh ia ki. Haba ki la wad ha ban da hun bad ym lah shem shuh, kumta hi ki la pyntip bad pyrta ha u paidbah ba ka 'liang phiang bad u mawkordor ki la jah bad kim don shuh hangta. Ki paidbah da ka jingsngewlyngngoh bad jingsngewkyndit ka bym lah shuh ban ong, la sawa hum ka jingiakren kyndit sngewlyngngoh jong ki shaphang ka jingjah jong uta u mawkordor, khamtam kiba na ka liang jong ka Lyngngaisngi ki la sngewlyngngoh bad kyndit haduh katta katta ia kata ka jingjia, namar ym shym don napdeng jong ki kiba la ia pyrshang ne leit shim ia uta u mawkordor. Ki la shu ia pyrkhath lyngngoh sngewbha ba lehse uta u mawkordor u la shu jah rngai ne jah shano re shano ne ba la wan shim mano re mano ia u. Ki briew Syiem hangta ki la pynbna ba u Syiem u la duh ia uta u mawkordor bad ba um don hok shuh ban dawa ei ei halor jong ka Lyngngaisngi.

Ki paidbah, ki lok ki jor jong ka Lyngngaisngi ki la ia risa kmen ka bym lah shuh ban ong, ki la ia iaid sharum shaneng tang da ka jingsngewbha suda. Ki la ia leit phai bad poi sha shnong hapdeng kata ka jingsngewbha bad ka khana ka

bym lah kut shuh haduh da ki taiew bad da ki bnai ba shano uta u mawkordor u la jah noh.

Ka jingsngewbha bad ka jingiathuhkhana shaphang kata ka jinglait jong ka Lyngngaisngi, ka la khiih win baroh kawei ka shnong, hynrei haduh katta sngi ruh, ka long kaba sngewlyngngoh ia ki ba kim tip satia shano u la jah uta u mawkordor bad mano ba la nud ban leit shim ia u.

U tang shu jah uta u mawkordor na kata ka jaka iathong, uta u tymmen ap masi u la ngeit skhem thik ba dei u Lursympers uba leit shim ia u, namar u suba na kata ka jingphah sharai masi jong u ha kata ka jaka, bad ha kita ki mied wat lada um shym da tip ba ka mut aiu kata ka jingphah sharai masi jong u.

U Lursympers um shym iathuh ei ei ha uta u tymmen ia kata kaba la jia baroh ba u la leit shim ia uta u mawkordor, ynda hadien katto katne por ba la bna ka pyrthei ba la jah uta u mawkordor na kata ka jaka iathong, u Lursympers u la khot jar jar ia uta u tymmen bad u la iathuh ia kaei kaei baroh kaba la jia ba dei ma u uba la leit shim bad uba la ioh ia uta u mawkordor hynrei u la maham jur ia u ba um bit ban iathuh hano hano ruh ia kane ka kam kaba u la leh.

Haba kita ki briew Syiem ki la wallam ia kata ka khubor ba sngewsih ha khmat u Syiem, u Syiem u la sngewlyngngoh bad sngewkyndit haduh katta katta ia kane ka jingjia, namar u la buh kata ka jingiathong kaba u la pyrkhath ban nym don mano mano ruh ba lah ban jop ban

leit shim ia uta u mawkordor. Kane ka jingjia ka la pyndum pynlyngngoh ia u, haduh ba um sngewthuh shuh kumno kumno ruh ban pyrkhatar namar kane kan pynsah sniew ia u baroh shiryta, ba kam lah poi satia ha kaba u mut ba un leh sbun bad leh burom ia ka jinglong bashisha jong ka Lyngngaisngi ynda haba ma u, u la jop ia kata ka jingiathong. Ia ki jingjia bad jinglong jong ka Lyngngaisngi u Syiem u la tip lut baroh namar ha kata ka por ba u kpa jong ka Lyngngaisngi u la wan ban pyllait ktien noh ia ka Lyngngaisngi bad u, u kpa jong ka Lyngngaisngi u la ia thuhkhana naduh ba sdang haduh bakut ia kiei kiei baroh kiba la jia ha ieing jong u bad halor jong ka, u da jaw bad ki ummat rangbah de bad u la ong ba ka dei namar kita ki daw jong kita ki jingjia ba u la wan ban ia pyllait ktien noh bad u.

U Syiem haba u la wad ban pynshisha ia ki jingjia kiba u kpa jong ka Lyngngaisngi u la iathuh ha u ha kata ka por ba u la wan ban pyllait ktien noh bad u, kumta u la shem shisha ia ka jingshisha halor jong kita kiei kiei baroh kiba la jia. Ka jingbuh jong u ia kita ki jingia-thong, ka la long namar ka jingsngewtynnat jong u ia kata ka jingiaieid ba sotti jong ka Lyngngaisngi bad u Lursymper bad ba u kwah ban shem lut ia ki jingshisha jong ka baroh bad hadien kata ba un sa pyni ia la ka mynsiem rangbah bad jynsur mynsiem ba un ai burom ia kata ka jingiaieid sotti jong ki ynda haba u la jop ia kata ka jingiathong da kaba un aiti ia ka Lyngngaisngi ha u Lursymper ryngkat ki jingai

ba kordor, hynrei mynta um lah shuh ban pynpaw ia kata, kumba u la rem hæ kata ka jingiathong, kumta kane ka jingjia u sngewthuh ba kan pynsah sniew ia u baroh shirta. Kane ka jingjia ka la pynjah burom bad ka la pynsngewsih ia u haduh katta katta.

Kumba katto katne por ka la iaidd kata ka por ba dap da ka jingsngewbha ha ieing jong ka Lyngngaisngi ha kaba baroh kiei kiei ki jingkyrkhu ba ju long ha ieing jong ka, ka i kumba ki la wan phai pat. Ka Lyngngaisngi ruh ka la dap da ki jingsngewbha bad ka dur ba bhabriew jong ka ka la shad pat kumba shad u klew ha kita ki kjat sngi ba tyngshain jong ka step phyrnai. Ka kynmaw ia u Lursympet barabor, ia ka dur ba bhabriew jong u bad ia ka jingia-icid jong ka bad u, ia kane wat la ka kynmaw, hynrei kam lah ban than shuh ia ka, namar ki jingleh jong u hi, ha kaba paw ki la pynrem bad pynngiah ia ka ban kynmaw pat ia u.

Hapdeng kata ka por ki lok ki jor, ki samla samhoi kynthai shynrang ki la wan juh pat ha ieing jong ka, kumba ki la ju long ha ki por mynshwa. Haba kine kiei kiei ki la jia pat bad ba ka por jong ka Lyngngaisngi ruh ka la biang bha, ba ym dei ban pyndier shuh, ki kmie ki kpa jong ka ki la ia pyrkhath ba la kumno kumno ruh ba ka dei ban shongkurim noh. Kumta ki la ia sop-sop sip-sip baroh arngut shi kmie shi kpa ia kane ka kam man la ka por. Te ha kawei ka mied ka kmie ka la leit shongkai bad ka, bad ka la kren shaphang kata, ka la ong, "Ka por jong phi te mynta ka la dei ko khun ba phi dei

ban pyrkhath noh, shaphang la ka ieing ka sem, ka shong ka sah ba kane ka por ka la beh ngoi ngoi ban kheit noh ia u syntiew u jong phi, phi la sian bha mynta, nga ngeit ba phi la sngewthuh hi, bad ngam donkam ban da kren bun kyntien ha phi. Peit bad pyrkhath halade uno u brieve uba phi sngewbit ban pynjuh iathuh ha ngi ki kmie ki kpa, ngam thara' ba ngin iapher jingmut bad phi, lynda u da long eh u brieve uba ngim da ibit than eh". Ka tang shu kren ka kmie ia kine ki ktien, kaba nyngkong eh ka dohnud jong ka, ka la siat thrait sha u Lursymper, bad kumta ka la jaw ummat brib. "Balei phi leh kumne khun", ka la ong ka kmie. "Wat pyrkhath ei ei ba ngan long pat kumba nga la long shisien mynshwa, mynta nga pyni kum ka kmie ba shisha jong phi, hynrei lada phim mon bad sngewbha ia kata, kam pher ei ei ngin ia shong shi kmie shi kpa shi khun, kata ruh ka long kaba sngewtynnath bad sngewbha hi". Ka Lyngngaisngi ka la rkhe bad ka la ong. "Em phi mei, wat sngew ei ei ki ummat jong nga ki la long rukom noh ha ka jingmlen, hynrei ha ka jingshisha nga khlem da don ei ei ruh em hapoh mynsiem. Kata ka jingpyni jong phi ka da long kaba dei eh hi kein kumba ka por jong nga hi shisha ka la long kumba phi la ong ma phi. hynrei ia kane, phi la tip phi la ithuh hi ma phi ki kmie ki kpa bad kumta uno uno u brieve uba phi mon ma phi nga ruh nga mon, hynrei tang kane kawei ngan ong ha phi ba ia uno uno uba phi la pynmon bad nga la mon wat leit kylla shuh. "Em khun", ka la ong ka kmie, "Kum kita kiei

kiei kin nym lah long shuh bad ngin nym bakla shuh hi ruh. Haba phi la sngew dei ban leh ia kata khun, kat kum kane ka por kaba mynta hi, ban jied ia u briew kam dei shuh ka kam jong ngi ki kmie ki kpa, hynrei ka dei ka kamram jong phi ba phin peit ia u briew uba iadei bad ka mynsiem ka jong phi, ngi te ngin leit tip shano ia kata. Haba phi la jied iathuh ha ngi lada uba ngi sngewbit kata ngi la ia phuh samrkhie lang lada uba ngim ia sngewbit eh te ngin ia ong lem kein.” Kumta ki la ia shongkai slem slem ha ka jingiapur ia kren shaphang kata.

Haba ka kmie ka la mih noh nangta, ka Lyngngaisngi ka la kiew halor jingthiah bad ki jingpyrkhat jong ka ki la ngam ha kita ki ktien kiba ka la ia kren bad la ka kmie. Shisha ka la pyrkhat hynrei la ka la pyrkhat kumno kumno ruh ym long, une u Lursymper u ieng ha jing-khang kam man lait mih satia. *Haba la shong kulai ka mon pyndait lakam ka ieid yn leh shuh kumno, lada thait, lada thiep, lada khohruh khohram ruh dei kein ban shu iaid la ka iaid.* Ka la thmu sia hynrei tdam tdam ki khmat jong ka ki khang ban iohi ia uwei pat u shynrang bad tdam tdam ka dohnud jong ka ka khang ban sngew samla ialade ha uwei pat u samla wat la ka la shu khang bor ialade ban iohi bad ioh-sngew pat ia u Lursymper. La shisha ka la khang, hynrei ki ummat mied jong ka ki la tuid ban pynjhieh baroh arliang ka syngkhlieh halor jong u. *Ka jingieid ba runar, kam ju klet ban leh than haba ka ia kynduh, la ha lynti ne ha ieing, la mynmied ne mynsngi ruh.* Ka la ong

marwei marwei ha la ka dohnud. "Iathuh ko mynsiem jong nga, aiu pha kwah ban leh pat ia nga, haba nga la thait nga la tlot bad ngam don bor shuh halor jong pha mynta. Ai ba kiei kiei ki jingkordor ba la leit noh kin nym iap shuh na kane ka pyrtnei, la shisha ki la iap noh na nga, bad ngan nym lah ioh shuh ia ki hynrei phum phum ki phuh bad ki iewbih ha per syntiew bad sawdong, hajar hajar ki nongpeitkai, nga ruh nga la long tang kum kawei na ki ban shu peit kai ym ba ngan ioh kam kynti pat ia ka". Kane ka jingpyrkhat jot mynsiem jong ka ka la bat bun sngi ia ka, hynrei khadduh ia wai ka la pynwai artad thoi. Haden kata ka la nang ban pyrkhat (hymmai pat na ka bynta ka jingim ba thymmai jong ka. Haba ka la pynshongnia slem slem ia la ka jong ka jingim ka la sngew ba kam sngewdon kam shuh ban pynlong ia ka jingshongkurim jong ka da kano kano pat ka rukom jingieid namar ka la sngewthuh shai ba kan nym lah ioh shuh kum kata ka jingieid kaba ka la duh noh. Ka la sngewngiah syndon ruh ban iohsngew wat tang ia ka ktien 'jingieid'. Ka la sngewbha bad ka la sngewtynnat ban shu shongkurim ia uno uno u briew uba ka ibit ibiang bad uba ki kmie ki kpa ki ibit ibiang na ka bynta ka jingsuk jong ka hadien habud. Haba ka la pyrkhat shaphang kane, ka la kynmaw ia uta u Mawkordor uba ia shu jah noh nangta na jingiathong khlem da tip bad khlem da iohsngew syrngain syrngoh shuh. Ka la ngeit skhem ba uta u Mawkordor un nym lah da lei lei ruh ban shu jah rngai noh khlem

da don mano mano ki ban leit shim ia u. Ka la ngeit skhem ruh ba yn ym don uno uno u briew u ban nud ban pha ia la ka jingim tang na ka bynta ka dor jong uta u Mawkordor, hynrei ba ka don jingmut ei ei hangta. Lada dei uba ha ieing ba u la dei ban iathuh bad ba lada dei u briew ba u don jingmut ei ei hapoh jong u ruh u la dei ban iathuh. Ha kata ka jingmut ka la ring jingpyrkhat, ba lada uta u briew uba la leit shim ia uta u Mawkordor u dei u samla uba bit ban shongkurim ia ka, ba ka sngewdon-hok bad ba ka dei shisyndon ban shongkurim ia u lada u mon ia ka, kumba u la pha la ka jingim ban pyllait ia ka na kata ka jinjar suhsat ka jong ka. Ka la pynpaw ia kane ka jingmut ha khmat ki kmie ki kpa bad ka la kren ruh shibun kiei kiei ha khmat jong ki. Ki ruh ki la ia pyrkhat, ki la ia sngewdei bad sngewbha lang ia kata ka jingmut jong ka.

Hadien katto katne sngi ba ki la iabeit lang baroh shiieing ia kata ka jingmut, ka khubor ka la iaid bad ka la poi sha ki shkor jong u paidbah baroh. Kane ka khubor ka la pynkhih jingmut ia ki samla jong kata ka ri baroh kawei, bun kiba la sngew bad la ong ba lada ki la iathuh lypa naduh nyngkong, ba kin jin da la leit iaknieh ia uta u Mawkordor na kata ka jaka iathong, wat lada kan long kumno kumno ruh, namar ka jingbhabriew than jong ka.

Napdeng kita ki samla baroh dei u Lamar-singh uba la buh sni ia ka la slem, u tang shu iohsngew ia kata ka khubor, um nangthiah um nangdem shuh, u la shu pyrkhat hi thriang

kumno ban ioh ia uta u Mawkordor ba un pyn-
hun ia la ka mynsiem ba um ju ngiahshuh halor
kata ka dur babha brierw jong ka, um don ei ei
kano kano ka jingpyrkhat hynrei tang han ioh
ia ka. U long u khun 'riewspah u bym ju reid
ban theh ia la ka jong ka pisa na ka bynta ka
mon jong u. Kumta jar jar napoh u la wad ba
uei uba don ia uta u Mawkordor, ba un thied
wat lada u shongdor katno katno ruh. La dap
artaiew kata ka khih ka wad shitom jong u hynrei
um lap dien satia ba shano uta u Mawkordor u
don. Ha ka taiew kaba lai u la ia kynduh ngong
bad uta u tymmen sharai masi. "Pahep" u la
ong, u la kren jem haduh katta katta namar ba
u ju ia ithuh ithaw bad ba u tip ba u long u
bashong ha ieing jong ka Lyngngaisngi. "Kumno
phi uto u Mawkordor imat u la shu jah rngai mo,
ba um mih shuh katta ruh, haba la katta ruh,
ym man tip satia mano ba la ioh ia u. La
kumno kumno ruh nga imat ba ym don ba ioh
phi ia uta u Mawkordor". "Ym don ba ioh
balei" la ong sa uta u tymmen, "Un sa mih seh,
un jah shano". U la rkhie artad. "Haba nga
peit bad nga sngap ia ki rukom kren jong phi
te imat kumba phi tip ba uei uba ioh ia une u
Mawkordor". La ong u Lamarsingh. "Yn leit
tip shano phi", la ong pat uta u tymmen, "Ban
da tip ym la bna phi ka pyrthei baroh". "Em
phi" la ong pat u Lamarsingh, "Nga imat phi
tip la kumno kumno ruh". "Haoid nga tip" la
ong pat uta u tymmen. "Lada nga tip ruh ngan
leit donkam aiu ban leit tuklar ma nga ia ka kam
jong u brierw, u ioh la ka ioh bad u tip la ka tip

hi kein". "Kata ka jingkren jong phi ka long kaba dei", la ong u Lamarsingh, "Hynrei pahep nga kwah ban kren ha phi shi kyntien lada phi kular ia nga ban nym iathuh hano hano ruh ia kata". "Kren seh", la ong uta u tymmen, "Balei ngan leit iathuh briew sa ia ka bymdei ban iathuh". "Phi i pahep nga kwah ban thied ia uta u Mawkordor, wat lada u rem katno katno ruh, te lada phi lah ban iathuh ia nga ia uta u briew uba ioh ia u, ngan ai buskit ia phi, "Ban iathuh ia phi te da lei lei ruh ngam lah phi ban iathuh, bad kam nyntoi ei ei ruh ia nga ba ngan iathuh ia phi, namar uba ioh ia u um dei satia u nongdie Mawkordor hynrei u dei u nongthied Mawkordor. Khamtam ia kum une u Mawkordor, phin da theh ka spah baroh shi pyrthei ruh un nym ai satia". "To ieh wat iathuh ia nga ia uta u briew, hynrei khie shu leit pyrshang pan ma phi, lada phi lah ban ioh lada uta u Mawkordor u shongdor san hajar tyngka, ngan siew ia phi shiphew hajar tyngka bad lada uta u Mawkordor u shongdor shiphew hajar tyngka ngan siew dor ia phi arphew hajar tyngka". Uta u tymmen u la sdang buaid tyngka. "Ban ioh te kaba eh phi, hynrei ia kaba leit te ngan leit jait ba phi la ong eh kumta, la kumta ruh, sa wan pat lashai phi ngan da pyrkhath bha. Ynda ki la ia kut ka ktien ka thyllied, ki la ia khlad noh nangta.

Uta u tymmen u la pyrkhath baroh shimied namar u la sngewkwah tyngka than, hynrei baroh ki jingpyrkhath jong u, u sngew ba ki shu long kiba long lehnohei namar ba u la tip shai ba u

Lursymper un nym die ia uta u Mawkordor da lei lei ruh. Kat ba ki jingpyrkhat jong u ki nangiaid u nang iohi bad nangniew ia kita ki spah ki hajar ba u Lamarsingh u la pynkbih ia u. Ka kwah tyngka ka la pynpisa bad ka duk-khai ka la pynshoi iaiap ia u, ban pynmih ki jingpyrkhat laiphew ki jingpyrkhat bad ki buit laiphew ki buit tang ban ioh ia uta u Mawkordor. hynrei ki la shu kut noh ki jingpyrkhat jong u baroh ba um lah satia ban ioh ia uta u Mawkordor.

Kum lashai u Lamarsing u la leit pat sha uta u tymmen, bad uta u tymmen u la ong, ba u la pyrkhat kumno kumno ruh hynrei ba un nym lah ban ioh satia ia uta u Mawkordor namar u don ha ka kti jong u briew uba um lah satia ban ioh, kumba u la batai ha u ba un nym die da lei lei ruh ia uta u Mawkordor. U Lamarsingh u la pyrkhat shiphang, kumta hi u la kut jingmut halade ba un khroh ia uta u tymmen ba un leh da kano kano ka buit ne ka lad tang ban ioh ia uta u Mawkordor. U la sdang ban kren ha uta u tymmen, ban khroh ia u ban ioh ia uta u Mawkordor lada da kano kano ka lad, namar u la ithuh ba uta u tymmen ruh imat ba ka jingkwah tyngka jong u ka bym i don pyrthei shuh. Ki la iashong slem slem hangta. Uta u tymmen u la iathuh lut ia ka jingiadei jong u bad uta u briew uba la ioh ia uta u Mawkordor, hangta u Lamarsingh u la pynshai bad pyni ia u bun kiei kiei ba lada u lah ban ioh ia uta u Mawkordor ba un kylla long da uwei pat u briew. Haba slem slem ki la ia kren bad ia pyrkhat shaphang

kane, ka jingkwah lalot khlem hok ka la jop bad kumta uta u tymmen u la kular ban ialeh ban pynioh ia uta u Mawkordor.

Naduh ba u Lursymper u la ioh ia uta u Mawkordor, uta u tymmen bad u Lursymper ki la kham iaieid shibun eh namar u Lursymper u la ioh ia uta u Mawkordor da ka jingiarap jong uta u tymmen, kumta u shaniah haduh katta katta ia u. Ki ju ia peitkai baroh arngut barabor ia uta u Mawkordor, te une u tymmen u tip bha ba haei u Lursymper u buh ia uta u Mawkordor. Ha kawei ka mied uta u tymmen buaid tyngka kumba u la kular ia u Lamarsingh, kumta ruh u la leit khein dukhi khait sha ieing u Lursymper ban leit tuh ia uta u Mawkordor, u la pyrkhat lypa ba lada u Lursymper un lap kumno kumno ba un leh ha khmat jong u kum u ba shu leh kai, namar teng teng u la ju leh biria kai ia u. U tang shu poi ha ieing jong u Lursymper, u la peit u la iohi ba u Lursymper um don hapoh kamra jong u, kumta u la rung sor bad u la rieh khop ha iwei i kyndong iba ym don ba lah ban iohi mano mano ruh, u la shong khop hangta, khlem da sngew tieng ei ei ruh em namar ba kata ka tyngka jong u Lamarsingh ka lah tap lut ia ki khmat, ka la set lut ia ki shkor bad ka lah soplut baroh shi rynieng jong u. Haba u Lursymper u la wan rung sha la kata ka kamra, u la shongkai katto katne por, te namar ba la mied, u la khreh ban thiah noh. Uta u tymmen u nangpeit khliaw nangta na kyndong, u la iohi ba u Lursymper u la loit jain loit nep bad u la sei ia u shabi jong ka synduk jong u ha kaba u la buh ia uta u Mawkor-

dor, u la bsuh ha syngkhlieh kumta u la thiah halor jingthiah. Uta u tymmen nongtuh pohrati, u la shong hi sia hængta khlem jyrhoh khlem jyrham, khlem khih thrit throt ruh haduh shiteng synia. Haba u Lursympet u la iohthiah bha ba um i suba shuh ba un dang iohsngew, u la mih sor nangta, u la par haduh khliehthiah u la sngap ba u Lursympet u la pynhiar mynsiem jynsur bad la iohthiah bha, kumta u la par bad u la plie shwa ka jingkhlang ban ioh phet lada jia kumno kumno, nangta u la leit phai pat sha khlieh thiah, u la bsuh sor ka kti shapoh syngkhlieh u la shim ia uta u shabi bad u la plie sor ia kata ka synduk, u la tba shapoh ka synduk u la shem ia ita i synduk rit iba u la tip ba la buh ia uta u Maw-kordor, u la sei sor ia ita i synduk, u la khang pat ia kata ka synduk bad leit buh pat ia uta u shabi hapoh syngkhlieh, u la mih pat sor nangta bad u da khyrdep pat ia ka jingkhlang. U tang shu lait nangta khlem kyrtiang dien u la her hapdeng ka jingkmien ka bym lah shuh ban ong, u tang shu poi ha ieing u la thiah khop u da kdup bad ia uta u Mawkordor baroh shimied.

Ynda kum la shai ka mied u Lamarsingh u la wan bad uta u tymmen u la iathuh da kaba kmien ba ia u Mawkordor u la ioh bad ba un ai noh ha u kumne kumne, lada u lah ban ai tyngka ia u arphew hajar tyngka. Kumta hi u Lamarsingh ruh da ka jingkmien u la her pat sha ieing bad u la wallam ia kita ki tyngka arphew hajar. Uta u tymmen u la ai ia uta u Mawkordor, bad u la shim ia kita ki tyngka. Ka jingkmien jong ki baroh arngut mar la ka jong ka jong ka jingioh

ka bym lah shuh ban batai, u tymmen buaid tyngka bad u rang buaid samla. Shwa ba kin ia khlad uta u tymmen u la maham jur ia u Lamar-singh ba da lei lei ruh lada iap ne da im rúh ba un nym iathuh hano hano ruh ba ia uta u Maw-kordor u la ioh na ka kti jong u.

U Lursymper kumba u la tip la kham slem ia ka jingmut jong ka Lyngngaisngi ba kan shongkurim ia uno uno u briew uba la ioh ia uta u Mawkordor, kumta u la pyrkhath bad u la sngew ba ka dei ka 'riewkai ba kam dei ka 'riew shisha kumba ma u u la long, namar u hi haduh kata ka por, la katta u la shem hynrei ka mynsiem jong u kam pat shah ba un pyrkhath ban shongkurim ia kawei pat ka briew. Haba u la pynshongnia pynshongnia pat slem slem ia ka jingshem bad jingjia halor jong ka, u la sngew ba ka dei hok ia ka ban leh kumta. Haba u la ngam jylliew hapdeng kine ki jingpyrkhath ka dur bashisha jong ka, ka la wan ha u bad kumta ka la shlei miar ka jingieid halor jong ka. U la pyrkhath jylliew pat shaphang uta u Mawkordor uba u la ioh, u la pynshongnia ha la ka mynsiem ba donkam aiu ia u ban ong ba u la ioh ia uta u Mawkordor bad kumta ba u dei ban shongkurim ia ka, hynrei ba lada u ioh ne um ioh ia uta u Mawkordor ba u dei ban ieid ia ka bad ba ka ka dei ban ieid ia u.

U Lursymper haba u la pyrkhath pyrkhath u la sngewdei ba ia uta u Mawkordor la dei ban leit pyni ia u ha khmat ka Lyngngaisngi khnang ba kan tip ba uba la ioh ia uta u Mawkordor dei u briew u bym shym la mut ban leit shim ia uta u Mawkordor tang ban ioh shongkurim ia ka,

hynrei ba u la long tang u briew uba la shu kwah ban pyllait ia ka na kita ki jingjynjar jong ka Kumta hi u la phah khot ia uta u tymmen, uta u tymmen u tang shu poi ha khmat jong u Lursymp- per. ka dur khmat jong u ka shu thangiong ngain, namar wat u la ioh kata ka spah hynrei ka jing- shon hapoh ka mynsiem jong u ka bym lah batai shuh. U Lursymp-er u la kylli ia u, balei ba ka dur khmat jong u ka la long kumta, lehse ba um shait bha, uta u tymmen u la jubap ba um shym sngew ei ei, kumta hi u Lursymp-er u la ong. "Peit pahep kumba ngi la ia tip ba kiba ha ieing jong I Lyngngaisngi kin pynshongkurim ia I Lyngngai- sngi bad uno uno u briew uba la ioh ia une u Mawkordor, phi i pahep, nga hi da lade ngam kwah ban leit pyni ia une u Mawkordor, namar ngam dei u briew uba la leit shim ia une u Maw- kordor tang ban ioh shongkurim ia ka briew hynrei ban pyllait ia ka na ki jingjynjar jong ka, kawei pat ngam kwah bad sngewtynnad ba mynta hi mano mano ruh kin tip ba nga dei uba la leit shim ia uta u Mawkordor, hynrei ai ba ka pyrthei kan sa tip hadien bad hangta ai kan sa jia katba ka jia. Mynta pahep, ngan ai ha phi ia une u Mawkordor bad phi sa leit pyni ha ka, lada ki kylli kumno ba u la ioh ia uta u Mawkordor ne mano ba la leit shim ia uta u Mawkordor, phi shu ong tang katne, ba uba la leit shim ia une u Maw- kordor, dei uta u briew uba la sngew na ka bynta jong phi, ym dei satia u briew u ban da kwah bainong ei ei na phi, bad ong ha ki ba mynta phi la long kaba laitluid, wat ap shuh ba phin da siewspah ba phin shongkurim ia uta u briew uba

la ioh ia une u Mawkordor kumba phi la ia mut baroh shi-ieing, kumta kumba phi la long kaba lait-luid ba phi lah ban shongkurim ia uno uno u briew uba phi mon ne phi lah ban leh kano kano kaba long ha ka mon jong phi. Lada ki kylli bniah ban tip ia u briew uba la ioh ia u, phi shu ong, ba ki briew kiba ia sngewlem na ka bynta jong phi kiba la ioh ia une u Mawkordor. Lada jia ba ki tyrwa ban ai buskit ei ei ia phi, phi wat shim wat tang shipisa ruh, hynrei ia kata kaba ki tyrwa ma ki, baroh ngan siew ma nga ia phi, phi tang shu lah pyni ia u Mawkordor sa wallam noh ia u sha nga". U la ieng artad nangta u la shim ia u shabi synduk bad u la plie ia kata ka synduk ban sei ia uta u Mawkordor, u la kyndit da ka jingsngewlyngngoh haduh katta katta ba uta u Mawkordor um don shuh hapoh kata ka synduk. U la shu ieng lyngngoh shiphang, kumta u la ong, "Pahep, shano u la jah noh uto u Mawkordor, um don shuh hapoh kane ka synduk". U la shu ieng lyngngoh thangiong ngain, ba shano u la jah uta u Mawkordor. Uta u tymmen ruh haba u la peit ia u Lursymper ba u la kylla dur kumta, ka la dungngak ia ka mynsiem jong u, bad u ruh u la thangiong ngain hangta. "Ngin ialeh kumno pahep haba kum kane ka jingjia ka la wan jia". "Ngin ialeh kumno phi", la kren kyndit uta u tymmen. "Ngin ia wad kein shano un shu jah napoh ka synduk jong phi". Hapdeng kata ka jingsngewlyngngoh ka bym sngewlah pyrkhath shuh, u Lursymper u la ong, "To khie pahep ngan da wad bha,

ioh nga kum buh bakla hawei hawei pat”.

U Lamarsingh haba la katto katne por ba u la bat ia uta u Mawkordor ha la ka kti, u la sngew ba ka long kaba dei ia u ban pyni ha la kiba ha ieing bad ki lok ki jor jong u ia uta u Mawkordor, khnang ba kin tip bad ba kiwei kiwei ki brieruh kin ia bna bad tip ba dei ma u uba la ioh ia uta u Mawkordor.

Hadien katto katne por kata ka jingleh jong u ka la pynbna shaw ha u paitbah baroh, ba dei u Lamarsingh uba la ioh ia uta u Mawkordor jong kata ka jingiathong. Kane ka khubor ka la leit poi ruh sha ki shykor jong kiba ha ieing jong ka Lyngngaisngi. Ki haba ki la tip ia kata ka khubor, kum ka jingsngewburom, ki la phah khot sngewbha ia u ba un wan kai sha ieing jong ki ba kin ioh leh burom ia u, u ruh kumba u la thmu, kumta u la dap da ka jingsngewtynnad bad sngewbha ka bym lah batai shuh ia kata ka jingleh jong ki, bad kumta ruh ha kawei ka sngi u la leit kai sha ieing jong ki kumba ki la khot sngewbha ia u.

Haba u la poi hangta ha ieing jong ki u la dap da ka jingphuhkmen ka mynsiem namar ki jingpyrkhat jong u baroh ka la long shaphang jong ka Lyngngaisngi, ba un sa shimti ia ka ha kawei ka sngi. Kiba ha ieing jong ka Lyngngaisngi ruh haba u la poi ha ieing jong ki, ki la pdiang da kaba sngewbha ia u. Haba ki la ia shongkai katto katne por, ki la sdang ban iapur shaphang uta u

Mawkkordor, ba ki la sngewburom ia u haduh katta katta ba u la pyllait ia ki na kat kata ka jingshitom mynsiem jong ki. Ki la kwah ba un iathuhkhana ba kumno u la ioh ia uta u Mawkkordor, hynrei um iathuh satia, u la shu ong ba un sa iathuh pat ha kawei ka por. U la ong ruh ha ki, ba kata ka jingleh jong u baroh ka la long ba u kwah ban pyni ia la ka jong ka jingsngew ba um sngewlah ban shah ia ka jingleh than jong ki briew bad ia kata ka jingshem. shitom mynsiem jong ki. Haba ki la iabam iadih bad iashongkai iathuhkhana slem slem, ki la ia khlad noh ki da ong ia u ba un wan kai sha ieing jong ki barabor, u ruh u mynjur sngewiahap jingmut ia kata ka jingong jong ki.

U Lursymper naduh kata ka sngi bajah uta u Mawkkordor na ka kti jong u, u la dap da ka jingsngewsih bad jingklusai kaba ym nang shuh ban batai, khamtam haba u la tip ba uta u Mawkkordor u la leit poi sha ka kti jong kiwei pat. Hapdeng kata ka jingsngewsih pisa mynsiem u la phah khot ia uta u tymmen bad uta u tymmen ruh u la wan. Haba ki la ia shongkai katto katne por, u Lursymper u la kren ha uta u tymmen ba u la sngewlyngngoh shibun eh ba uta u Mawkkordor u la shu jah noh na ka kti jong u bad ba u leit poi sha ka kti jong kiwei pat bad u la ong, "Ngam lah sngewthuh shuh ba kumno kane ka la jia, hynrei ngan leh kumno ngan shu pynkut noh kein ia kine kiei kiei ha ka nusip kaba lathoh ia nga". U Lursymper u la don

ka jingsuba kaba jur halor uta u tymmen ia kane ka jingjia, namar ba ym don batip mano mano ruh ba uta u Mawkordor u don ha ka kti jong u Lursympet lait tang uta u tymmen, hynrei um kwah ban pynpaw ei ei ha u, namar um da tip ia ka jingshisha mano ba la leh ia kane. "Pahep" u la ong, "Ngan nym sngew ei ei ia kaba la jia, la dep, ngan nym lah ban leh ei ei shuh ia kane namar ngam kwah ban kam bad pynshisha ba uta u Mawkordor u dei u jong nga hynrei nga sngewhun bad nga sngewbha ha la poh mynsiem ba nga la pyndep ia la ka jong ka kamram ba nga la pha ialade ba nga la leit shim ia uto u Mawkordor bad ba nga la pyllait ia i Kong Lyngngaisngi". "Pahep" u la ong pat, "Nga sngew ba nga ieid ia phi kum la u jong u kpa, bad kumta ba phin ong, bad pan na nga kano kano ka jingpan na ka bynta ka jingimsuk-imsain jong phi, ngan ai bad ngan leh na ka bynta jong phi, ia kaba nga nga lah ban leh. Ngam lah klet shuh ia ka jinglehbha jong phi, ba phi la iarap ia nga naduh ka mynsiem ba nga la ioh ia uto u Mawkordor, kam pher wat lada um don shuh bad nga, hynrei ia ka dor jong ka jinglehbha jong phi ia nga nga dei ban siew bad ba ngan nym klet ia phi lano lano ruh. Mynta nga sngew-sih shibun ban ong, ba hadien kane, kumba nga la khein ka burom ba nga la duh ia uto u Mawkordor hok jong nga, ba ngan phet nob syndon sha jngai bak bad ngan nym wan phai pat sha kane ka jaka haduh ba ngan

da khlad noh na kane ka pyrthei bad kumta phin nym lah shuh ban iashem bad nga. Pan pahep kaei phi kwah, ia kaba nga lah ban ai ngan ai ia phi.

Kane ka jingkren jong u Lursympet ka la dung ngak ia ka dohnud jong uta u tymmen haduh ba um nangkren shuh kumno kumno ruh, khamtam nador ba katta ka jingshem jong u, hynrei u la kren da ki ktien bha ktien miat suda bad leh bha ia u. U la jubap ia u Lursympet bad u la ong, "Ngan pan ia kita ki jingpan kiba phi la tyrwa ha nga, hynrei shwa ba ngan pan ia kita ki jingpan ba phin sngewbha ban sngap khyndiat ia ka jingong jong nga, kumba nga la long uba ngeit bad kohnguh ia phi naduh kaba sdang, kata ka jingong jong nga ka long kane ba phin sngewbha ban nym lap lah ban phet iamrem noh, kumba phi la ong, tang namar kane ka jingjia, namar haba uto u Maw'kordor u dei u jong phi, kan pher aju wat lada u don ha ka kti jongno jongno ruh, un leit shano, u dei hi u jong phi"

Haba ki la iakren slem slem shaphang kata ka jingjia, u Lursympet u la sngap ia kata ka jingong jong uta u tymmen bad kumta ki la ia khlad noh nangta. U la ong, "To khie pahep, ngan da wad bha ioh nga kum buh bakla ha kawei pat ka jaka namar haduh mynta ngam don jingngeit skhem ba uto u Maw'kordor jong nga un leit poi sha ka kti jong kiwei pat, lehse uta u Maw'kordor uba la pynbna ki briew u la dei da uwei

pat bad kumta kan sa paw hi ha kaba khatduh.

Haba uta u tymmen u la poi ha ieing u la shong pyrkhat bad u la babe ia kata ka kam sniew jong u, kaba u la nud ban shukor tuh lyndet ia uta u Mawkordor. Katba ka por ka nangslem katta ki jingpyrkhat jong u ki nang ngam jylliew bad ha kaba khadduh um lah shah shuh ia kata ka kam sniew jong u, bad u la kut jingmut ba la kumno kumno ruh ba u dei ban pynioh pat bad pynphai ia uta u Mawkordor sha u Lursymper. U la khein ia kita ki tyngka kiba u la ioh na u Lamarsingh bad u la shem ba ki la duna bad la pynlut kumba shi pawa ne na kaba u la ioh, hynrei ia kane u la kut jingmut triang ba la kumno kumno ruh ba u dei ban pynioh ia kine ki tyngka bad ban leit siew noh ia uta u Mawkordor na ka kti jong u Lamarsingh.

Kum lashai dangstep phyrngap u la khie namar ka jingsngew jong u kam aithiah aishong shuh ia u. U tang shu khie u la mih bran bran ban leit sha ieing u Lamarsing ban leit pan siew noh ia uta u Mawkordor na ka kti jong u. U tang shu poi u la lap ia u Lamarsingh ha ieing, bad u la ong ha u ba un sngewbha kein ba la kumno kumno ruh, ba un sngewsynei ia u ba un ai siew kylla noh ia uta u Mawkordor sha uta u tymmen, namar u la ong, ba u la ioh ia uta u Mawkorkor da kaba u shu leit tuh na ka kti jong kiwei pat, u la ong ruh ba lada um ai, kata ka mut ba u un poi sha ka kam ka ban lyngngoh, kaba

long ka kam iap bad kam im, namar ki la shem ka sabut kaba biang ba u u la tuh ia uta u Mawkordor na ka kti jong ki. U Lamarsingh u la sngap shiphang, hadien u la jubap, u la ong ba u la sngewsih shibun ba ka la long kumta, hynrei u la ong, ba u la sngewsih pat ban ong, ba wat lada kan long kumno kumno ruh ba ia u Mawkordor uba u la thied bad ba ki la tip baroh ba u don bad u, ba un nym lah da lei lei ruh ban pynphai pat shano shano ruh. Uta u tymmen u la kyrpad ba u dei la kumno kumno ruh ba un ai noh namar ka long ka kam iap bad ka kam im ka jong u, ba lada un nym ai te kata ka la poi ia u sha kaba lyngngoh. U Lamarsingh u la ong ha uta u tymmen ba un nym kren bun kyntien shaphang kane namar ba ia uta u Mawkordor hi ba un nym pynphai noh da lei lei ruh, wat lada un dkut noh u ryndang jong u ruh namar ia kaba u la thied, kata u la thied, ba u lah ban ai shuh da ki pisa ia u lada u donkam hynrei ban pynphai ia uta hi u Mawkordor ba da lei lei ruh em bad ba un nym kren bun kyntien shuh. Kumta uta u tymmen u la shu mih noh nangta na ieing da ka jingdiaw bad jingsngewsih mynsiem kaba ym nang shuh ban batai.

U Lamarsingh hadien kata ka por ba kiba ha ieing jong ka Lyngngaisngi ki la phah khot ia u shisien, u la dem leit kai la bun wat; bad kumta ka jingiajan jong u bad ka Lyngngaisngi ka la long haduh katta katta. U la

sngewskhem haduh katta katta halade ba ym don balah shuh ban pynkhih mano mano ruh ia kata ka jingiadei jong u bad ka Lyngngaisngi, namar ba u la peit bniah bha bad u la shem ba um idon jingpher ei ei ne don ei ei kaba uta u tymmen un iathuh ei ei ia ki jingjia shaphang jong u bad uta u Maw-kordor. U la ngeit ruh ba da lei lei ruh uta u tymmen un nym nud ban phla ha ki briew kat kata ka kamiap-kamim kaba u la shu leit tuh na ki briew kumba u la iathuh ha u.

Uta u tymmen wat la u la iohi ia ki jingeh ba un ioh pat ia uta u Mawkordor hynrei hapdeng ka jingpaitdohnud ba u la shukor ia u lok bashisha, u la shu kun jar ha la poh mynsiem ia kaei kaei baroh kaba u la pun. Ka kam kaba u la leh ha kane ka por ka la long ba u la kham pynjan, kohnguh bad shakri hok ia ka Lyngngaisngi haduh katta katta. Hapdeng kine ki por, da ki rukom jingleh jong u, ka Lyngngaisngi ka la khot ia u ka la ong, "Ngam sngewshuh ia phi kum u nongtrei, hynrei nga la sngew ia phi kum la u jong u kpa ba phin pyni, pynmai bad pynsneng lem ia kaei kaba phi iohi ba nga leh bakla. namar nga tieng ba nga la shem than shibun kiei kiei ha kane ka pyrthei, kiba la pyniam kthang ym tang ia nga, hynrei ia ka ieing ka sem jong nga baroh kawei". "Hep Lyngngaisngi", La ong uta u tymmen, "Lada phim kren ma phi kumta ruh ka jingsngew jong nga ka long hi kumta, katno nga jinjar ka mynsiem haba phi

phi shem jinjar bad katno ka jinjar ka myn-
 siem jong nga haba ka ieing jong phi ka
 shem jinjar, shaniah ha nga hep Lyngngai-
 sngi ia kiei kiei baroh, nga long u nongtrei
 tymmen ban shakri hok ia phi ngam dei satia
 u nongtrei tymmen u ban shukor lane u ban
 nym ialeh ban pynpoi ia phi sha ka lynti
 basuk bad hun mynsiem jong phi, u shiah
 uba nep tam bad ka syrti kaba nep tam ki
 ap wat mynta ruh ba kin dung bad kin ot
 ia phi shwa ba phin ioh ia kata ka jingkor-
 dor tam jong ka jinglong samla jong phi.
 Kin dung bad kin ot hynrei phin iohi bad
 phin ioh ia kata ka jingshisha. Lada phim
 iohi bad ioh ia kata. ai ba ka jingim jong
 nga ruh kum u 'riew tymmen bahok jong
 phi, kan leit noh ha kata hi ka khyllipmat
 ba nga nga iohi ba phi phi duh noh ia ka,
 nador kata, wat kren ne kylli ei ei shuh ia
 nga hep Lyngngaisngi".

Ki ktien jong uta u nongtrei tymmen ki la
 dung ngak ia ka dohnud jong ka, bad ka la kren
 hapoh mynsiem, "Haei ka jinghun jong ka jing-
 long samla jong nga kan long pat haba nga la
 sngewthuh shai mynta ba nga dei ban aiti ia la
 ka jong ka met basotti jong nga, ha kata
 ka jingaiti kaba khlem ka jinghun mynsiem bym
 ju kut shuh jong nga, kumba nga dei ban aiti
 khlem ka mynsiem ia ki bynta jong ka met
 barieh tam jong nga, ha ki shympriahkti ba kner
 rieh, kiba ngam banse ban shah pynjem la ka met
 ryngkat ruh ki shympriahkti jong nga kin kner
 lem na ka bynta kaei kaei ka jong ka jinglongdoh

jong nga. Hadien ba kine kiei kiei ki la kut sngewbha, ba nga pat ngan jaw ki ummat kthang hangta" Ka la jaw ummat marwei marwei hangta. "Lursymper", ka la kren ha lapoh mynsiem, "Shish ki la shu longlehnohei baroh kiei kiei ki jingkordor jong kane ka pyrthei haba phi phim mon, phi ibein bad phim treh satia ban kner la ki jong ki shympriahkti halor jong ki bynta barieh tam jong ka met ka jong nga" Kumta ki la shu kut noh ki jingmutdur jong ka, ha ki jingkthang mynsiem bad jingiohthiah halor jong ki jingphohsniew kynsha.

Ki sngi bad ki por ki la nangiaid ka pyrthei samla jong u Lamarsingh ruh ka la nangiaid phuhkmen ba ka la nangjan-nangjan ka sngi ia u ba un ioh kynthup ia ka Lyngngaisngi U la leit kai khah-khah sha ieing jong ka, bad ka ruh ha kata ka por haba la bun ki jingpynroh-jing-pynkmen ba tyllup na baroh sawdong, kumba ka la long ka dohnud kynthei, kumta ka la kham klet khyndiat ia kata ka pyrthei ba la leit noh jong ka bad u Lursymper. Ka la pyrkhath ruh ba kumba ju ong lem ki briew ba ia ka nusip ba la thoh, ba lada ka jia kumno kumno ruh, dei ban shu sngewhun. "Shisha" Ka la ong, "Ka long kaba dei, kumba sneng lem ki paralok parajor ba ka bymdei ban pynsngewsih-pyntlor ei la ka mynsiem bad ka longrynieng haba ka nusip ka lathoh ha kane ka pyrthei ia-im kai tang shiphangsngi."

Baroh ki jingjia ba man la ka sngi ki jong ka Lyngngaisngi ki la leit rung lut ha ki shkor jong u Lursymper. Ka kthang ka mynsiem jong u ba

um sngewlah ban pynpaw haduh kaba kut ba dei ma u uba ieid hok ia ka bad uba la pyllaät ia ka na kiei kiei baroh, namar u la jah noh uta u Mawkordor uba long ka sakhi tynrai jong u. U la ju pyrkhat ba u dei ban kam shisyndon ia uta u Mawkordor ba u dei u jong u, hynrei haba u pyrkhat-pyrkhat pat ba ym don ba tip mano mano ruh ba u dei ma u uba la leit shim bad la pha la ka jong ka jingim na ka bynta uta u Mawkordor hynrei tang uta u tymmen, kumta u la sngewartatien ba u lah ne em ban pyni ia ka jingshisha tang da uta u tymmen marwei, nador kata um sngewngeit thikna ba uta u Mawkordor ba la ioh u Lamarsingh u dei shisha uta u Mawkordor jong u uba la jah noh. Nador kane u la pyrkhat jylliew ba dei na ki daw jong u, ba la mih ka jingkulmar bad jinjar halor ka ieing jong ka Lyngngaisngi bad kumta u la pyrkhat rangbah ba ka long ka bym dei satia ia u kum u 'riew rangbah uba ieid shisha ia ka ba un pynkulmar bad pynshem jinjar pat sa shisien ia ka, wat lada ka long ka jingduh bad ka jingsngewjahburom kaba ym lah ban batai shuh ha ka jingim jong u. Haba u la pyrkhat pat slem slem, u la sngew ba ka long ka bym lah long satia kata ka jingshah leh jemrngiew kaba haduh katta katta, ba kat haduh kata ka kam iap kam im u la leh na ka bynta jong ka, ba un shu sngap khlem da pynshai ha madan bad u sngewingkhongkhait ruh ia kata ka jingjah noh jong uta u Mawkordor na ka kti jong u kaba la pynpang bad pynkthang ia ka mynsiem jong u. Kumta hi u la kut jingmut ba u dei ban da iashai kdar, ba uta u Maw-

kordor uba u Lamarsingh u la ioh ba u dei shisha ne em uta u Mawkordor jong u, ba lada u dei ba u dei shisyn don ban kam ia u.

Mar kumta hi u Lursymper um lah shah shuh u la phah khot ia uta u tymmen bad uta u tymmen ruh u la wan. Ki la ia kren bad ia pyrkhat shibun kiei kiei, uta u tymmen um lah shah shuh, u la ong, "Dei ma nga uba la pynlong ia kine kiei kiei baroh, lada phi pyniap-pynim ruh, dei ma nga uba la tuh ia unc u Mawkordor na ka kti jong phi, da ki jingpynshoi jong u Lamarsingh bad jingbymtip briew shuh jong nga ha ka jingkwah tyngka, hynrei hadien ba nga la kyndit hynriew, nga la leit nguh leit dem ia u ba un pynphai noh ia uta u Mawkordor bad ba ngan siew palat ban ia kaba u la siew ia nga, hynrei um sngap bad um ai satia ia uta u Mawkordor, kumta nga la kut jingmut ba wat lada um ai da kaba nga shu nguh shu dem ia u ruh, hynrei ba nga dei ban pynioh pat ia uto u Mawkordor jong phi, wat lada nga dei ban iap ne ban im ruh. Mynta to leh ia nga katba phi sngewbit namar nga dei ban phla ia kaei kaba nga la leh sniew halor jong phi uba la leh bha ia nga". U Lursymper um nangkren shuh kumno kumno ruh, u la shu sngap kum uba lyngngoh namar um shym phohsniew da lei lei ruh ba kum uta u tymmen un nud ban leh ia u kumta. Slem hadien kane u la kren kumba lyngngoh. "Kumno pahep phi nud ban leh ia nga haduh kat kata". "Ngam tip shuh" La ong u tymmen. "Ba kumno nga la nud, hynrei ia u Mawkordor uba nga la tuh na ka kti jong phi nga dei ban

pynphai pat ruh ha ka kti jong phi. Nga la long uba la nud palat, phi la dei ban pyniap noh kum ia nga une". U la kren ia kine ki ktien da kaba jaw artad bad ki ummat. "Hynrei lada phin pyniap ia nga ruh kan nym don jingmyntoi ei ei ia phi. Phi ieid bad shaniah ia nga bad kata ka jingieid bad shaniah jong phi kan siewdor ia phi da shisha, wat lada shisien mynta ka la shet ka jingbakla". Hadien kane ki la shu iakhlad khlem nangiakren shuh.

U Lursympet ha kata hi ka mied da ka jingsngewsuhsat bad dom mynsiem u la khreh ban leit iashem ia ka Lyngngaisngi, u la leit bad tang shu poi ha ieing ka Lyngngaisngi u la shem ba la khang ieing namar ba la meid, hynrei ka jingkhangiit jong ka kamra jong ka Lyngngaisngi ki dangshai sharak, u la leit sha kata ka jingkhangiit khlem don jingsngew ei ei ruh em, u la peit ym i don mano mano ruh em, kumta u la tied ia ka jingkhang. Ka Lyngngaisngi ruh tang shu tied ka la iohsngew, ka la sngap shiphang, bad kumta la riew pat kata ka jingkhang, ka kam shym pyrkhat ei ei ruh em ka la shu tharai ba dei kiba ha ieing, bad kumta ka la ieng bad ka la plie ia ka jingkhang. Ka tang shu plie ia ka jingkhang, u la rung lut ha ieing, ka tang shu iohi ba dei ma u, ka la kyndit kynsan bad ka la shu ienglyngngoh hangta, khlem nangkren shuh shi kyntien ruh. U Lursympet hangta u la ong, "Balei Kong Lyngngaisngi, phi tieng ia nga, wat sngew ei ei nga shu wan kai sngewbha, namar ba nga dang poi shen bad namar la slem ngam ju iashem shuh ia phi, nga shu kwah ban

iashem bad ia khublei bad phi". La katta ruh kam nang jubap satia ia u, ka shu peit tang ki khmat. Kumta u Lursympet u la shim ka jingshong bad u la shong hangta.

Hadien katto katne por ka sa kyndit bynriew, ka la khang ia ka jingkhong, namar ka don ka jingsngew kaba khraw ban tip mano mano, ba u samla un wan rung mynmied ha kamra thiah jong ka haba ka pyrthei baroh ka la bna wer wer ba kan sa iateh ktien bad u Lamarsingh.

Hadien katto katne por ka la kren ia u bad ka la ong, "Mynno phi wan?" U Lursympet ruh u la jubap ba u dang shu wan hi. Hadien kane da ka jingiakynduh mynsiem ha la ka jong ka jong ka dohnud ki la shu ia sngap slem slem khlem ia kren shuh shi kyntien ruh. Slem nangta u Lursympet u la ong, "Phi shait phi koit bha." Ka ruh ka la jubap bad ka la kylli pynbud lem ruh ia ka jingkoit jingkhiah jong u, bad ka la kylli ruh ba kumno u la wan phai pat sha kata ka jaka haba la katta snem u la jah, u ruh u la jubap u la ong, "Ka jingmut jong nga ka la long ba ngan nym wan phai shuh sha kane ka jaka hynrei ka jingim jong ka jinglongbriew haba dang sah ka mynsiem, ka shu poi da ka kam kaba ngam lah satia khlem da wan, ka jingwan ruh ka long ba ngan tang shu poi bad dep kam, ha kata hi ka khyllipmat ngan leit phai noh. Ngam shym mut ei ei ban wan sha ieing jong phi namar nga tip bad ngeit skhem ba phi la don hapdeng ka khet ka bishna, hynrei haba nga la poi hangne ha shnong nga la ioh-

sngew na ka khubor ka sim ka doh ba rah ka khlieng ka tyngab, ba phi dang long marwei bad haba nga wad ia ka jingshisha, nga shem ruh ba ka long kumta, kumta nga la nud ban wan sha phi kum u para-shnong para-thaw paralok-parajor kum ka jingkhublei iashem bad jingkhublei iakhlad namar nga tharai lashai ne lashisngi nga dei ban leit noh". U la kren katta tylli ki ktien ruh, hynrei kam da iohsngew bha satia ia kita ki kyntien jong u, namar u dohnud jong ka u lah kylla pyrdet ka tang shu iohi ia ka dur khmat jong u. "Ngan shu leit noh kong Lyngngaisngi, nga la sngewbha ba nga la ioh iashem bad phi ha ka jingkoit-jingkhiah, jingsuk-jingsain, namar lehse ngan nym lah iashem shuh bad phi, kumba phi tip ba nga don sha ka ri kaba jngai bah". U tang shu kren ia kine ki ktien ka la kyndit bynriew he, ka la klet noh ia kiei kiei baroh, ka la klet ruh wat ia kata ka kam kaba kan sa iateh ktien bad u Lamarsingh. "Kumno phin shu leit noh haba phi dang shu rung kumne ruh, shong seh, da iathuhkhana khyndiat, ba kumno phi la leit, kumno phi la wan, kumno phi la shong, kumno phi la sah bad kumno phi la wan poi pat shane". "Ngam don khana ei ei kong Lyngngaisngi nalar kaba phi phi la tip bad nalar kaba nga nga la tip, bad kumta namar ba la mied ngan shu leit noh". U la ieng artad joit. "Khublei shibun eh ia phi", u la ong. "Em", ka la ong, "Kumno phin shu leit noh, ei ei ruh phi khlem jubap ia nga, "Niuma", ka la ong, "Haba phi la ieng kysnan ngan nym lah ban bat ia phi mynta, hynrei ba

lada kumno kumno ruh, ba phin nym pep khnang ban wan lashai ka mied namar shisha phi phim don ei ei ban iathuh nalar kaba phi phi la tip bad nga nga la tip. hynrei nga nga don shi pyrthei kiba nga ngan iathuh ia phi, kaba phi lehse phim shym la tip” “Niuma”, u la ong, “Ngan sa wan lada nga dangsah, hynrei wat sngew ei ei ia nga. lada nga la leit noh”. Kumta u la mih noh artad nangta na ieing jong ka.

Ka Lyngngaisngi u tang shu mih noh ma u, ka la sngewba kita ki jingjia ha kata ka khyl-lipmat, ba ki long tang kum ki jingphohsniew. Ka la shong pyrkhath shiphang, ba u dei shisha u Lursymper, uba la wan hangta ne ba ka shu i ramia. ka la pyrkhath pat sa shisien. “Em”, ka la ong, ba lada u dei u Lursymper bashisha un nym jin da la ieh noh ia ka marwei hangta, hynrei un jin da la shong, iathuhkhana pyntngen ia ka. Haba ka la shong pyrkhath slem slem ia kane, ka la pyrkhath ba ka dei tang ka jingiohi ramia, kumta hi ka la leit sha la ka kmie ka la ong, “Phi la ioththiah mei, lajan shai mynta, nga ruh nga la ioththiah te phi, nga la iohi ramia bad phohsniew kynsha kaba ngam sngewthuh sngewthaw shuh” “Phi iohi aiu khun”, ka la kren kyndit ka kmie. “Phi mei, i Lursymper phi i wan ha kamra jong nga, ka dei shisha ne nga shu i ramia phi mei” Ka kmie haba ka la peit ia la ka khun ka la shu jaw ummat, namar ba ka la tip ia kiei kiei baroh kiba la jia halor jong ka bad u Lursymper bad ka la ong, “Em phi khun, nga tharai ba phi la

shu i ramia, namar ba phi la pyrkhat than". "Em phi mei, nga da iakren bad nga da iohi shisha te". *Ka jingieid kaba la shim lut ia ka mynsiem khlem ki jingpynkut noh jong ka, ka ju pynlong kumne ia u samla ne ka samla.* "Phi iohi khun" La ong ka kmie, "Ba la mied khie leit thiah noh, lehse ka lah ruh ban long kaba shisha". "Ka lah ruh ban long kaba shisha mo mei, to kata ngan shu leit thiah noh ba la mied". "To khun", Ka la ong hapdeng ka jingpait mynsiem haba ka la iohi ia ka jingjia ba ka wan jia pat kum kata halor la ka khun baieid bad kohnguh jong ka.

Ka Lyngngaisngi baroh shimied ka shu dap da ki jingpyrkhat khlem da iohthiah shuh. Ka lashem ba u dei u Lursymper ba shisha bad ba kumno ba u shu leit noh ha ki jingkren kiba tang shi kyntien bad arkyntien. Kumta ka la shu pynshai bor ia kata ka mied kaba kam lah ban rai ba ka dei ka mied bathiang ne ka mied bakthang jong ka. Kumta ka la shai phar bad ka sngi ka la mih. Katno ka la sngewtynnad ba ka bneng ka la shai, namar ba ka kwah hir hir ba kata ka sngi kan leit noh kloi kloi bad ba ka mied kan wan namar ka la ong ia u, ba un ym pep ban wan kum lashai ka mied. Kata ka sngi ruh wat lada ka la sngewslem katno katno ruh, ka la dei ban kut kat kum ka por jong ka, bad kumta kata ka mied ka la wan. Ka la bam la dih dangshai, ka la leit sha ka kamra bad ka la pynshai la ka jong ka sharak, ka la pynshah la ki shkor shaphang jingkhang ha man la ki khyllipmat, da ka jingkhmih lynti ban

sa riew tok-tok ka jingkhong. Hynrei shiphew baje ruh em, khadar baje ruh em, shi baje ruh em, ar baje ruh em, lai, saw san baje ruh em, kaba pli khlem thiah baroh shimied haduh ban da shai phar, uta u Lursympem um man wan tied jingkhong satia. "To ieh". ka la ong ha la poh mynsiem, "Nga kaba ju shah ngan shah ha ban da biang". Baroh shisngi kam nang ban leh ei ei ruh hynrei ka shu pyrkhath jylliew ia kata ka jingiashem jong ka bad u. Haba ka la pyrkhath pyrkhath ka la sngewthuh bad ka la ngeit ruh ba la kumno kumno ruh u la leit phai noh kumba u la ong, ba un leit phai noh sha kata ka ri kaba u dei ban leit phai, ha ki jingkhren artatien ba u lah ban wan iashem pat bad ka lada u dang lah ban sah hynrei lada um lah ban sah shuh kata ba kan nym khmih lynti ei ei shuh ia u. Kine ki ktien bad kita ki jingjia ki la pynthain khulai ia ka dohnud bad ka mynsiem jong ka pat.

Haba la kem dum bad iongrein ngain. ka la kiew ha la jingthiah namar ki jingthait jong ki jingpyrkhath jong ka baroh shisngi. Hamar ba kan sa ioththiah, kyndit kyndit, la riew ka jingkhong tok-tok, ka la sngap, la riew pat sa shisien tok-tok, ka la khie joit naba thiah, ka la plie ia ka jingkhong ha ka jingkhmen lyngngoh kaba kam sngewthuh sngewthaw shuh bad khlem da kynmaw shuh ialade, ia la ki kmie ki kpa bad ia la kata ka jingjia kaba kan sa iateh ktien bad u Lamarsingh kaba la bna baroh ka pyrthei ia ka ban saja halor jong ka. "Rung sieh" ka la ong, "Nga la khmih lynti ia phi naduh

hynnin hynrei phi wan poi haduh mynta" U la rung ka la peit liep, thred ka la kyndit, da u Lamarsingh, une dngung. Ka la kylla bad dur bad dar bad kam nang leh shuh kumno kumno ruh hangta. U Lamarsingh ha la kata ka jing-sngewtynnad than ia kata ka jingkhmih lynti jong ka ia u, namar mynno mynno ruh wat la ka pyni ka khmat sngewbha hynrei kam ju kren ki ktien jem 'tien ieid kum ha kata bad kumta u la shong bad u la ong artad, "Nga la mut ban wan hynnin kumba phi la khmih lynti, hynrei lap mied noh. Phi khmih lynti, nga tharai phi donkam ei ei ia nga, ne balei?" Haba ka la liat ka ktien, kam nang shuh ban kren kumno kumno ruh, ka la shu ong, "Em phi, nga la shu khmih lynti namar ba nga sngewshitom ka met khyndiat". Ka da bat artad la ka kupar 'mat bad dem sha khyndew namar ba kam kwah ban pyni ha u ia la kata ka dur khmat ba sngewsih bym lah len shuh jong ka. U la tur shajan bad u la ong, "Ngan leh kumno ban iarap ia phi, haba phi shitom kumta". "Em phi", ka la ong, "Koit ngam lei lei tang ba phi la wan nga la sngewtynnad, te namar ba nga sngewshitom than, to ieh ngan shu thiah noh shwa khyndiat". "To thiah", u la ong, "Ba phin dup jem noh, nga ruh ngan leit shongkai noh bad i mei jong phi" Kumta u la mih noh nangta bad u la leit rung sha ka kmie, bad u la iathuh ia kaei kaba la jia ba u la shem hangta ha ieing. Ka kmie, u tang shu iathuh, namar ba ka long kaba sian bad shalak, wat la ka long ka bym tip ei ei ruh shaphang kata ka jingud jong ka, hynrei ka

la jubap bad ka la ong ha u ba naduh hynnin hi imat ka la ioh baionghlieh, kumta hi ka la ong ha u ba kan da leit peit jang jang. Haba ka la leit peit ka la shem ba kam shym lei lei satia, ba ym dei ba ka pang kumba la ong u Lamarsingh. Ka la shu sngewthuh ia kiei kiei baroh halade bad ka la wan iashongkai noh bad u Lamarsingh bad ka la shu ong ha u ba imat ba ka la kham jem bad ba ka i kumba kan sa iohthiah. Haba ki la iashongkai katto katne por ki la iakhlad noh.

Kum lashai u Lamarsingh u la leit kai pat sha ieing jong ka Lyngngaisngi u la lap ia ka ha kamra shongkai bad u la shem ba ka la koit kam shym lei lei shuh. Haba ki la iashongkai katto katne por kiba ha ieing jong ka ki la iehnoh ia ki baroh arngut. Kat kum ka jinglong samla u Lamarsingh haba ki leh kumne u sngewtynnad shibun eh kum ka lad ban ioh iakren ieid iasiat ia kane katai kum parabaieid, hynrei ka Lyngngaisngi kam sngewtynnad bad ka da ym mon than ia kane, wat lada ka tip bad ba kan kohnguh ban shongkurim ia u, namar u tang shu sdang kren 'tien ieid ia ka kata ka la dung ngak ia ka mynsiem jong ka ban kynmaw ia u Lursympet Teng teng haba u Lamarsingh u kren ieid ia ka, wat lada ka la pyrshang ban len ia kiei kiei baroh, hynrei kam lah len satia kam ju nang jubap ia u bad ka shu thangiong ngain ka khmat jong ka. Kumta kam ju mon ban iashong arngut bad u mynno mynno ruh. Teng teng u ju wan kai kham mied, bad u ju leit tied jingkhong sha kamra jong ka, haba ka la shem

ia kane bun wat, kumta kam ju leit thiah shuh dangshai ka leit thiah haduh ban da mied ba kam pyrkhath shuh ba un dang wan kai ma u.

Ha pdeng ki jingjia bad jingsngew babun rukom, u brierw u pyrkhath khuslai bad pyrkhath sngewsih hynrei ia ki jingjia jong ka pyrthei ym don ba lah ban khang, ia kaba la thoh ban jia kata ka dei ban jia. Kumta ruh ka la long ha ieing jong ka Lyngngaisngi, hapdeng ki jing-pynwit ba bun rukom ban pynshongkurim ia u Lamarsingh bad ka Lyngngaisngi, hynrei ka jingjia ka wan ba ki dei ban ia pynshongkurim bad kumta la buh ia ka sngi ha kaba yn pyniateh kurim ia ki.

Haba la buh ia ka sngi ban pyniateh ktien ia u Lamarsing bad ka Lyngngaisngi, ka khubor ka la her sawdong sawdong bad kylleng kylleng jan bad jngai. Kane ka khubor ka la poi ruh sha ki shkor jong u Lursymper, u rang dajied bad u rang dathew, u rang damut bad u rang dakan. U la ju sngewsih, ju iamkthang bad ju jawummat rangbah bunsien na ka bynta kane kaei kaei, hynrei hapdeng ka jingkyrmen, kita ki jingkthang baroh ki shu um noh ha kata ka them ba u iohi ia ki phlang jyrngam ba i kum ki mukmor bani ba un thiahsuk mynsiem jai, hynrei mynta ym don jingkyrmen shuh, lada u iam u dei ban iamsah bad lada u jawummat u dei ban jawummat sah namar la kut noh kata ka pyrthei ban pyrkhath pat ia kita kiei kiei baroh.

Ha kawei ka mied haba u Lursymper u la pynshongnia ia kiei kiei baroh shaphang kata

ka jingiakhlad syndon bak jong u bad ka Lyngngaisngi, u la sngew ingkhongkhait ka mynsiem, ka jingieid ba runar ka la wan ha u ba u dei ban iohi bad iashem bad ka la kumno kumno ruh shwa ba un iakhlad noh syndon bak bad ka, kumta u la kut jingmut ban leit iashem ia ka ha kata hi ka mied. U la ieng joit nangta bad u la mih na ieing ban leit sha ka, khlem da khein ei ei ruh em ba aiu kan jia ia u lane ia ka haba ka briew ka la don la u jong u briew Haba u la poi ha icing jong ka, u la leit beit sha kamra jong ka, u la tied tok-tok ia ka jingkhong, ka Lyngngaisngi ka dang shu sdang thiah bad ka la iohsngew ba riew tok-tok ka jingkhong, ka la sngap la ka sngap, namar kam shym mut ba dei mano mano ruh hynrei ba dei u Lamarsingh, ka la sngap la ka sngap kumta namar ka kwah ba un leit noh. Hadien katto katne por la riew pat kata ka jingkhong tok-tok, ka sngap hi la ka sngap bad ka la kren ha la poh mynsiem, "U briew aiu kum uto haba u la tip ba un sa ioh ruh u da kwah ban wan pynsalia, u mat iashong shabar kum uto u briew." Sa shiphong la riew pat kata ka jingkhong, "Shish" ka la ong pat ha la ka mynsiem, "Ha bym plie ki briew ruh u shu tied tuk shi tuk". Ka thiah la ka thiah. Hadien slem slem la riew pat kata ka jingkhong tok-tok tok-tok, kumta ka la khie bitar joit na jingthiah bad ka la ong artad, "Shish ia une u jait bynriew te ym lah ialeh shuh". Ka la plie ia ka jingkhong bad ka la ong artad. "La mied phi". Hamar ba ka kren kumta, ka la iohi pynban da u Lursympet uba

ka la ap khmih lynti namar ba shisien u la ong ba un sa wan kai pat sha ka lada u dang don por Hangia ka la um ka mynsiem jong ka khlem tieng ei ei ba ioh tip ki bried bad pyrkhath ei ei shaphang ba ki bried kin kren kumno ia ka bad khlem sngew ei ei wad lada u Lamar-singh un tip ba u Lursympet u wan ha kamra jong ka mynmied, kaba ka kan sa iashongkurim bad u. Mar kumta u Lursympet u la jubap, bad u la ong, "La mied, nga tip ia kata, hynrei ngan leh kumno namar nga la kum wan, wat da iathuh ia nga ba ngam bit shuh ban wan sha phi, khamtam katta mied bad tang arngut hapoh kamra jong phi, namar nga la tip lypa ia kata, hynrei nga la wan, nga la wan ruh ka jingwan kaba khlem kam ei ei bad kaba khlem sngew ei ei ruh em wat lada phi ong ia nga uba kumno kumno ruh." Ka Lyngngaisngi ka la shu peit bad ieng lyngngoh shiphang khlem ai jubap shi kvntien ruh, hadien ka la ong, "Ngam shim poi pyrkhath satia ba phi dei ma phi". "Nga la tip lypa ia kata", u la ong, "Ba phim dei shuh hi ruh ban pyrkhath ia nga kumba ka la long, hynrei ha ka jinglong bried teng teng lah bad teng teng pat ym lah pyrkhath satia ban leh tang ia kata kaba dei kumba ka la jia ia phi bad ruh kumba ka la jia ia nga, kumta wat lada ka jingwan jong nga ka la long ka jingpynthut ia phi ha bun kiei kiei, phi to sngew kumta kumba ka dei ban long shisha kumta, hynrei nga ngam sngew ei ei namar ba nga la wan ym namar kino kino ki daw, hynrei nga la wan namar ba nga sngew-kynmaw ia phi, ba ngam sngew lah satia ban

shu leit noh sha kaba nga dei lan leit, khlem da iohi bad khublei ia phi shwa ba ngan khlad noh ban nym iohi shuh ia phi. Tang ka jingiohi ia phi ka la biang ia nga bad ngam donkam palat nalar kata. Te kong Lyngngaisngi, shongsuk shongsain, nga la sngewhun ka mynsiem ba nga la iohi ia phi, khublei ngan shu leit noh, wat sngew ei ei ba nga la pynthut ia phi". U la ieng artad joit ban mih noh. "Shong", ka la ong, "Nga ruh nga sngew kumba phi phi la sngew bad nga dei ban kren kumba phi phi la kren". "Em" u la ong, "Kata ka long ka bym lah shuh ban long namar ka la long ka kam palat kaba ngim dei shuh ban leh". Kumta u la mih bak.

Baroh shimied kam nang ioththiah shuh, ka la pyrkhat tang shaphang jong u. Kam shym la wan satia tang kata ka jingpyrkhat kaba la jia ha kata ka mied hynrei ka la kyrsiew lut ia ki jingjia shilynter jong ka jinglongsamla jong ka. "Ngam shym sah nud shuh kumba phi la ong ha nga", ka la ong, "Kumba la thoh bad kumta nga sngewhun, ka pyrtnei kaba kordor ka dei ka jong kiwei pat bad ka pyrtnei kaba poh dor tam ka dei ka jong nga". Kumta suki suki ka la ioththiah, hapdeng kita ki jingioththiah kiba dap tang da ki jingphohsniew kynsha suda.

Ka sngi ha kaba buh ban pyntateh ktien ia ka Lyngngaisngi bad u Lamarsingh ka la poi, la poi ki 'riewtymmen 'riewsan na baroh arliang. La khot ia u Lamarsingh bad ka Lyngngaisngi ba kin ia don lang hangta ban pynbiang ia kata ka jingiateh ktien jong ki. Haba ki tang shu

sdang ban kren shaphang kane, u la ieng joit uta u tymmen bad u la ong ba kin sngewbha ban sangeh ia kata ka jingiakren bad u la ong, "Nga dei u nongtrei tymmen jong phi, hynrei maduh mynta ka sngi ngan nym dei shuh u nongtrei jong phi hynrei nga lah ban dei u nonglehbha ne ban dei u nongshun jong phi, kumba nga la nud ban ong ia phi ba phin sangeh ia kane ka jingiakren haba katne ka jingsngewbha jong phi ka la long na ka bynta kane ka kam, hynrei ia ka jingshisha ngan nym lah len lano lano ruh ai ba wat ka jingim jong nga kan leit na kane ka pyrthei. Phim bit ban n̄iewbein ia ka ktien jong nga, wat lada nga long tang u nongtrei jong phi ruh, lada phi lehbor ka ain kan bishar rem ia phi". Baroh kita ki brieve kiba don hangta ki la shu ia peit lyngngoh, u kpa jong ka Lyngngaisngi da ka jingbitar, u la ong, "Kumno me nud ban kren kum kita ki ktien ban pynjah burom kat kane ka jingialang". "Map ia nga nga burom ia phi, hynrei ia ka jingshisha ngam lah ban len, ba ngan iathuh ha phi ia ka jingshisha kumba phi la sngewdei ban pynshongkurim ia la ka jong ka khun bad uta u brieve uba nud ban leit shim ia uta u Maw-kordor na kata ka jaka iathong, hynrei ym dei satia une u brieve uba la leit shim ia uta u Maw-kordor na kata ka jaka iathong hynrei la dei da uwei pat, kylli ia u mynta ba u dei ma u uba la leit shim ia uta u Mawkordor na kata ka jaka iathong ne dei ba u la ioh na nga ba u la phah tuh. Ngan phla hok ha khmat jong phi, ba nga la long u nongtuh da ki jingpynshoi

ba la pyni ia nga da ka tyngka kaba la pynklet
 noh ia nga ia kata ka jingiatiplem jong nga.
 Nga la tuh bad nga la shukor ia uta uba lui lui
 uba la shaniah lut ha nga, uba la pha ia la ka
 jong ka jingim ban ioh ia uta u Mawkordor,
 ban pyllait ia phi kiba long ki kynrad jong nga
 na ki jingjynjar jong phi. Ngan iathuh ha phi
 mynta ia ka jingshisha, ba haba uta u briew u la
 jah noh uta u Mawkordor na ka synduk jong u,
 u la phah khot ia nga bad u la iathuh ia kiei
 kiei baroh kiba la jia, haba nga la peit ia ka dur
 sngewsih jong u ba u la jah noh uta u Mawkor-
 dor uba u la pha la ka jong ka jingim, ka la
 dung ngak ia ka dohnud jong nga, ngam lah
 shah shuh bad nga la phla ba dei ma nga uba
 la leh ia kata ka kam sniew baroh, nga la phla
 lut ia kiei kiei baroh, nga la dem bad la pan
 map ha khmat jong u. Nalor ba nga la leh
 katta u la peit sha nga, u la jaw ummat, ha ka
 jaka ba un shoh un dat bad dumok ia nga, hynrei
 u la ong pynban, ba u la sngewhun ia ki jingphla
 jong nga, ba baroh kata kam dei satia ka jing-
 leh jong nga hynrei ka dei ka nusip jot ka jong
 u hi. Kine ki jingsngew bad jingkren jong u",
 La ong uta u tymmen, "Ki la pyndung ngak ia
 ka dohnud jong nga, bad wat lada nga nga dei
 ban iap ruh hynrei ba nga nga dei ban phla ia
 ki jingshisha na ka bynta jong u. Sngewbha
 kylli mynta ba nangno une u Lamarsingh u la
 ioh ia une u Mawkordor, ym dei na ka kti jong
 nga"? Baroh kita kiba iadon hangta ki la shu
 ia peit lyngngoh. Kumta hi u Lamarsingh da
 ka jingbitar u la jubap u la ong. "Ka long kaba

sngewsih bad sngewkhein burom shibun eh, ba katne ki riewdonburom ki la wan na ka bynta kane ka kam bah kam san, ba phi la shah ba un kren pynjah burom da u nongtrei jong phi kumne". "Kam pher". La ong uta u tymmen. "Lada nga dei u nongtrei ne uno uno u brieve hynrei ia kaba nga dei hok ban kren ia kata nga dei ban kren, phi lah ban pyniateh ne pynshongkurim ia kata ngam lah ban ong ei ei ma nga, hynrei uta u brieve uba la bat ia uta u Mawkordor u dei u nongtuh, kumba nga nga la long u nongtuh ia sylla lang bad u, kumba nga nga long u nongtuh nga dei ban leit sha phatok bad kumta u ruh kumjuh u dei ban leit sha phatok. Ki dak bad ki sakhi phin sa shem bad kin sa shai kumba shai ka sngi ba u la ioh ia une u Mawkordor na ka kti jong nga, ym dei satia ba u la ioh ia uta u 'Mawkordor na kata ka jaka iathong. Nga ngam dei u nongshun jong phi uba ialeh ban pynsniew ia phi hynrei nga long uba ieid bad burom ia phi ban pynpoi sha kaba bha. Phi dei ban kynmaw ruh ia nga ia ka shisnieh masi ka ksiar". Uta u tymmen u tang shu lah kren ia kine ki ktien u la ieng ryngkhat bad u la phet noh bak nangta.

Kata ka jingialang ka la ud sur hum, ba ki iakren uwei ia uwei pat shaphang kata ka jingjia. Hangta la mih uwei u 'riewtymmen na ka liang u Lamarsingh u la ong, "Ka long kaba sngewsih shibun ba ka la wan jia kum kine kiei kiei, hynrei ngin nym ia sngap ia ki ktien u 'riew sniew uba mut ban pynjot ban pynpra, hynrei ba ngin pyndep noh ia ka kam". La mih pat

sa uwei u la ong, "Ba ka long ka kam kaba sngewsih than haduh katta katta, ba ka la jia kumne, ha ka jingpyrkhat jong nga hi ba ia kane ka kam la dei ban pynsangeh noh, namar ka lah ruh ban mih kano kano ka jingkulmar". U Lamarsingh haba u la pyrkhat marwei hangta, u la sngew ba ym don mano mano ruh ba lah ban pynshisha ba ia uta u Mawkordor u la ioh na uta u tymmen, namar ym don ba tip mano mano ruh ia kata, lait tang na u bad uta u tymmen, bad kumta u la sngewskhem ba un ieng haduh kaba kut, ia uta u Mawkordor u dei u jong u ba u la leit shim na kata ka jaka iathong. Kumta u la ieng bad u la ong, "Kane baroh kaba la jia ka long tang ka jingbishni kaba la mih naei re naei lyngba uto u tymmen, uba bishni ia ka shongsuk ka shongsain ka jong nga bad jong phi bad kumta ngin nym sngap ia ka ktien nangang ban pynjot ia nga bad ia phi, ba ngi dei ban pyndep noh ia ka kam kumba la iabuh". La jubap u riew tymmen na ka liang jong ka Lyngngaisngi, u la ong, "Ba haba u la pyrkhat bha, ba kum kane kaei kaei ka la mih ba la kumno kumno ruh ta dei ban pynsangeh noh ia kata ka jingiapyrkhat ba ioh ka mih kaei kaei ka ban poi sha ka sngewsih hadien, namar lada sangeh mynta ruh, ba kata kan leit shaei kam poi shaei shaei ruh hynrei kan poi hi sha kaba bha lada ka long tang ka ktien bishni ki briew". Ki la iasaid bad ia pyrkhat shaphang kane, slem slem, hadien ka la iap ka nia na ka liang u Lamarsingh bad la pynsangeh ia kata ka jingpyniateh ktien.

Kane ka jingjia ka la pynmih ka jingbitar
 lep ia Lamarsingh kaba um sngew nang shuh
 ban pyrkhath kumno kumno ruh. Baroh shimied
 um nang iohthiah shuh u shu pyrkhath tang ia
 kata ka khein burom kaba la jia kaba uta u
 tymmen pohrati u la leh ia u. Haba u la pyr-
 khath pyrkhath bad pynshongnia bunsien bunwat
 u la sngew skhem ba yin don ba lah ban pyn-
 sabut ba ia uta u Mawkordor u la ioh na uta
 u tymmen, bad kumta hi u la kut jingmut ba
 un mudui shisyndon ia u ha u Syiem ba un ai
 ka sajjia kaba biang ia kum uta u briew uba la
 nud ban leh kat kata ka kam pynjah bad pyn-
 khein burom ia u. Kumta ka la jia shibun ka
 jingkulmar bad ruh la poi sha ka jingmudui phirat
 bad jingkyndoh ba la don ka mynsaw ka myn-
 snam ba une u tymmen u la pynjia bad kumta
 ba dei ban kem shisyndon ia u.

Katno ka long ka jingsngewsih kthang halor
 kiba ha iceng ha sem jong ka Lyngngaisngi ia
 kane ka jingjia jinjar, jah burom jong ki man
 la ka teng kumne. Kim nang shuh ban pyrkhath
 ban pynksan ne pynrem iano iano, namar haba
 ki la leh kumno kumno ruh ka shu wan jia hi
 kum kane ka jingjia. La kumta ruh ha ka
 jinglong briew hi wat la shisha ki jingjia ba la
 jia halor jong ki, ki la pynrben ia ka dohnud
 jong ki, hynrei kim lah khlem khulai haba ki
 kynduh khuk ha ka khohsiew jong ki. Ki la
 khot ia uta u tymmen bad kylli bniah ha u balei
 ba ka la jia kata ka jingjia bad ba balei ba u la
 pynlong ia ka kumta. Uta u tymmen um jubap
 satia ia ka jingkylli jong ki hynrei u la ong ba

um dei satia u nongshun jong ki kumba u la long u nongtrei bahok jong ki. U la ong, ba kaei kaei ka bym dei hok ba kam dei satia ban jia halor jong ki namar ba kata ka bym dei hok kan nym lah ban ai ka jingimsuk-imhun ia ki, hynrei kaba dei hok kan ai ka jingimsuk-imhun ba shisha halor jong ki. U la ong ba wat lada u long tang u nongtrei jong ki, hynrei ba u lah ba un ieng pyrshah bad pynkhein burom ia ka jingialang jong ki namar ka la long ka jingialang kaba thmu ban leh ia kiei kiei ki bym dei hok ban leh. Napdeng jong ki ki da khot ia uta u tymmen ban wad ia ka jingshisha hynrei kiba bun na ki ki dap da ka jingbitar bad jingdom ia uta u tymmen, khlem sngap ia ki ktien jong u hynrei ki la mai ki la tim ia u kum u nongtrei bym hok, u nongtrei shet kylla uba nud ban iuh roit bad pynkhein ia ka burom jong ki kynrad jong u. Kim sngap shuh ia u shi kyntien ruh ban kren, ki la beh ia u ryngkat ka jingong ba um bit shuh lano lano ruh ba un wan ha ieing jong ki. Uta u tymmen ruh u la phet noh nangta, u la ong ha la ka mynsiem, ba kam pher ei ei kano kano ka jingjia kaba la jia, hynrei pat ba shano shano ruh kan nym leit noh ka jingshisha.

Haba u Lursymper u la map ia ki jingbakla jong uta u tymmen da ka jingnguh bad jingdem jong u, naduh kata ka por hi ka jingiashem jong ki ka la long khah khah, khnang ba kin ia pyrkhath bad ba u Lursymper un iarap ia uta u tymmen ba un ioh pat ia uta u Mawkordor. Uta u tymmen u la iathuh ha u Lursymper, ba

um tip shuh ba kan jia ai u ia u namar ba mynta la kumba shi taiew ne u la pynpait bad pynpdam ia ka jingialang ban pyniateh ktien hapdeng u Lamarsingh bad ka Lyngngaisngi da kaba u la khang bad phla ia kiei kiei baroh ki jingshisha. U Lursymper u la lah tip ia kata bad u la kular ia uta u tymmen ba un iarap ia u haduh kaba kut bad ba un nym sngew ei ei Hapdeng kane ka jingiakren u Lursymper u la kynmaw ia kata ka liang phiang kaba u la ioh ryngkat bad uta u Mawkordor, ba ka don bad u ba um shym shah tuh ryngkat bad uta u Mawkordor bad kumta hi u la sngewthuh ba lada jia kano kano ka ban pynshisha ia uta u Mawkordor, ba kata ka sakhi ka long ka sakhi ba khlain tam. Kumta hi ynda ki la ia shongkai katto katne por uta u tymmen u la mih noh nangta.

U tang shu mih nangta bad poi ha la ieing, u shem ba la ap ia u da ki briew Syiem bad la ka khubor ba u dei ban leit hajir sha ieing Syiem. Kat kata ka jingjia hynrei uta u tymmen um-shym sngewpher ei ei ia kata namar u la tip lypa ia kaei ka ban jia halor jong u.

[Ki jingjia halor jong ka jingim jong ka pyrthei ki mih bun rukom kiba u briew um lah ban sngewthuh salia. U Syiem u Patsha uba haba shu peit u i kum uba imsuk halor ka khet ka bor bad ka spah hynrei ha u ka don ka jing-khuslai, ka jingshitom mynsiem bad ka jinjar kaba kham palat ban ia u rit u ria baroh. Mano ban pyrkhath ba ka Lyngngaisngi ka 'thei bhabriew ba palat liam na ki kynthai ba kan shem kat kita ki jingshem jinjar kiba la jia ha

ka tang namar ba kan ioh tang ia uwei u samla. Ka dur bhabriew bunsien ka long ka dur shem pop. Shem pop ne shem hok baroh ki jingpyn-iaid jong ka pyrthei ka long na ka bynta ka jingbit jong ka pyrthei bad kumta dei ban bud bad sngewthuh ia kata namar ym don mano mano ruh ba lah ban kiar ia kaei kaba la thoh ha man iwei pa iwei i jingpynlong jong kane ka pyrthei.

Shano kan poi ka jingim shimet jong ka 'thei bhabriew ka Lyngngaisngi, ym pat lah ban rai ne ban ong namar ym pat kut satia kata ka jingrai. Ka pyrthei jong ka ka dang thnam ha ka jingkhluud jong ka ding ba dang shet ia ka jingim jong ka, kumta ba shano kan poi ia kata ym pat don ba lah ban ong ne batai. Ka jing-kordor ha kane ka pyrthei ka long kaba remdor ban thied, kumta kano kano kaba remdor ka dei kaba ngi niewkor ha ka pyrthei. Kano kano kaba tang shu kwah la ioh, kane kam ju don dor ei ei hynrei ka jingioh kaba dajot ka doh bad da mih ka snam, kata ka dei kaba kordor-tam.]

Ka sngi ba la buh ba uta u tymmen un leit hajir na ka bynta ka jingujor pynkhein burom ia u Lamarsingh, ka la poi bad kumta uta u tymmen ruh u la leit haji-. Haba ka dorbar ka la kylli jingkylli ia u, u ruh kat kum ka bishar byndai, u la batai lin nadong shadong baroh ban pynshisha ia kaba dei hok bad bym dei hok. Haba u la batai lin na ba sdang ha bakut ia kiei kiei baroh kiba la jia wat la um shym ai kyrteng iano iano ruh hynrei u la ong ba ka kyrteng

jong uno uno u briew kan sa mih hi namar ki dei ban wan ban jubap ha khmat kane ka dorbar na ka bynta ka jingshisha ban pynshisha ia ka. "Kane ka jingshisha ka ban sa mih" u la ong, ka long ka ban sa pynja long ia u u nongshah set byndi, na ka bynta ki kam sniew jong u kiba long ki jingleh ba la shu pyrkhath lyngkot jingmut jong u. Haba la kut ki jingkylli ia u Lamarsingh bad ia uta u tymmen, la buh sngi pat ba kin wan jubap ha khmat ka dorbar ryngkat bad la kita ki sakhi na baroh arliang mamla.

Haba la poi kata sngi, ban rai ia kaba dei bad balait hapdeng jong uta u tymmen bad u Lamarsingh, la poi ki sakhi ki satai na baroh arliang mamla bad u paitbah bym tip shuh ban wan sngap ia kaba ka jingbishar bad jingrai jong kata ka jingjia ba la paw nam ha kata ka por.

Ha ka rukom bishar hyndai ka jingbishar kam ju da shim por ei ei namar ka jingbishar ka la long tang da ka bishar hok suda, namar ym ju da donkam muktia ban da pynsylla buit halor ka mukotduma hynrei phar-phar ka jingbishar ka iaia uba pop u la rem uba hok u la ksan.

Haba la khot ia u Lamarsingh ba un pynshai ha khmat ka dorbar ia kata ka jingioh jong u ia uta u Mawkordor. U Lamarsingh u la ong ba u ia ioh ia uta u Mawkordor da ki jingpyrkhat ngam jylliew bad pha ia la ka jingim da kaba u thap sor shisor man la ka mied ban iohi ba kita ki nongphira jong u Syiem ki la iohthiah. Da kaba u iai thap kumta, ha kawei ka mied ki nongapphira ki la iohthiah

namar la bun mied ki la ap ia kata ka jaka. Kumta sor u la par ki khlem da kyndit satia haduh ba un da poi ha kata ka jaka ba la buh ia uta u Mawkordor, kumta u la shim bad u la ioh ruh ia u khlem don batip bad iohi ne iohsngew mano mano ruh. U la pynmih ruh ki sakhi thek hangta, kiba la leit ban synran lem ia u haba u leit sha kata ka kut jingiathong ba la buh ia uta u Mawkordor. Ki ruh ki la ia mynjur ba ki dei ki sakhi kiba ki la iohi ia kita ki jingjia baroh.

U Syiem bad ka dorbar ki la khot ia uta u rangbah shipai ban kylli ia u balei ba u bad kita ki shipai jong u ki la iohthiah ba kat kata ka hukum kaba la long ka kam iap bad kam im. Uta u rangbah shipai u la jubap, ba ka bym lah ban long ba ki shipai ki la iohthiah namar u da lade hi u ju ia id ban peit ba ki shipai lehse ki iohthiah ne kumno. Kane kam lah ban long hi ruh ba kin iohthiah namar la bujli man la ka por khnang ba kiwei kin thiah bad kiwei pat kin peit. La khot bad kylli ia baroh ki shipai ki ruh ki la batai ba ki la leh thik ia la ka jong ka kamram, ba ym don u briew uba lah ban rung shapoh kata ka jaka iathong, hapdeng kata ka por jong ka kamram jong ki.

La poi ka por ban khot ia uta u tymmen ba un jubap balei ba u la pynkhein burom ia u Lamarsingh kat kum ka jingmudui jong u. Uta u tymmen u la ieng bad u la jubap, u la ong, "Nga la pynkhein burom ia u Lamarsingh ha khmat ka jingialang jong kiba ha ieing ha sem

jong ka Lyngngaisngi ban pyniateh ktien bad u
 bad ka Lyngngaisngi namar ba u la leit thok bad
 leit ong ba u dei ma u uba la leit pha la ka jing-
 im ba u la leit shim ia uta u Mawkordor na ka-
 ta ka jaka iathong khuang ba un iohshongkurim
 ia ka Lyngngaisngi, hynrei ym dei satia ma u
 uba la leit shim ia uta u Mawkordor na kata ka
 jaka iathong kumba ngan phla ha phi mynta.
 Nga long u 'riew tymmen u bym ju tip ia ka thok
 ka shul or, ka tuh ka thiem ha ki por ba myn-
 shuwa jong une u Mawkordor. Ha ka por ba la
 katne rta, nga dei ban phla lok, khuang ba ngan
 khuid ki pop jong nga namar ym slem shuh hi
 kat kum ka rta jong nga ba nga dei ban iap noh
 na kane ka pyrthei. Nga sngew ba ka jingiap
 jong nga, kan long ka jingiap shitom lada ngan
 nym phla ia kaei kaba dei ka hok bad ka jingshi-
 sha. Une u Mawkordor u la pynlong ia nga u
 nongpop uba khraw tam ha kane ka pyrthei.
 Ngam tieng wat lada phi ka dorbar phi thep
 phatok ne rai phasi ia nga namar ba nga la long
 u nongtuh haba nga la ioh ban long u nongphla
 ia ka hok bad ka jingshisha." Nangta u la ong,
 "Ia une u Mawkordor nga la tuh na u briew uba
 shaniah tam ia nga namar nga la buaid tyngka
 da ki ktien pynshoi bad pynkbih ia nga. U nong-
 pynshoi bad nongpynkbih ban pynlong ia nga u
 nongtuh uba la nud ban tuh na u briew uba ieid,
 shaniah bad iarap ia nga uta u dei u Lamarsingh,
 u la phah tuh ia nga bad kumta nga la leit tuh
 bad nga la die ha u ia uta u Mawkordor. Kane
 ka long ka jingshisha nga kren hok ha khmat
 jong phi ka dorbar, pynshitom ia nga kano kano

ka jingpynshitom kat kum ba shong ka ain jong phi ka dorbar ngan shah, namar nga la long u riew-sniew ba pohtam uba la nud ban leit tuh na u briew uba long da shisha kum u kynrad jong nga. U dei ma u, uba la phah ia nga bad ai ka buit ba ka Lyngngaisngi kan lait na ka jingia-thong shisnieh masi ksiar. Ia kaba uta u briew u ioh kumno ia uta u Mawkordor na kata ka jaka iathong ia kata ma u uba dei ban pynshai, kumba u long u sakhi jong nga bad uta u briew u don hangne ban ieng sakhi na ka bynta jong nga bad uta u dei u Lursymper."

La lyngngoh ka dorbar bad u paitbah baroh, haba kane ka ktien Lursymper ka la mih, namar ym don ba tip satia ba u ruh u don bynta hangta namar slem bah um shym don shuh la kata ka jaka. La pyrta ba u Lursymper un wan ban ieng sakhi hangta. U la mih na kyndong, khlem don batip bad iohi mano mano ruh ba u u don hangta. U la ong, "Kaba shisha ba une u tymmen u la wan tuh ia uta u Mawkordor namar u la jah na ka kti jong nga, bad ba dei tang ma u hi ruh uba tip ba une u Mawkordor u don ha ka kti jong nga. Nga la wan ban ieng sakhi hangne ym namar ba ngan ioh pat ha ka kti jong nga ia uta u Mawkordor, hynrei nga la wan ban ieng sakhi hangne, ba une u tymmen un lait na ki jingpynshitom kumba u la pynkhein burom ia ki khun baheh bahain kat kum ka mudui jong ki, namar une u tymmen u long uba nga la shaniah bad uba la iatrei lang ryngkat bad iarap ia nga ban pyn-dep ia ka jingthmu jong nga ban kit ia kita ki briew kiba nga nga ia don bynta lem ha kata ka

jingshem shitom jong ki. Ngam sngew ei ei ban phla ha khmat jong phi ka dorbar ba baroh kine ki jingjia ki la long na ka bynta jong nga, kumta kane ka jingleh jong nga ka la long pyrshah ia u Syiem uba nga dei ban burom. Ngan nym don ka mynsiem bynnud ne sahnud lada kita kiba iadei bynta bad nga ki la ioh shongsuk ioh shongsain, hynrei na sha ingai nga la iohsngew ba kita kiba iadei bynta bad nga ki la hap ha ka jinjar na ka bynta jong nga, kumta ngam lah ban shah ia kata bad nga la wan ban ialeh ban pyllait ia kata ka jingshem jinjar jong ki, wat lada ngam shym don jingmut ei ei shuh haduh mynta kane ka khylliapmat ba nga ngan dawa ei ei pat na ki. Nga la ieng hangne ban kren ia ka jingshisha, ban pynim ia une u tymmen bad kumta ngam banse khlem da pynshai kdar ia kiei kiei baroh. Nga la leh ia kine kiei kiei ban pyndep ia la ka kamram kum u briew uba shisha khlem da kwah burom ei ei shuh, haba nga la pyndep, nga la sngewhun ba ki la lait na ka jingjinjar jong ki hynrei ka wan jia da kumne pat ia nga, ba ngan iehnoh ruh ngam sngewbit satia."

"Kat kum ki ktien jong phi," u la ong u Syiem. "Nga sngewthuh ba ka jingong jong phi ka long ba dei ma phi uba la leit shim bad la ioh ia uta u Mawkordor na kata ka jaka iathong." Ka jubap na u Lamarsingh ngi la ioh, u la ai ki sakhi bad ki daw ba kumno u la ioh bad la leit shim ia uta u Mawkordor na ka jaka iathong, mynta ngi kwah ban iohsngew sa na phi ba kumno phi la ioh bad leit shim ia uta u Mawkordor na kata ka jaka iathong." Kumta hi u Lursym-

per u la jubap u la ong, "Syiem badon burom, nga kloi ban batai ha phi ia kiei kiei baroh kat kum ka jingkwah jong phi, bad u sakhi uba tip ia kine kiei kiei baroh u dei tang une u tymmen uba nga la ieid bad shaniah lut ia kiei kiei baroh, namar ia kane nga la leh jar jar ban nym don batip mano mano ruh, bad ba ngam kwah bainong ei ei ruh ban ioh na kane wat lada nga jop ruh."

U Lursymper u la sdang batai bad u la ong, "Shwa ba ngan batai ia kane ngan iathuh ha phi ba ha ka jingiathong kaba nyngkong ruh, haba nga la tip ba kim lah ban ioh ksiar shisnieh masi kat kum ka jingiathong, bad haba nga la pynshongnia bha ia ka rukom iakut jong phi, nga la ai ka buit lyngba une u tymmen ban shohstang ia ka ksiar kat ka jingstang i snep rynsun bad ban siang shisnieh masi. Kane kam lah kut bad ka la poi sha ka jingiathong kaba ar. Ha kane ka jingiathong kaba ar nga la leit shim la uta u Mawkordor, shwa ban dap shibnai ka jingiathong, da kaba nga kylla khun masi ialade bad nga la rung lyngba ki shipai jong phi ban leit shim ia uta u Mawkordor bad kumta nga la ioh ia u."

Ha kata ka jingbatai jong u kumno ba u la thaw buit ban ioh ia uta u Mawkordor, u la ong, "Haba nga la pyrkhat bha kumno ban ioh ia uta u Mawkordor, haba la ap syrtap ia kata ka jaka da ki shipai jong phi. Nga la khot ia une u tymmen ba un leit pan kam sharai masi na ki briew kiba shong hajan kata ka jaka iathong. Une u tymmen u la ioh ia kane ka kam, nga la hikai ia u

ba un leit pynbam phlang ia ki masi man ka
 janmiet ha kata ka jaka shwa ba un set ha sem,
 bad nga la ong ruh ia u ba teng teng un pynsah
 mied ia ki masi hangta. Ha kaba nyngkong ki
 shipai jong phi kim pyllait satia ia kita ki masi
 ha kin rung shapoh kata ka syrtap ba la ap, hyn-
 rei hadien hadien ba ki la myllen bad ba kita ki
 shipai ap jong phi kim don jingsuba ei ei, kumta
 kita ki masi ki la rung mon mih mon katba ki
 mon ha kata ka jaka ha kaba la buh ia uta u
 Mawkordor. Haba la biang bha kata ka jingpyr:
 khat jong nga, nga la ong ha une u tymmen ba
 ha kata ka mied ba la buh, ba un pynsahmied ia
 ki masi baroh shimied hangta, une u tymmen
 ruh u la leh kumba nga la ong, bad ha kata hi
 ka mied nga la kylla khun masi, nga la leh myn-
 leh bam phlang kumba bam ki para masi baroh
 nga la rung lyngba kita ki shipai, khlem da don
 jingsuba ei ei ruh em haduh ba ngan da ioh ia
 uta u Mawkordor. Shwa ba phin kylli ia nga,
 ngan pyni ha phi ba kumno nga la kylla khun
 masi." Kumta hi u la leit shim ia kata ka riam
 khun masi ba u la wallam lypa u la phong bad
 riam kumba u la leh ha kata ka mied thik. U la
 par leh mynleh bam phlang ha khmat kata ka
 dorbar, bad da i hi thik kumba ka masi shisha
 ba ka bam phlang. Kumta la risa shaw u paid
 ka dorbar baroh. U Lursympet u la ieng bad u
 la loit noh ia kata ka dur masi bad u la ong.
 "Nalor kane ba nga la batai ha phi, sa kawei pat
 ka sakhi ngan pyni ha phi, kaba nga la shim
 ryngkat bad uta u Mawkordor. Kata ka dei ka
 liangphiang kaba phi la tap ia uta u Mawkordor

kaba don bad nga kaba ngam shym shah tuh satia ia ka." U la pyni hangta ia kata ka liangphiang ba ka dei ne em. U Syiem u la peit ia ka u la mynjour ba ka dei kata ka liangphiang jong u kaba u la phah tap ia uta u Mawkordor. Ka jubap jong U Lursymper ka la kut, kumta u la khublei ia u Syiem bad ia ka dorbar bad u la mih noh nangta.

U Syiem u la khot bad phai pat sha kita ki shipai bad sha uta u tymmen, u la kylli jingkylli ia ki, uta u tymmen ruh u la batai bad iathuh thik ia kiei kiei baroh kiba la jia. Kita ki shipai ruh ki la iathuh bad batai thik shaphang kita ki masi kiba ia bam phlang ha kata ka jaka bad ba kita ki masi ki ia rung ia mih katba ki mon ha kata ka jaka, namar ba kim don jingsuba bad jingtip ei ei ba kan leit jia kumta ba ki masi kin leit shim ia uta u Mawkordor bad kat kum ka hukum jong phi ruh ym shym don ka hukum ban nym shah ia ki masi, ki blang ki sniang, ki syiar ban rung sha kata ka jaka.

U Syiem bad ka dorbar ki la pynshongnia ia ka jubap u Lursymper bad kata ka jingkylla masi jong u ban leit shim ia uta u Mawkordor ryngkat bad kata ka liangphiang bad ia ka jubap u Lamarsingh, ki la shem ia ka jingshisha ba dei u Lursymper uba la leit shim bad ioh ia uta u Mawkordor bad ba ka jingmudui jong u Lamarsingh halor uta u tymmen ka la pyniap ia lade, ba dei shisha ba u Lamarsingh u la ioh ia uta u Mawkordor na ka kti jong uta u tymmen. Kumta ka dorbar ka la shem ia ka jingshisha ba ka jingleh pynkhein burom jong uta u tym-

men ia u Lamarsingh ka long kaba shongnia kat kum ki kam jong u Lamarsingh ba u la leh halor uta u tymmen. Ka jingbishar hyndai ka long barabor ka jingbishar hok bad kumta kim ju da ia buh por, mar ia bishar mar ia shem ia ka jingshisha bad kumta ruh mar ia rai. Kane ka jingbishar ruh ka la long kumta, ka dorbar ka la shem ia ka jingshisha bad kumta ruh kan ai ia ka rai ha kata ka juh hi ka sngi, hynrei u Syiem u kwah ban da buh por ia kane ka rai namar ba u kwah ban rai ha kaba ia don lang u Lursymper bad ka Lyngngaisngi khnang ba un ioh ai ia kata ka burom kaba u la thmu halor jong ki, kumta u la buh sngi pat da kawei bad ka dorbar ka la wai.

Mar iawai ka dorbar, wat la ka dorbar kam pat shym la ai ia ka rai hynrei u paitbah sngap dorbar, u la ia rai lypa ha lade lade ba dei u Lursymper u ba la pha ia lade ban leit shim ia uta u Mawkordor na kata ka jaka iathong bad la mih ka jingsngewlyngngoh bad jingiaroh halor jong u ka bym lah shuh ban ong, mar kumta hi la bna ka shnong ka thaw baroh bad kata ka khubor ka la leit poi ruh shaduh ki shkor jong ka Lyngngaisngi.

Kane ka jingjop thiaw jong ka liang ka Lyngngaisngi ha baroh ar ki jingiathong ka la pynsah ia u Syiem ha ka jinglyngngoh ba un leh kumno ban pynpaw ia ka burom rangtah jong u. U Syiem haba u la pyrkhat pyrkhat ha la poh mynsiem u la sngew ba wat lada um shym lah jop ha kata ka jingiathong hynrei ba la kumno kumno ruh ba u dei ban pyndep ia la ka

kamram ha ka sngi ba kin wan hajir ha kaba un
khot ia baroh kiba ia dei bynta ha ka mokotduma
khnang ban ai ia ka rai. U Syiem u la mut ha la
poh mynsiem ba ha kata ka sngi ban ai ia ka rai,
ba un ai ruh ia ka burom ha u Lursympet bad ka
Lyngngaisngi ia ka jinglong shisha jong ki bad ba
un pynshai hangta ia kiei kiei baroh.

Haba la buh ia ka sngi la phah pyntip sha ki
arliang mamla bad ruh sha u Lursympet bad ka
Lyngngaisngi ba ki dei ban poi sha kata ka
dorbar. Hadien katto katne sngi la wan phai ka
khubor ba ia baroh la pyntip bad ki la kular ban
poi sha ka dorbar, hynrei ia u Lursympet ym
lah shem satia. Kane ka la pynmih ka jingbitar
lep ia u Syiem namar ka jingsngewdom ba kat
kaba u thmu kam poi satia ha kaba u mut,
kumta u la hukum ia la kita ki briew da ka
jingbitar ba ki dei ban leit wad ia u ha ban da
shem, ba lada kim lah shem ba ka long ka kam
kaba sngewsih shibun eh.

Kata ka jingleh bitar jong u Syiem ka la mih
shabar, bad ia ka khubor la nang pynheh pynheh
na uwei ha uwei pat kat haduh ba la bna haw ba
u Syiem u la phah kem ia u Lursympet. Ka
khubor ka la mih kumne namar ba ki briew ki la
sngewthuh lypa ha lade lade na ki kam jong u
Lursympet bad u Syiem ba u Syiem u shun
thlongmluh thlongsyng ia u Lursympet, namar
ba u la long u nongialah pyrshah jong u bad ki
la shu ngeit ruh ha lade lade ba u Syiem u kwah
ban pynhiar kput halor jong u, namar ki kam
ialah pyrshah jong u.

Ka Lyngngaisngi hadien jong kita ki jingja

ba wan ki kfrubor da kumne bad da kumtai bad
 ba u Syiem u' la phah wad ban' kem ia u, ka la
 shu sah ha ka jingbysngewthuh shuh, ba kin
 ialam shano ia ka kine kiei kiei ki jingjia baroh.
 Hangne kaba pli ka kynthai ka la shu khapbrip la
 ki khmat, ka la ong ha la poh mynsiem, "Ka
 pyrthei lehbor, ka pyrthei khlem sngap nia bad
 ka pyrthei thombor, kam pher ei ei ai ba un long
 u 'langkñia bad ba nga ruh ngan long ka 'lang-
 kñia ba kan khuid ka pop ha kane ka pyrthei"
 Ka la iam bad jaw ummat la bun spah sien,
 hynrei ia ki jingiam jong ka la shu kit ei noh
 kita ki lyer jong ka haw-haw bad kita ki ummat
 ki la shu rnat noh ha ki dew rkhiang jong ka
 ramew, kumta ka dur bhabriew bad ka mynsiem
 ba im ba sngewshisha ka per lang noh ryngkat
 ka jingphètiapnoh jong ki jingbishar pyrthei.

Hapdeng kita ki jingpyrkhat ba ngam jylliew
 jong ka shaphang u Lursympet kumba ka la tip
 ba u la long uba im ban shakri hok ia la ka
 mynsiem ieid hok jong u ia ka bad ba ia u yn sa
 thombor bad lehbein pat namar kita ki daw,
 kumta hi kam nangleh ei ei shuh bad ka la shu
 wan ka jingtlot ryngkat jong ka. Hamar kata'ka
 por ka shu stem ka bneng ka khyndew jong ka,
 ki 'er u 'nai kylla ba la wan phai tawiar sawdong
 pyrthei, da sngewlyngngoh ba ki dang wan lap
 pat ia ka Lyngngaisngi ha ka juh ka mynsiem
 bad ka juh ka dur bhabriew haba ka eriong ka
 erngit ka la rah khongpong arted ryngkat lang
 ruh u slap bad u phria ba shoh.

Jar jar te hangta ba lap u 'nai kylla, namar
 da shisha ka long tang ka briew. "Mei" ka la

ong, "Ngan leit thiah kai noh shiphang ba nga sngewshohthait bad sngewkhnium met". La lut ka mied bad ka step ka la wan phai, "Khie noh khun" La ong ka kmie, "Ban dih sha noh," "Mei", ka la ong, "Ngam sngewkwah bam kwah dih te mei". Kumta hi man la ka sngi ka jingshitom ka nangban nangban ia ka, bad hadien shitaiew ka jingpang jong ka ka la jur haduh katta katta.

Haba ki briew syiem ki la shem ia u Lursympet ki la iathuh ia kaei kaei baroh kaba la jia bad ba u Syiem u la sngewsih shibun eh ba kim lah shem satia ia u. Kumta hi u Lursympet, kumba ki la iathuh ba ka sngi ba la buh ruh ka la-jan, u la wan ryngkat bad ki, ba ün leit hajir ha khmat kata ka dorbar kumba la kwah ia u ruh ban don hangta.

Haba la poi kata ka sngi ba la buh ban pynsngew ia ka rai hapteng u Lamarsingh bad uta u tymmen ryngkat ruh u Lursympet bad ka Lyngngaisngi la wan tuid u paitbah u bym tip shuh ban wan sngap kai hangta ha dorbar, namar kata ka jingjia hapteng u Lursympet bad ka Lyngngaisngi ka la long ka jingjia kaba donnam tam ha kata ka por. Ki arliang mamla ki la wan poi u Lursympet ruh u la don, hynrei ka Lyngngaisngi bad kiba ha iing jong ka kim wan poi satia. Mar kumta la wan poi ki briew kiba la wallam khubor ba ka Lyngngaisngi ka pang jur kam lah wan bad ba ki la phah ia ki kum ki nongmihkhmat na ka bynta jong ki ban sngap bad sngewhun ia kano kano kaba u Syiem bad ka dorbar ki rai.

U Syiem hangta u la jew slam ka mynsiem bad u la pyni la ka jingsngewsih bitar ba ha kata ka wat ruh la pulom kata ka jingthmu jong u. U da kwah ban pynshai markhmat ia kata ka jingthmu jong u bad ba kin da iohi ia ka dur jong u, ba katno u la sngewsih sat ia kata ka jingjia baroh halor jong ki. Haba ka la jia kumta ba baroh kim lah ia wan u la kut jingmut ban pynsangeh noh ia kata ka dorbar namar ki briew kiba donkam eh kim lah satia ban poi, kumta hi ia ka dorbar la pynsangeh noh

U Lursymper u tang iohsngew ia kata, ba ka Lyngngaisngi ka pang jur, u la thangiong ngain ka khmat jong u, u la ieng naba shong u la leit ha khmat u Syiem bad u la ong, "Nga ruh khublei ngan shur leit noh shwa". "Niuma", la ong u Syiem, "Ngin sa iashem lang pat baroh, namar ka kam ka long kaba ngi dei ban ia don lang" U Syiem u la ithuh ia ka dur ba la kylla bak jong u Lursymper, haba u la iohsngew ia kata ka khubor ba ka pang jur ka Lyngngaisngi, kumta u la shu kynduh ha ka mynsiem namar kita kiei kiei ki jingjia kiba la wan jia ha u, ha u Lursymper bad ka Lyngngaisngi.

U Lamarsingh u la sngewthuh lypa ba ka kam jong u kam lah ieng shuh bad ba baroh ki kam rieh bad ki jingleh jong u ki la paw madan bad ba u la rem kata ka jingialeh ia tur jong u bad u la pynrem ruh ialade ba un nai shuh hi kum kata kaei kaei kaba la pynlehrain bad pynsngewsih kthang ia ka mynsiem jong u.

U Lursymper u tang shu iohsngew ia ka

khabor ba ka Lyngngaisngi ka pang jur, ka jingsngew jong u ka la ngam than haduh katta kat haduh ba um sngewthuh bad um lah shuh ban tyngkai ia la ka jingsngew, u la thangiong bad tyrkhong khait ka shyntur. Kumta hi u tang shu mih na ieing syiem u la leit beit sha ieing jong ka ban iohi ia ka. U la klet noh ia la ka jong ka burom bad ka ijot ba lehse ba kin nym sngewbha bad kin nym shah ia u ban rung ha ieing jong ka.

Haba u la poi ha ieing jong ka u la rung ha ieing u la shem ba baroh ki ia ia id bun kam, ia her shane shatai ka bym nang shuh ban ong U la kylli ha ki shaphang kata ka jingpang, ki la shu jubap ba ka jur phi kim da kynmaw shuh ban kylli ia u ba u wan poi da kumno ha kat kata ka jingpoi phylla jong u. U ruh u la sngewthuh ia kata ka jingkulmar jong ki kumta hi ka mynsiem jong u kam lah shah shuh khlem sngew ei ei u la rung beit sha ka kamra thiah joag ka, bad u la shem ba ka kmie jong ka ka shong ha jingthiah jong ka, u la leit hajan u la ong, "Kong Lyngngaisngi, balei phi pang". U ruh haba u la iohi ia ka dur jong ka Lyngngaisngi ba ka peit liep-liep ha ka jingjur jong ka jingpang kaba ym lah batai shuh, u la shu kren ruma kat kum ka mynsiem ka jingsngew jong u. "Balei phi la long kumne", u la ong, "Haba nga pat nga long kumne, ngan kit ia phi na khlieh ha kjat, nga uba ju kit ia ka khia ka shon jong phi, koit khlaia noh, peit ia nga", u la ong, "Ngam shym pang" Ka la peit liep ka la ithuh ia u, ka la phuh samrkhie, ka la nang ban phuh samrkhie hapdeng

kat kata ka jingshitom Ka la khaprip pat ki khmat bad ka la tuid ha baroh arliang ki rengngap da ki ummat, u ruh mar kumta hi ki la kyrsoi ki ummat rangbah jong u bad ki la tuid ha ki rengngap jong u Ka la peit pat liep sha u, ka la loh ba ki ummat jong u ki tuid halor ki rengngap jong u kumta hi ka la shu khaprip ngain Hadien katto katne por ka la peit pat liep sha u Tang hapdeng kita ki khyllipmat ka dur khmat bad ka sur ktien jong ka ki la kylla bak na kata ka jingshitom jur jong ka U Lursympet u la ong ha ka ba kan koit noh na kata ka jingpang bad jingshitom bad ba un sa wan kai pat sha ka, u la ong ha ka namar ba u tip skhem ba kan sa koit hi shen kumba u la wan kit bok ma u Kumta hi u la mih noh na ieing jong ka

Ynda dap katto katne por u Syiem u la sngewdei ban khot noh ia ka dorbar ban ai ia ka rai jong ki arliang mamla, u Lamarsingh bad uta u tymmen ym bad ia kiwei de kumba u la thmu nyngkong Kumta ba ka rai bad ka jingleh burom jong u kin ia id la ka jong ka jong Haba u la khot ia ka dorbar u la ai ka rai ba u Lamar singh u la rem bad uta u tymmen u la jop bad ba u Lamarsingh un pynphai noh ia uta u mawkordor sha uta u tymmen bad ba uta u tymmen un pynphai noh ia uta u Mawkordor sha u Lursympet uba dei hok u trai jong uta u Mawkordor Ia uta u tymmen la map noh ia ki jingbakla jong u ba u la leit tuh ia uta u Mawkordor namar ka jingphla hok bad jingkren hok jong u. Hadien katto katne por baroh ki patbah ki la tip ia kane bad u Lursympet u la loh pat ia uta u Mawkordor.

Kumba u Syiem u la don ka jingthmu ban kyntiew bad ai burom ia u Lursymper bad ka Lyngngaisngi namar kata ka jingiaieid hok bad ieid sotti jong ki kumta ruh hadien jong kata ka jingrai u la phah ki ktien ai burom ryngkat ki jingai sngewbha ba kordor shà ki baroh arngut.

Haba ka Lyngngaisngi ka la nang kham koit kham koit man la ka sngi bad kumta u Lursymper u la dap da ka jingsngewtynn timer bad ka jingsngewbha. Ha kawei ka sngi u la leit kai sha iing jong ka bad u la rung sha kamra thiah jong ka, tang shu rung u la ong, "Katno ka jingsngewtynn timer jong nga ban iohi ia phi ha kane ka dur kaba mynta, ba phi la lait na ki jingmynsaw ba ju jia ha ka jinglong briew jong ngi u khun bynriew ha kane ka pyrthei." "Nga sngewhun tang ba nga la iohi bad shem kum kane ka jingiohi bad jingshem ba haba nga nga pang, nga la iohi da shisha ba phi ruh phi pang" La jubap ka Lyngngaisngi ryngkat ki ummat sngewnguh kiba ym lah batai shuh. "Wat leh seh kumne Kong Lyngngaisngi," la ong u Lursymper, "Namar nga la wan ban pyntngen ia phi ba phin koit noh na ka jingpang jong phi hynrei lada phi leh kumne ha ka jaka ba phin koit hynrei phin shitom pynban" "Kampher ei ei." Ka la ong, "Nga tuid ki ummat namar ba ka dohnud jong nga ka la um kumba um ka ior ha kita ki jingsngew jong nga haba nga la shem mynta ba pleng ka mynsiem jong nga bad jong phi kam shym pher ei ei hynrei ka la dei ka juh ka jong kito ki sngi ba kordor jong nga bad jong phi." "Em" u la ong u Lursymper, "Lada kumno kumno ruh phim dei ban buh jingpyrkhat

'bad pynkynduh mynsiem ialade ha kum kane ka
 por mynta kaba ka met bad ka mynsiem jong phi
 kim pat shah ia phi ba phin sngew kumta."
 "Kam pher ei ei," la ong ka Lyngngaisngi, "Wat
 lada nga shitom ne nga iap ruh, haba nga iap ha
 kata ka jingiap kaba dap da. ka jingsngewhun.
 Lada nga ngan iap phi ruh phin iap na ka bynta
 jong nga bad kumta ai ba kata ka jingiap kan
 wan, kam pher ei ei, haba baroh arngut lang ngi
 ia iap namar shisien ngin ia iap hi ha kane ka
 pyrthei. Ka jingiap ngi sngewthuh ba ka long ka-
 ba runar, hynrei kata ka jingiap jong nga bad
 jong phi kan long kaba kynjai, hangta ha jingiap
 ba kynjai ngin iathuhkhana kylliang kylliang ruh
 baroh arngut. Ngin ia id suki jai sha bneng bad
 ngin ia shongthait man la ki por ba ngi sngew-
 thait bad nangta namar ba ngi la kham poi sha-
 lor na sla jong kane ka pyrthei ngin iohi ia kiei
 kiei baroh kat kiba ngi sngewdonkam ban iohi,
 hangta ngan iathuh khana bad pyni ia phi ia ka
 jingkhangiit kaba nga la plie man ka khylliap-
 mat ba nga ap peit bad ap khmih lynti ba phin
 wan kai sha ieing jong nga ha kito ki por ba la
 leit noh, phi pat phin iathuh bad pyni ia nga ia
 ka lynti kaba la ialam ia phi sha ieing jong nga
 bad ba kumno ba phi rung ha ieing jong nga.
 Haba ngi la sngewjah thait nangta ngin ieng ban
 kiew pat ban leit sha bneng, hangta phin btin
 ia nga namar ba phi ipangnud bad isynei ba nga
 la ia id jngai bad nga la thait bad ba nga ruh nga
 sngew ba nga dei ban ud ha khmat jong phi ym
 hano hano pat. Te ha ka jingshongthait kaba ar,
 hangta te ngi la lah ban iohi lut wat ia ki jaka

kiba kyndong, kiba them bad barieh bad nangta
 ngan pyni ia phi ia ka kper jong nga kaba shisien
 phi la wan ban iashem bad nga hangta, ha kaba
 ki dienjat jong nga bad jong phi ki paw tyngkrein
 khlem dam shuh la ha u slap ne u phria, la ha
 u jumai bah-jumai san ne la ha ka eriong ka er-
 ngit, ha kane ka jingshongthait kaba ar ngin
 kylla long kum shijur ki paro jong kata ka prem-
 miet synrai ba janai tam jong nga bad jong phi
 bad kumta ter ter man la ka jingshongthait kan
 long ruh man ka jingiathuh-khana bad ha ka
 kyrdan kaba ha khlieh tam ba ngin sa rung noh
 artad sha bneng phin iathuh khana bad pyni ia
 nga ia ki madan ialethma jong phi, ngan sngap
 da kaba sngewtriem bad khieh khynñiuh ka met,
 bad nga pat ngan pyni ia phi ia ka ieing shong
 byndi ka jong nga ha kaba la pyndait ia nga da
 ki kynjri nar kiba la ban bad pynjngem ia ka
 doh bad ka mynsiem ka jong nga." Hapdeng ka
 jingkrein ki ummat jong ka ki la kyrsoi bad ki
 la tuid ha ki rengngap jong ka. "Hangta nga
 ngan nym iam shuh hyndrei ka mynsiem jong phi
 kan um bad ki ummat rangbah ba nyngkong jong
 phi kin tuid ha ki rengngap ki jong phi ha ki
 jingkyndaw ia ki jingshem jong nga na ka bynta
 jong phi bad ia ki jingshem jong phi na ka bynta
 jong nga, ha kata ka pyrtnei ba la pynjnyar sat
 ia phi bad ia nga. Hamar kita ki khylliapmat
 jong kita ki ummat ba khadduh, ngin nym iohi
 shuh ia ka pyrtnei, namar la kut ki kyrdan jong
 ki jingjam ba ngin rung noh sha kata ka khyrdop
 jong ka bneng." U Lursympar um nangkrein shuh
 shiphang, namar ki krien jong ka ki ngam shaduh

ka trai duh jong ka jingjylliew jong u. Hadien u la kren ha ka sur kumba ka shadem jong u kan bthei bad ki ummat rangbah jong u ki la tuid, u la niad ia ki ummat jong ka bad u la ong, "Ngam lah ban shah ba ngan iohi pat ia ki ummat ki jong phi, balei phi kynmaw ia kine kiei kiei ha ka por ba ngi dei ban phuh samrkhie. Phi sngewbha bad phi sngewtynn timer ba ngin dang iam shuh nator kaba ngi la iam bunsien? Klet noh kong Lyngngaisngi ia kiei kiei baroh, set ia la ki shkor, bad khaprip la ki khmat, mynta ngin nym iapler ne iap syndon shuh."

Hamar ba kut ki ktien jong u Lursymper kiba ong "Ngin nym iapler ne iap syndon shuh", hamar kata ka por la wan ai khubor hangta hapoh kamra jong ki ba ki briew syiem ki la wan bad wad ia ka Lyngngaisngi bad u Lursymper. Hangta baroh arngut ki la ia kylla dur da ka jingsngew ba u Syiem u la phah ban pynhiar kput ia ki. U Lursymper wat lada u Syiem u la leh bha ia u, hynrei u ngeit skhem ba u Syiem un nym suk ka mynsiem kumba u la long u nongialeh pyrshah jong u, bad kumta u la ngeit skhem thik ba ki briew syiem ki la wan ban leh kano kano ka kam ban pynhiar kput ia u. U la ong hangta ia ka Lyngngaisngi, "Nga la sngewhun halor ki ktien jali-jaum jong phi, wat lada ngan iap syndon ruh, ngan shah halor ka pyrthei ba khlem khmat bad khlem jingkein ban leh than ia nga lane ia kiwei pat. Nga nga long uba la rben bad kumta ngan nym sngew ei ei shuh, bad kynmaw ba phi ruh phin long kaba la rben bad wat ju sngew ei ei shuh. Baroh kiei kiei ngan kit ana nga u ~~sam~~

laiphew bor laiphew buit, ai kan jia katba ka jia.”
 “Ngan iap ryngkat bad phi”, la ong ka Lyngngaisngi. “Balei phin iap tang ma phi.”
 U Lursympet u la ieng joit nangta, ka ruh ka la bud ia u. Haba ki la poi hajan jingkhong ki la iohi ba ki briew syiem ki rah la ka talwar. “Kane ka long kaba kut”, la ong u Lursympet, “Nga dei ban iap kum u riewshlur, da ka jingialeh, ngam dei ban iap kum u ’riew khawpud”. Kumta hi u la phai dien nangta ban wad talwar kumba ki ki la rah la ka talwar. La khii kulmar ka ieng baroh kawei. Ka kmie ka la wan beh ka la kylli bad ka la tip ia ka daw, kumta hi kam tip briew shuh ka her sha kita ki briew syiem ka la nguh ia ki ka la ong, “Pyniap ia nga ban ia kaba phi pyniap ia ka khun jong nga”. “Balei phi kren kumta”? la ong u ’riew khmat ki briew syiem, “Ngim shym la wan ban pyniap iano iano ruh hynrei ban ai burom ia ka khun jong phi”. Kumta hi ka kmie ka la sngewthuh ka la her pat sha u Lursympet bad ka Lyngngaisngi ka la iathuh ia kaei kaba ki briew syiem ki la wan bad thmu ban leh U Lursympet wat la um pat don ka mynsiem shaniah ba aiu ki briew syiem ki la thmu shisha, hynrei u la buh noh ia kata ka talwar namar ba u burom ia ka kmie jong ka Lyngngaisngi ba kam shah ia u ban rah ia kata ka talwar. U la leit sha ki ryngkat bad ka Lyngngaisngi. Haba u la poi hangta u la leh husiar, bad u la kylli ia ki ba ki la wan lei shata. Uta u rangbah jong ki briew syiem, shwa ba un jubab u la ong, “Kane ka talwar u la phah u Syiem na ka bynta ka burom jong ka jingshlur

jong phi". U la ai artad ha u ia kata ka talwar, u Lursymper u la kner bad la shim ia kata ka talwar. Haba u Lursymper u la bat ha la ka kti ia kata ka talwar u la kham shaniah khyndiat. "Ym tang kane ka talwar", la ong pat uta u rangbah ki briew syiem, "Hynrei kane ka ksiar, ka rupa bad ki mawkordor u la phah u Siem na ka bynta jong phi baroh arngut, ryngkat ka khubor syiem halor jong phi, kaba nga la wan rah kat kumba u Syiem u la phah". Kumta hi ka Lyngngaisngi ka la khublei ia ki, bad ka la ialam ia ki baroh shapoh kamra.

Haba ki la iashong ha kata ka kamra, ki briew syiem ki la ong ba katno ka la long kaba donbok ia ki ba ki la lap ia ki hangta baroh arngut, namar u Syiem u kwah ba kin da pyniashem lang ia ki baroh arngut shuwa ba kin ai burom ia ki. Kumta ki la sei kata ka ksiar ka rupa bad ki mawkordor ba u Siem u la phah sngewbha sngewburom ia ki. Hadien kata ki la sdang ban iathuh ia kaei kaba u Siem u la phah sha ki bad ba kumno u Syiem u la sngew na ka bynta jong ki haba u la shem ia ka jingiaieid hok jong ki baroh arngut. Ba baroh ki jingleh jong u halor jong ki ka la long tang namar kumba haba u la liat ha kata ka jingbymtip ei ei ia kata ka jingiaieid jong ki bad haba u la tip ia kata ka jingiaieid janpran shi mynsiem jong ki, ba u da kwah shuh ban tynjuh ba kata ka jingieid jong ki ka da long kaba shisha bad janai shisha kumba u la tip ne em. U la buh ki jingiathong kiba um shym tharai ba ki lah ban jop wat la kumno kumno ruh, bad ba hangta u la mut ban pyni ia.

la ka mynsiem rangbañ ba um shym don jingmat
 ei ei ia ka Lyngngaisngi ba un shongkurim ban
 pynkhlad ia ka na kata ka jingieid ba sotti jong
 ki, hynrei ba un pynshai bad ba un iaroh ia kata
 ka jingiaieid ba sotti jong ki, kata ka long ba wañ
 lada u la jop ha kita ki jingiathong hynrei ba ha
 ka jaka ba un shimti ia ka Lyngngaisngi ba u la
 jop hynrei ba un aiti ia ka Lyngngaisngi ha u
 Lursymper bad ba un kyrkhu ia ki baroh arngut,
 hynrei kane ka jingthmu jong u kam shym lah
 long satia haba u la buh ia kata ka jingiathong
 ba kin nym lah ban jop hynrei pynban ki la jop
 thiaiw ia kata bad kumta mynta ba um banse shuh
 ban pan map ia kiei kiei baroh ki jingshem
 shitom jong ki kiba ki la hap na ka bynta ki
 jingleh jong u bad ba u la kyrkhu ba kin ia imsuk-
 imsain kat kum kata ka jingiaieid ba sotti kaba um
 pat ju iohsngew mynno mynno ruh ha ka jingim
 jong u. Haba kifa ki brielw syiem ki la pyndep ia
 la ka jong ka kamram kat kumba u Syiem u la
 phah, ki la ia khublei bad ia mih noh nangta na
 ieing da kaba ki leit rah ka khubor sngewnguh ka
 bym lah shuh ban ong na u Lursymper bad ka
 Lyngngaisngi.

Ki jingjynjar bad sohsat baroh kiba la jia
 ki la kylla long noh ki tyngsok mukmor ha kata
 ka khylliap mat. Ka Lyngngaisngi ka la peit
 sha u Lursymper, bad u Lursymper u la peit
 sha ka Lyngngaisngi da ki jingiapeit ba shu ia
 ia peit lyngngngoh. "Kadei kaba shisha kane"
 la kylli ka Lyngngaisngi "Ka dei kaba shisha",
 la jubap u Lursymper. "Haba ka dei kaba shi-
 sha, hato ngin ialek kumao"? La ong ka

Lyngngaisngi. "Ngam nang ban ong ba ngin ia leh kumno" La ong u Lursympers, "Hynrei tang katne ngan ong ha phi ia ka nusip ba la thoh halo ka kupar mat ia kata ngi dei ban pdiang lada ka thoh kumno kumno ruh. Kine ki khubor babha bad kine kiei kiei baroh ki long kawei na ki nusip bad kito ki jingjia baroh kiba la leit noh ki la long kawei na ki nusip. Kito bad kine ki dei ki nusip ba la jia bad ba ngi la mad. Nangne pat shibun ki nusip ki ban dang jia, ia kita u briew um lah ban ong ba kiba kumno kin jia, ki jingjia ba sngewsih ne jingjia ba sngewbha".

Hadien kane ka la long tang da ka jing-sngewbha jingkmensuda bad ka jingiaieid ba khlem jingpynthut shuh haduh ka sngi ba baroh arngut ki la ialehkai kum ki paro blei ha kata ka pyrthei ba tang arngut jong ki. Baroh arngut ki la ia phla ha kata ka pyrthei jong kata ka jingiashem arngut jong ki, bad kumta ki jingphla ba hun mynsiem jong ki, kin nang iaiphla barabor ha kata ka pyrthei ban dang wan jong ki.

Ia ki lehse ym don jingpyniathut shuh kaba lah ban jop, namar lada u Lursympers un bitar katno katno ruh ia ka Lyngngaisngi hynrei ka tang shu jaw ummat namar ba u dom ia ka, ka pynkynmaw ia u ia kita ki sngi barim ba la leit noh jong ka bad kumta ka mynsiem jong u kan shu um bad kylla duriaw noh ban pan map ia kata ka jingdom bad jingbitar jong u, kumjuh ruh ka

Lyngngaisngi namar ki juh ki daw ka mynsiem jong ka kan kylla duriaw namar jong u.

Ka la kut noh ka jingiathuhkhana jong ki namar ba ki la dei ban shongsuk-shongsain noh bad ba kin ia im shongprah-shongshang baroh arngut ryngkat ka jingrwai ha kata ka pyrthei shongprah-shongshang jong ki shaphang ka jingkynmaw ia kata ka pyrthei jong ka jinglong samla jong ki.
